

C. 62. c.

C. 24. f.

C. 6. 3. c.

1. 4. 2. 1.

M A R T I N I
BONACINÆ
SACR. THEOLOGIÆ
ACI. V. D. VTICENSIS EPISCOPI,
T R A C T A T V S
D E
LEGITIMA SVMMI
PONTIFICIS ELECTIONE.

Iuxta Summorum Pontificum, præsertim Gregorij XV. & Sanctiss.
D. N. Urbani VIII. constitutiones.

E T

D E C E N S V R I S O C C A S I O N E
ipsius electionis à Summis Pontificibus, ad hanc usque diem impostis.

C V M P A R A L I P O M E N I S P O S T H V M I S
eiusdem Authoris ad Opera sua Moralia.

PRODIT NVNC PRIMVM.
*Indicibus, tum Disputationum, Questionum, Punctorum, & Paragraphorum,
tum Rerum notabilium illustratus.*

DE LICENTIA SVPERIORVM, ET PRIVILEGIIS.

Oru. S. Maria



de Sede Probr.

VENETIIS. M. DC. XXXVIII.

APVD PETRV M TVRRINVM.





E L E N C H V S

DISPV TATIONVM, QVÆSTIONVM,

Punctorum, & Paragraphorum.

DISPV TATIO PRIMA.

D *E requisitis ad validam, & legitimam Summi Pontificis electionem.* pag. 1

Breuis, & Compendiosa enumeratio eorum, quæ in Gregorij XV. constitutione continentur. 2

Q V Æ S T I O I.

De requisitis ad validam Summi Pontificis electionem ex parte eligentium. 7

PVNCT. I. Vtrùm Elector Summi Pontificis debeat esse Cardinalis. 7

S. 1. *Quinam Cardinalium nomine veniant, & cur Cardinales hoc nomine vocentur.* 23

S. 2. *A quonam Cardinales instituti fuerint, & ad quem creatio Cardinalium pertineat.* 26

S. 3. *A quonam Cardinales acceperint potestatem eligendi Papam, & quandonam eligere incœperint.* 28

S. 4. *An Cardinales facultatem habeant eligendi Papam solum Sede vacante,* † 2

vacante, eamque singuli habeant, an solum Collegium Cardina-
lium. 31

II. An Electores liberè & sponte debeant eligere, & an electio fa-
cta per metum valida sit. 35

III. De quatuor alijs conditionibus requisitis ex parte eligentium,
quarum prima est, vt elector non eligat seipsum: secunda, vt ei-
dem non suffragetur in scrutinio, & in accessu: tertia, vt dignum
eligat: quarta, vt alia à iure sibi præscripta obseruet. 39

Q V Æ S T I O II.

De requisitis ex parte electi ad validam Summi Pontificis electionem. 42

S. Vnic. Vtrùm electio Summi Pontificis facta per simoniam vali-
da sit. 54

Q V Æ S T I O III.

De requisitis ex parte loci ad validam Summi Pontificis electionem. 66

Q V Æ S T I O IV.

De requisitis ad electionem Summi Pontificis ex parte temporis. 72

Q V Æ S T I O V.

De requisitis ex parte formæ ad electionem, seu de varijs eligendi Ponti-
ficem modis, & formis. 77

I. De electione per scrutinium, seu per scrutinium, & accessum.
In hoc puncto explicabo conditiones ad electionem per scruti-
nium, vel per scrutinium, & accessum requisitas. 79

II.D

II. De electione per compromissum.	87
III. De electione quæ fit quasi per inspirationem.	96
IV. De creatione Pontificis successoris facta per designationem, & electionem à Papa adhuc viuentem.	110
Epilogus, seu brevis enumeratio eorum, quibus in hac prima disputatione ostēdimus substantiam electionis vitari, & eueri.	125

DISPUTATIO SECVNDA.

D e Censuris, occasione creationis Romani Pontificis editis.	126
---	-----

QVÆSTIO I.

De pœna excommunicationis contra facientes sponssiones, seu excommisissas super vita, morte, & futura electione Pontificis, aut super promotionibus Cardinalium.	127
--	-----

QVÆSTIO II.

De pœna excommunicationis contra ambientes Papatum, aut tractantes de electione Pontificis, ipso adhuc viuentem.	131
--	-----

QVÆSTIO III.

De excommunicatione contra Dominos temporales, & Officiales ciuitatis, in qua electio Summi Pontificis facienda est.	138
--	-----

QVÆSTIO IV.

De excommunicatione contra eos, qui Cardinalibus in Conclauis existentibus, litteras, vel nuncium mittunt, vel secretò loquuntur.	141
---	-----

Q V Æ S T I O V.

De excommunicatione contra occupantes bona Cardinalium in Conclavi existentium, aut. etiam alibi.

150

Q V Æ S T I O VI.

De excommunicatione contra Cardinales simoniam committentes in electione Papæ.

154

Q V Æ S T I O VII. & ult.

De excommunicatione Gregorij XV. & sanctissimi D. N. Urbani, contra Cardinales non seruantes formam in eligendo Summo Pontifice prescriptam, aut. presumentes aliquid facere, vel attentare contra ipsorum constitutiones.

158.





INDEX RERVM NOTABILIVM.

AB:



Absolutio excommunicationis reser-
uata. pag. 157.6

Absolutio excommunicationis
contracte ob violationem consti-
tutionis Gregor. X V. circa ele-
ctionem, reseruata est Papæ, nec

ullus virtute cuiuslibet priuilegij excepto mortis
articulo absolvere potest. 158.3

A M.

Ambiens, seu procurans Papatum incurrit ex-
communicationem, etiamsi id faciat viuente Sum-
mo Pontifice. 132.3

quid Ambire, & vtrum ambiens post mortem
Summi Pontificis ligetur excommunicatione, sal-
tem si per simoniam procuret. 133.4

A P.

Apostoli quomodo Petrum in Pontificem ele-
gerint. 30.

C A

Cardinalatus non solum est nomen dignitatis,
verum etiam officij. 25.3

Cardinalis superstes alij mortuis potest aliquem
secum assumere ad eligendum, vel, vtralij, volunt,
conuocandum est in tali conuento Concilium genera-
le, à quo Papa eligatur, vel à Romano Clero. 9.3

Cardinalis cuius clauis fuit, ante mortem
Pontificis potest conuenire ad electionem. 10.4

Cardinalis censura obstrictus non repellitur ab
electione. ibid. 5.

Cardinalis sacro Diaconatus ordine nondum in-
gnitus, ad electionem admittendus non est. ibid. 6.

Cardinalis cedere potest iuri eligendi, & nihilo-
minus facta cessione, si ad electionem concu-
rat, validè concurrat. 11.7

Cardinalis qui semel simoniace aliquem elegit,
potest nihilominus ad nouam Pontificis electio-
nem concurrere. ibid. 8.

Cardinalis qui suffragium digno confert relicto

digniori, quem ipse eligi vellet, alij preterea respo-
dendum, à mortali excusatur. 41.5

Cardinalis tribuens votum manifestè indigno,
non vt eligatur, sed vt votum inane reddatur, per
se loquendo grauius peccat. ibid. 6

Cardinalis an incurrat penas constitutionis lu-
lianæ, si commissa simonia, vt in Papam elige-
rentur, nominatus quidem fuit, sed non electus
defectu nonnullorum suffragiorum. 65.17

Cardinales quomodo Pontificem eligant cum
ipsi potestatem Pontificiam non habeant. 16.12

Cardinales cur hoc nomine vocentur. 24.2

Cardinales à quonam primo instituti fuerint. 26.1

Cardinales à quonam facultatem eligendi Pô-
tificis acceperint. 29.1

Cardinales dicuntur habere facultatem eligen-
di Pontificem potius delegatam quam ordina-
riam. 30.3

Cardinales quandònam soli Pontificem elige-
re inceperint. 31.2

Cardinales eligendi potestatem habent quo-
ties Sedes vacat, siue vacet per mortem, siue
aliaratione. 32.1

Cardinales an singuli facultatem habeant eli-
gendi, vel solum Collegium. ibid. 2

Cardinales vnus vel duo in Conclau existen-
tes alij à Conclau egressis, vel extinctis an Pon-
tificem eligere possint. 33.3

Cardinales Concilium Generale Sede vacante
conuocantes, an possint ipsi Pontificem eligere,
vel potius eligendi facultas Collegio competat. 34.4

Cardinales facta iam vnus electione recedere
non possunt ab electione. 32.10

Cardinales an Ecclesiam gubernare possint do-
nec electus consensum praestet. ibid. 11

Cardinales an facultatem aliquam habeant in
electum qui electionem nondum acceperant. 33.12

C. 11

Index Rerum.

Cardinales in Conclauo existentes non ligantur excommunicatione, secretè inter se loquendo, aut nunciunt, & litteras ad se mittendo. 143.6

Cardinales recipientes nuncium, vel litteras, velloquentes, cum secretò loquentibus grauitè peccant, sed non ligantur excommunicatione. ibid.7

Cardinalium nomine quinam veniant. 14.1

Cardinalium creatio ad quem pertineat. 18.3

Cardinalium Collegium non potest quinquam, qui Cardinalis non sit, admittere ad electionem. 9.2

Cardinalium famulus in Conclauo existens alioquens, non ligatur excommunicatione. 146.8

Cardinalibus Regia quasi dignitas competit. 45.2

CE

Censuræ, occasione creationis Rom. Pontificis editæ. 213

CL

Clemens prius à D. Petro in successorem electus, an Papatu cesserit. 119.5

Cletus, & Linus, vide Linus.

CO

Compromissarius ab alijs eligi potest. 92.10

Compromissarij in electione Pontificis plures esse debent. 90.5

Compromissarij quot esse possint. 91.6

Compromissarij qua forma instituendi sint. ibid.7

Compromissarij in electione Papæ debent esse Cardinales. 92.8

Compromissarij debent eligere Papam in Conclauo clauso. 93.1

Compromissarij seruare debent formam sibi à Cardinalibus compromittentibus præscriptam. ibid.12

Compromissum de consensu omnium Cardinalium fieri debet. 88.1

Compromissum qua forma in iudicio sit. 90.3

Compromittere nemo potest in seipsum. 92.9

Conclauo ubi constituendum sit. 69.4

Conclauo an constituendum sit in Palatio Papæ. 70.5

Conclauis nomine quid intelligatur. 69.3

Conclauo iam clauso quinam in illud admitti possint. 71.6

Conclauo clauso an consensus omnium Cardinalium requiratur, dum aliquis in Conclauo admittendus est. ibid.7

DO

Domini temporales non seruantes præscriptam Sede Apostolica vacante ligantur excommunicatione. 138.1

enumerantur ea quæ seruanda sunt a dominis temporalibus Sede vacante. 139.2

assignatur materia istius excommunicationis. 140.3

assignatur subiectum eiusdem. ibid.4

absolutio istius excommunicationis non est reseruata. ibid.5

EL

Electio indigni, an imputanda sit Cardinalibus, an Pontifici, qui Cardinalibus potestatem eligendi contulit. 17.14

Electio Pontificis valida non est nisi liberè fiat. 35.1

inualida est facta per metum, etiamsi de huiusmodi metu omnibus Cardinalibus non constet. 36.2

Electio facta per metum leuem valida est. 37.3

Electio facta per metum Cardinalibus in genere incussum ad eligendum valida est. ibid.4

Electio facta per metum incussum ad eligendum aliquem certi generis, vel nationis, valida est. ibid.5

Electio valida est dum metus incutitur ad excludendas personas certi generis, aut certam aliquam personam. 38.6

Electio facta metu acris inficiendi, valida est. ibid.7

Electio facta per metum à Deo miraculosè incussum, valida est. ibid.8

Electio facta à Cardinalibus audientibus Turcas adesse, valida est. ibid.9

Electio Urbani VI. valida fuit, etiamsi fortè per metum initio facta fuerat. ibid.10

Electio Summi Pontificis facta per simulationem, inualida est. 36.1

Electio Papæ an inualida sit, dum Cardinalis gratiam suam, vel operam promittit alteri, vt se in Papam eligat. ibid.2

Electio precibus facta, valida est. ibid.3

Electio valida est, dum eligendus aliquid alteritrat, vt eum ab inuicta impugnatione recuset. 57.4

Ele-

Index Rerum.

Electio valida est, dum Cardinalis in Pa-
m eligendus, promittit se facturum aliquid in vili-
tatem totius Ecclesie. *ibid.* 5

Electio valida est, dum eligendus promittit se
facturum aliquid in gratiam Conclauitarum, seu
aliorum qui ad electionem non concurrunt. *58.6*

Electio an valida sit, dum facta fuit, non so-
luta ab eo cum quo simonia commissa fuerat, ve-
rum etiam ab alijs conferentibus suffragia suffi-
cientia ad electionem. *60.9*

Electio Papae irrita non est ob aliqua crimina,
excepta heresi, & simonia in electione. *66.18*

Electio facienda est in Conclau clauso. *67.1*

Electio facta Conclau clauso valida est, etiam si
forte ibi aliqui extranei lateant. *68.2*

Electio Summi Pontificis facienda non est an-
te decem dies ab obitu Pontificis, nec ultra dif-
ferri debet. *72.1*

Electio Pontificis quandònam fieri possit, an-
te lapsum decem dierum, & quando non ultra
differri possit. *73.2*

Electio Pontificis ex graui causa ultra decem
dies differri potest. *74.3*

Electio Pontificis facta ante elapsos decem
dies, valida est. *75.4*

Electio dilata ultra decem dies, valida est, ibi-
dem *5*

Electio an nocturno tempore fieri possit. *76.6*

Electio nocturno tempore inchoata, & abso-
luta, irrita non est. *ibid.* 7

Electio Ecclesiasticorum per sortes, vetita
est. *78.2*

Electio per scrutinium requirit debitum suf-
fragiorum numerum. *80.1*

Electio fieri debet per secreta suffragia. *81.4*

Electio facta per adorationem inualida est. *ibid.* 6

Electio valida est etiam si Cardinalis retulerit
quod in suo suffragio continetur. *82.7*

Electio an valida sit, dum Cardinalis suum
suffragium alijs ostendit antequam illud claude-
ret. *83.8*

Electio valida est etiam si aliqui tulerint sua
suffragia aperta, istamen cui lata sunt non fuit
electus, sed alius. *83.9*

Electio an viuetur ob duo, vel tria suffragia
aperta. *ibid.* 10

Electio inualida est, dum quis se ipsum eligit, &
ipsum suffragium complet numerum ad electio-
nem requisitum. *85.11*

Electio per compromissum, valida non vide-

tur, nisi Cardinales compromittentes conseru-
ent non solum in compromissum, verum etiam in
ipsum compromissarios. *88.2*

Electio minus idonei facta à cõpromissarijs,
an valida sit. *95.13*

Electio per inspirationem quòtuplex sit. *97.1*

Electio per inspirationem fieri debet in Co-
clau clauso. *98.2*

Electio facta in sacello, seu Capella clausa,
an valida sit? *ibid.* 3

Electio fieri potest in quolibet loco conclau-
is. *ibid.* 4

Electio facienda est post decem dies à die obi-
tus. *ibid.* 5

Electio per inspirationem fieri debet consen-
su omnium. *99.6*

Electio per inspirationem an valida sit, si tem-
pore complenda electionis aliquis Cardinalis
sensibus delituitur, ita vt loqui non valeat, aut
suum consensum ore, vel scripto portare. *100.101.7.8*

Electio per inspirationem valida est, etiam si
aliqui prius dissenserant, qui postmodum con-
sentiant. *102.9*

Electio per inspirationem facienda est, cum
verbo eligo ore, vel scripto prolato. *103.10*

Electio per inspirationem fieri debet, absque
præiudicio tractatu de speciali persona. *104.11*

Electio quandònam inchoata cõsecratur. *107.17*

Electio quasi per inspirationem facta præiudicio
tractatu, an valida sit, si electus tractatum penitus
ignorabat? *ibid.* 18

Vide Pontifex.

Electio forma quòtuplex sit. *79.3*

Electio subitanea quorum viuola & euer-
tenda. *125*

requisita ad validam & legitimam Summi
Pontificis electionem. *1*

requisita ex parte eligentium, *7*

ex parte electi. *42*

ex parte loci. *66*

ex parte temporis. *72*

ex parte formæ. *77*

Electio Summi Pontificis attentans ipso
viuente, seu inconsulto excommunicationem in-
currit. *133.5*

Electio Summi Pontificis consulens, non
incurrit excommunicationem. *ibid.* 6

assignatur subiectum istius excommunicatio-
nis. *134.7 & seqq.*

Electio Summi Pontificis hoc tempore debet
esse Cardinalis. *8.1*

Electio se ipsum eligere non potest. *40.1*

Electio

Index Rerum.

Electores qui suffragium vni in scrutinio dedit, non potest eidem in accessu suffragari. *ibid.* 2
Electores debent idoneum eligere. *ibid.* 3
Electores possunt ceteris paribus eum præferre, quem sibi magis propitium sperant. *ibidem* 4
Electores seruare debent ea quæ sibi præscripta sunt. 42.7
Electus in Papam quomodo se gerere debeat dum animaduertit in sua electione simoniam factam fuisse. 61.11
quid faciendum si Eligatur aliquis qui postea rationis vsum amittat. 50.7
Eligenda est persona certa. *ibid.* 8
Eligendi Magistratus forma quodplex sit. 77.1
Eligendus in Papam debet esse masculus, & non femina. 43.1
Eligendus in Papam rationis vsum habere debet. 48.5
Eligendus in Papam debet esse baptizatus. 53.13
Eligendus in Papam debet esse Christi fidelis, non Hereticus. 54.14
Eligendus in Papam vitio simoniz in electione carere debet, alioquin non solum tunc inualida eligitur, verum etiam inhabilis efficitur qui in futurum eligatur. *ibid.* 15
Eligendus in Papam an debeat ex numero Cardinalium esse. 66.19

EX

Excommunicatio contra dominos temporales, & officiales ciuitatis, in qua electio Summi Pontificis facienda est. 138
Excommunicatio contra eos, qui Cardinalibus Conclauis existentibus, litteras, vel nuntium mittunt, vel secretò loquuntur. 141
refertur textus in quo ista excommunicatio continetur. 142.1
assignatur materia. *ibid.* 2
Excommunicatio contra occupantes bona Cardinalis in Conclauis existentis, aut etiam alibi. 150
refertur textus in quo ista excommunicatio continetur. 151.1
assignatur materia. 152.2
Excommunicatio lata ob inuasionem domus Cardinalis an referuata sit. 154.7
Excommunicatio contra Cardinales simoniam committentes in electione Papæ. 154
Excommunicatio lata ob simoniam contra Clerum

causa electionis Papæ non incurritur, quouis tempore præfata simonia committatur, sed si committatur Sede vacante. 157.4
assignatur subiectum istius excommunicationis. *ibid.* 5
Excommunicatio Gregorij XV. & sanctissimi D.N. Urbani, contra Cardinales non seruantes formam in eligendo Summo Pontifice præscriptam, aut præsumentes aliquid facere, vel attentare contra ipsorum constitutiones. 158
assignatur materia istius excommunicationis. *ibid.* 1
assignatur subiectum. 159.2

FOE

FOEmina nulla fuit vnquam in Papam electa. 43.2
acta huiusmodi feminæ irrita essent. 47.3

IN

Inuadens domum alicuius Cardinalis, non incurrit istam excommunicationem, nisi etiam aliquid rapiat, an autem aliam incurrat, explicatum est in tractatu de censuris in particulari. 152.3
Inuadens domum alicuius Cardinalis armata manu incurrit excommunicationem, etiam si vox non prodierit ipsum in Papam electum fuisse. 153.4
Inuadens domum Cardinalis quas pœnas præter excommunicationem incurrat. 154.8

LI

Linus, & Cletus non fuerunt absoluti Pontifices, sed cooperatores, & Suffraganei SS. Petri, & Clementis. 119.6
Litteras mittens Cardinali in Conclauis existenti, non ligatur excommunicatione, si litteræ ad Cardinalem non perueniunt. 143.3
Litteras Cardinali in Conclauis existenti mittens ligatur excommunicatione, siue secretè, siue publicè mittat. 144.4
assignatur subiectum istius excommunicationis. *ibid.* 5
Litteras recipiens in Conclauis missas, quandònam ligetur excommunicatione. 147.9
Litteras, seu scripta deferens in Conclauis non ligatur excommunicatione. 148.12

Papam

Index Rerum.

PA

Papam deponendi facultas, an competat Cardinalibus, sicut eisdem competit facultas eligendi. 18.15

POE

Pœna excommunicationis contra facientes sponſiones, seu excommiſſas ſuper vita, morte, & futura electione Pontificis, aut ſuper promotionibus Cardinalis. 127

reſertur textus, in quo iſta excommunicatio continetur. ibid.1

affignatur materia. 128.2

Pœna excommunicationis contra ambientes Papam, aut tractantes de electione Pontificis ipſo adhuc viuente. 131

reſertur textus in quo iſta excommunicatio continetur. 132.1

affignatur materia. ibid.2

Pontifex reſpectu Chriſti dicitur habere poſſeſtatem miniſterialem, reſpectu verò hominum auctoritativam. 17.13

Pontifex an poſſit Cardinalibus facultatem concedere deponendi alios Pontifices. 20.16

Pontifex poteſt formam eligendi præſcribere, non autem facultatem deponendi alios Pontifices concedere. ibid.17

Pontifex an poſſit ſe alieno Iudicio ſubiicere. ibid.18

Pontifex an in cauſa hæreſis deponi poſſit. 21.19

Pontifex anteneatur ex vi iuramenti ſeruare ea, quæ dum Cardinalis erat ſimul cum alijs iurauit. ibid.20

Pontifex an poſſit ſeipſum deponere, ſeu Patui cedere. 22.21

Pontifex cuiuſnam ætatis eſſe debeat dum ad Pontificatum promouetur. 49.6

Pontifex conſentire debet in electionem, alioquin electio inualida eſt. 50.9

Pontifex licet non poteſt ſibi ſucceſſorem eligere ſine vigentiſſima cauſa. 111.1

neque licet poteſt ſucceſſorem eligere ſine conſenſu omnium Cardinalium. 112.2

Pontifex de plenitudine poteſtatis poteſt ſibi ſucceſſorem valide eligere. ibid.3

Pontifex an poſſit ſibi duos ſucceſſores eligere, eodem tempore, qui eandem auctoritatem adæquatè, vel inadæquatè in totum orbem exercent. 123.8

Pontificis eligendi poteſtas, an Imperatori-

bus, aut Regibus aliàs conceſſa fuerit. 12.9

Pontificis eligendi poteſtas quomodo aliàs conceſſa fuerit Populo, ſeu Laicis. 14.10

Pontifices an aliquando vſi ſint poteſtate abſoluta eligendi Pontificem. 116.4

Populus cur hoc tempore ad Pontificis Electionem non admittatur. 16.11

SC

Scripturam mittens in Conclauē ligatur excommunicatione, etiamſi ſcriptura non agat de Summi Pontificis electione. 147.10

Scripturam mittens in Conclauē, ligatur excommunicatione, etiamſi ea ſcriptura aliquid aliud inuoluat, aut credat fore, vt non legatur. 148.11

Scripturam breuem, ſeu modicum chirographum mittens in Conclauē, ligatur excommunicatione. ibid.13

abſolutio iſtius cenſuræ, an reſeruata ſit. 150.14

SI

Simonia mentalis non vitiat electionem. 59.7

Simonia vt electionem viuēt, debet influere in electionem. ibid.8

Simonia electionem non vitiat, niſi conſentiente, vel ſaltem conſcio ipſomet electo. 60.10

Simonia non irritat electionem niſi commiſſa fuerit ab ipſo electo, vel ab aliquo ex Electoribus. 62.12

Simonia non vitiat electionem, dum tradita fuit res leuis, & non magni momenti. ibid.13

Simonia vitiat electionem, etiamſi notoria non ſit. 63.14

Simonia notoria quandonā dicatur. ibid.15

Simoniam committens in electione Papæ, excommunicationem incurrit. 155.1

affignatur materia iſtus excommunicationis. ibid.2

enumerantur ea propter quæ incurritur excommunicationem, faciendō contra contenta in hac Bulla. 156.3

SP

Sponſio, vel quilibet alius contractus ſuper morte, vel futura electione Summi Pontificis, aut ſuper promotione alicuius Cardinalis, punitur pœna excommunicationis. 128.3

Sponſionem fieri permittens in ſuis terris ſuper vita, morte, vel electione Pontificis, aut promotione Cardinalis punitur pœna excommunicationis. 129.4

idem dic de conſulente, auxiliante, aut conſenſum præſtante. ibid.2.5

parui-

Index Rerum.

paritas materiz videtur ab hac censura excu-
sare. 130.6
enumerantur personæ, quæ huic excommu-
nicationi subijciuntur. ibid.7
absolutio excommunicationis referuata Pon-
tifici. ibid.8
absolutio an valida sit nondum facta restitu-
tione. ibid.9

SV

Suffragium iam latum, an reuocari possit. 80.2
Suffragium in quo plures nominati sunt, irri-
rum est. ibid.3
Suffragium quandònam dicatur secretum. 81.5
Suffragia an aperienda sint, dum alicui Cardi-
nali simoniae crimen circa electionem opponi-
tur. 65.16

TA

Taciturnitas an sufficiat ad compromissum.
90.4

TR

Tractatio de potestate absoluta Pontificis ad
Theologos pertinet, non ad Canonistas. 121.7

Tractatus nomine quid intelligatur. 10.12
Tractatus quotuplex sit. ibi.13
Tractatus quilibet in electione per inspiratio-
nem prohibetur. 10.14
Tractatus consultiuus, & informatiuus, an
cessario præmittendus sit in electione, qual
per inspirationem. 10.15
Tractatus decisiuus quid requirat, vt irr tam
reddat electionem. ibi.16

VI

Vt coniugatus valide eligi potest. 18.4

VV

Vulnerans aliquem in domo Cardinalis, post-
quam eam domum armata manu inuasit excom-
municationem incurrit. 113.5
explicatur subiectum istius excommunicationis.
114.6

F I N I S.



MAR=

I

MARTINI
BONACINÆ
SACRÆ THEOL
AC I. V. D. VTICENSIS
EPISCOPI,

De legitima Summi Pontificis electione, iuxta Summorum Pontificum, præsertim Gregorij XV. & Sanctissimi D.N. Urbani VIII. Constitutiones: Et de Censuris occasione ipsius electionis à Summis Pontificibus, ad hanc vsque diem impositis.

Tractationem istam in duas diuidam disputationes; in prima de requisitis ad validam, & legitimam electionis Pontificiæ rationem & formam disputabo; in secunda Censuras occasione electionis Summi Pontificis editas, afferam, & explicabo.

DISPUTATIO PRIMA.

Derequisitis ad validam, & legitimam Summi Pontificis electionem.



VÆ ad legitimam Summi Pontificis electionem pertinent, ad quinque capita reuocari possunt. Primum est ex parte eligentium. Secundum ex parte electi. Tertium ex parte loci. Quartum ex parte temporis. Quintum ex parte formæ: sed antequam ad istorum singulorum explicationem accedam, operæpretium censui, paucis ea perstringere & enume-

A rare.

rare, quæ in Gregorij XV. constitutione continentur, vt habita, quasi per transennam, seu compendium, eorum omnium breui cognitione, in clariorem dicendorum intelligentiam facilis quisque feratur,

Breuis & Compendiosa enumeratio eorum quæ in Gregorij XV. constitutione continentur.

Primò, electio fieri non potest nisi in Conclau iam clauso, & post celebratum in eo, prima die, Missæ sacrum, in quo Cardinales adstantes Eucharistiæ sacramentum sumere consueuerunt, *S. matura.*

Secundò, electio faciendâ est per Scrutinium, aut per scrutinium & accessum, aut per compromissum, aut per Inspirationem, seruatomodo in singulis istis formis præscripto. Itaque si electio per scrutinium fiat, scrutinium peragi debet, per secreta suffragia, & in eo concurrere debent duæ partes suffragiorum, *S. matura*, & *S. quod si electio.*

Quando electio per compromissum faciendâ est, primò Compromissum iniri debet omnibus consentientibus; secundò eligendi sunt plures compromissarij, & hi quidem Cardinales in Conclau præsentés; tertio nullus potest se compromissarium constituere, nec vllus compromissarius potest seipsum eligere, *S. quod si electio.*

Quando electio agitur per Inspirationem, primò faciendâ est omnibus consentientibus, & nemine dissentiente, secundò sine tractatu de speciali persona, tertio consensus exprimendus est per verbum *eligo*, intelligibili voce prolatum, nisi fortè eligens infirmus sit, tunc enim sufficit consensum exprimere per verbum *eligo* scripto exaratum, *S. quod si electio.*

Tertio, electus non potest sibi suffragium ferre, imò ipsius suffragium irritum est, dum sibi suffragatus est, ipse tamen computandus est in numero Cardinalium eligentium, ob id si duæ partes tantum suffragiorum alicui tribuantur, aperiendâ est schedula electi, vt
in spi-

inspiciatur an ipse sibi suffragium dederit; nam si comperiatur sibi suffragium dedisse, electio irrita est defectu debiti numeri suffragiorum: propterea si quis electus sit cum duabus partibus suffragiorum, precisè, electio censenda non est valida, donec explicata & reserata electi schedula constiterit, ipsum sibi suffragium non dedisse, *S. numerum, & S. rursus.*

Quartò, si plures nominati pares sint in numero suffragiorum, nullus remanet electus; si verò impares sint, is censetur electus, qui superat alium in numero suffragiorum, etiamsi vno tantum suffragio superet, modo duas tertias partes suffragiorum tulerit, *S. ac si.*

Quintò, iuramentum emittendum est à Cardinalibus in suffragio ferendo, iuxta formam præscriptam, in *S. insuper.*

Sextò, electi nomen describendum est immutato proprio caractere, & simul addita certa nota, seu signo in schedulis, tam scrutiniij quàm accessus, ut fraus euitetur, & illa pars schedulæ in qua dicta signa apponuntur complicanda est, *S. suffragiorum, & S. postea.*

Septimò, signa & suffragia in media capella conscribi debent ad mensam ibi constitutam, & circumseptam, ut ab alijs videri nequeat, quod à suffragatoribus scribitur; si quis verò ad mensam se conferre nequeat, schedulam conficiat, càmque ultimo scrutatori tradat, *S. quod autem.*

Octauò, electione in scrutinio non secuta, instituendus est accessus antequam Cardinales ad alia progrediantur; peracto enim scrutinio quilibet potest alteri semel accedere; schedulæ autem accessus conficiendæ sunt, eo pacto quo diximus conficiendas esse in scrutinio, præterea in conficienda schedula accessus, qui alicui vult accedere, scribere debet nomen illius, cui accedit; si verò nulli velit accedere, scribat neminem, *S. & ut accessus.*

Nonò, qui in schedula scrutiniij plures nominavit, potest in accessu vnum ex nominatis eligere. Is tamen qui plures nominavit in numero Cardinalium computandus est, sed ipsius suffragium in scrutinio latum invalidum est, ac si latum non fuisset, *S. nulli autem.*

A 2 Decimò,

Decimò, dum quis in accessu nominatus fuit aliquo suffragio, idem sigillum & eadem signa habente cum suffragio scrutinij, aperienda sunt suffragia, vt inspiciatur an ab eodem nominatus fuerit in accessu & in scrutinio, *S. postea verò.*

Vndecimò, si schedula accessus notata sit aliquo signo, quo notata non sit schedula scrutinij, suffragium accessus nullum est, *S. at si.* Præterea accedens ad aliquem cui suffragium in scrutinio tulerat inualidè accedit, & irritum est suffragium accessus, *S. at si.*

Duodecimò, accedens ad aliquem cui suffragium in scrutinio non tulerat, non censetur ab eo recedere quem in scrutinio nominauerat, *S. neque in quolibet.*

Decimotertiò, schedulæ omnes diligentissimè & palam numerandæ sunt, antequam schedulæ scrutinij, vel accessus à scrutatoribus aperiantur, & si plures inuentæ fuerint, quàm sint Cardinales in Conclauis, præsentés omnes comburendæ sunt, & iterùm ad suffragium statim accedendum, *S. in super,* & *S. si quis,* imponitur excommunicationis pœna contra non seruantes suprà dicta.

Decimoquartò, infirmus qui ob infirmitatem ad scrutinium venire nequit, suffragium tradere debet Cardinalibus ad hoc deputatis, iuxta formam hic præscriptam, in *S. præterea statuimus*: verum si infirmus ob infirmitatem scribere non possit, scribere potest per alium exorto iuramento, de seruando secreto, quod sub pœna excommunicationis latæ sententiæ seruari præcipitur, *S. præterea statuimus.* Tres autem scrutatores pro votis infirmorum suscipiendis extrahendi sunt per vltimum Diaconum ante quodlibet scrutinium, & hii tenentur sub pœna excommunicationis ipso facto incurrenda, secreto celare, quæ cognouerint in exercendo suo officio, idem militat in recognitionibus, *S. ad hæc scrutatores.*

Decimoquintò, scrutatores deferre debent folia ad infirmos, in quibus annotatus sit numerus suffragiorum, quem quisque tulit in scrutinio; vide Cæremoniale, *tit. de accessu, vers. I. pag. I 16.*

Decimosexto, finito scrutinio, & accessu, sorte contrahendi sunt tres

tres Cardinales qui schedulas omnes recognoscant, & schedulæ omnes statim palam comburendæ sunt, *§. ad hæc.*

Decimoseptimò, scrutiniū bis singulis diebus peragendum est, semel manè post solitam Missam, & iterum post prandium, ad quod singuli sub excommunicationis pœna ipso facto post tertium campanæ sonum conuenire debent, nisi praua valetudine impediantur, *§. β. m/iter.*

Decimooctauò, secretum in ijs seruari præcipitur, quæ circa suffragium ferendum vel latum pertinent, *§. postremò statuimus.*

Decimononò, vetantur pactiones omnes, promissiones, signa, pacta, iuramenta, obligationes, intendimenta, & similia ad aliquem seu aliquos includendos, vel excludendos, *§. Cardinales*, vbi etiam irritantur iuramenta, & pacta circa prædicta: imò non seruans prædicta pacta, conuentiones, vel iuramenta, non incurrit infamiam, seu notam violatæ fidei. Addit Sopranus Cardinalem, qui transgrediendi tale pactum audet exprobrare notam violatæ fidei, vel perfidiæ, pœnam excommunicationis ipso facto incurrere, sed hoc mihi durum videtur, nec clarè colligitur ex constitutione Gregorij, imò cum versemur in materia pœnali, verborum significatio extendenda non est, sed potius restringenda, Summus autem Pontifex asserit quidem non seruantem præfata pacta, seu iuramenta notam perfidiæ non incurre, non tamen sufficienter explicare videtur exprobrantem notam violatæ fidei excommunicationis pœnam subire.

Vigestimò, Cardinales censuris irretiti excludendi non sunt ab electione, tam actiua quàm passiuæ, *§. volumus etiam.*

Vigesimo primò, cauendum est Cardinalibus ne aliquid contra istam constitutionem statuere, disponere, alterare, tractare, facere, vel attentare præsumant, quouis prætextu, causa, vel exquisito colore, alioquin excommunicationis censuram ipso facto incurrunt, *§. postremò statuimus*, ad obseruationem istius constitutionis deputantur Cardinales, qui singulis diebus curam habeant agendarum congregationum, *§. ut autem.*

Vigefimofecundò, Cardinales affecuto Cardinalatu iuramentum præstare debent de hac constitutione, & alijs similibus feruandis. Idem facere debent Cardinales, non solum in prima congregatione post obitum Pontificis fieri solita, verum etiam in congregatione post Conclauis ingressum, vt patet ex *S. volumus quæque*.

Quæ in constitutionibus præcedentium Pontificum sancita fuerunt, in suo relinquuntur robore, *S. quibus constitutionibus*, exceptis iis quæ in hac constitutione expressa sunt. Ex quo infert Sopranus præceptor meus *l. b. 2. cap. 2. de electione*, istam constitutionem non esse derogatoriam præcedentium, sed potius suppletuiam: nam constitutio præcipit omnia quæ in alijs constitutionibus decernuntur, & præterea aliquid aliud, non est derogatoria, sed suppletua & accumulatiua; ego verò cenfeo ex parte derogatoriam esse. Ratio est, tum quia in præcedentibus constitutionibus decernitur electum à duabus partibus Cardinalium quacumque forma, & quocumque in loco eligatur verum Pontificem esse; in constitutione verò Gregorij irritatur electio alio in loco, quàm in Conclauis clauso, aut alia forma, quàm hic præscripta: ergo ista Gregorij constitutio derogatoria ex parte dici debet, nam illa constitutio dicitur derogatoria alterius, quæ aliquid illi contrarium decernit, tum quia Gregorius, in *S. non obstant*, & in *S. quibus*, expressè dicit, se nolle constitutionibus aliorum Pontificum, & pœnis in eis contentis derogare, nisi in superius expressis, ergo dicendum est aliquid, expressisse in quo præcedentibus constitutionibus derogare intendit. Idem sentiendum est de constitutione Summi Pontificis Urbani VIII. ibi non obstantibus, &c. Hinc patet responsio ad rationem Soprani. Respondeo enim esse derogatoriam, quatenus statuit aliquid contrarium præcedentibus constitutionibus, vt patet ex prima ratione. His præmissis explicanda modo sunt sigillatim quæ initio quæstionis proposui exponenda.

Q V Æ S T I O I.

De requisitis ad validam Summi Pontificis electionem ex parte eligentium.

SEX conditiones ex parte eligentium requiruntur; Prima est ut eligens sit Cardinalis; Secunda ut liberè eligat; Tertia ut non eligat seipsum; Quarta ut in accessu non tribuat illi suffragium cui suffragatus est in scrutinio; Quinta ut idoneum eligat; Sexta ut obseruet alia à Pontificibus sibi præscripta, has omnes conditiones in tribus punctis explicabo.

P V N C T V M P R I M V M.

Vtrum Elector Summi Pontificis debeat esse Cardinalis.

S V M M A R I V M.

- 1 Elector Summi Pontificis hoc tempore debet esse Cardinalis.
- 2 Cardinalium Collegium non potest quemquam, qui Cardinalis non sit, admittere ad electionem.
- 3 Cardinalis superstes alijs mortuis potest aliquem secum assumere ad eligendum, vel, ut alij volunt, conuocandum est in tali euentu Concilium generale, à quo Papa eligatur, vel à Romano Clero.
- 4 Cardinalis cui os clausum fuit, ante mortem Pontificis potest conuenire ad electionem.
- 5 Cardinalis censura obstrictus non repellitur ab electione.
- 6 Cardinalis sacro Diaconatus ordine nondum insignitus, ad electionem admittendus non est.
- 7 Cardinalis cedere potest iuri eligendi, & nihilominus facta cessione, se ad electionem concurrat, valide concurrat.
- 8 Cardinalis qui semel simoniacè aliquem elegit potest nihilominus ad nouam Pontificis electionem concurrere.
- 9 Pontificis eligendi potestas, an Imperatoribus, aut Regibus alijs concessa fuerit.

- 10 Pontificis eligendi potestas quomodo aliàs concessa fuerit Populo, seu Laicis.
- 11 Populus cur hoc tempore ad Pontificis Electionem non admittatur.
- 12 Cardinales quomodo Pontificem eligant cum ipsi potestatem Pontificiam non habeant.
- 13 Pontifex respectu Christi dicitur habere potestatem ministerialem, respectu vero hominum auctoritativam.
- 14 Electio indigni, an imputanda sit Cardinalibus, an Pontifici, qui Cardinalibus potestatem eligendi contulit.
- 15 Papam deponendi facultas, an competat Cardinalibus, sicut eisdem competit facultas eligendi.
- 16 Pontifex an possit Cardinalibus facultatem concedere deponendi alios Pontificis.
- 17 Pontifex potest formam eligendi prescribere, non autem facultatem deponendi alios Pontifices concedere.
- 18 Pontifex an possit se alieno Iudicio subijcere.
- 19 Pontifex an in causa hæresis deponi possit.
- 20 Pontifex an teneatur ex vi iuramenti servare ea, quæ dum Cardinalis erat simul cum alijs iuravit.
- 21 Pontifex an possit seipsum deponere, seu Papatui cedere.

V N I C A P R O P O S I T I O.

Elector Summi Pontificis hoc tempore debet esse Cardinalis, nec alijs sufficit :

Hæc propositio patet, ex cap. ubi periculum, de electione in 6. in Clement. ne Romani, de elect. & ex Bulla Gregorij XV. quæ incipit æterni Patris, & sic usu receptum est. Addo Cardinalem posse suffragium ferre, etiamsi vinculo censuræ detineatur, aut os clausum habeat, aut etiamsi iuri eligendi cesserit, modò tamen sacro Diaconatus ordine insignitus sit, ut constabit ex dicendis in illationibus, n. 4. & seqq.

Hinc sequitur, primò, eum qui Cardinalatus dignitate caret, care-
re etiam iure eligendi Pontificem, ius enim eligendi, est privilegium perfo-

personale Cardinalibus concessum ; priuilegium autem personale , personam non excedit.

2. Secundo sequitur Collegium Cardinaliū non posse quemquam , qui Cardinalis non sit , admittere ad eligendum , seu ad coeligendū . Ratio est , tum quia sic colligitur , *ex cap. licet , de elect.* ubi vetatur eum tanquam Papam recipi , qui à duabus ex tribus partibus Cardinalium electus non fuerit ; ergo suffragia Cardinalium tantummodo computari debent , non aliorum ; tum quia sacrum Cardinalium Collegium non potest Cardinalem creare : ergo neque potest quenquam ad eligendum admittere , cum Papa eligi tantummodo debeat à Cardinalibus .

Neque obstat dicere Cardinales posse compromittere in non Cardinales , præterea posse vices suas alteri delegare , consequenter etiam posse aliquem ad eligendum admittere . Respondetur enim Cardinales posse compromittere , nō in extraneos , sed in Cardinales , id sibi concedente Gregorio XV. & Urbano VIII. vt patebit ex dicēdis de electione per compromissum ; non tamen possunt vices suas alteri committere , & procuratorem cōstituere , vt bene Albanus *quest. 19.* & Azorius 2. p. lib. 4. cap. 2. *quest. 9.* consequenter multò minus possunt alium ad eligendum assumere .

3. Nisi fortè casus occurreret , vt omnes Cardinales vno excepto mortui essent , vel conclauī exiissent : tunc enim probabiliſimum est Cardinalem superstitem posse aliquem secum assumere ad eligendum ; tum quia hoc non aduersatur rationabiliter præsumptæ Summi Pontificis intentioni ; tum quia in *cap. ubi periculum , de elect.* Cardinalibus Sede vacante facultas datur faciendi ea , quæ conducunt ad obuiandum imminentibus periculis ; magna autem imminēt pericula , non facta Summi Pontificis electione , quæ maturiori iudicio expediri solet , nonnullis ad eligendum adhibitis , quàm ijs omnibus prætermiſſis : ita Gambara *de potest. legat. lib. 9. num. 140.* Decius Sebastianus Medices , & Salas quos retuli , *de legibus , disp. 1. q. 1. pūcto 3. n. 27.* Alij verò vt Albanus *quest. 25.* Azor. loco citato *quest. 11.*

Iaco-

Iacobatius *de Concilio lib. 1. art. 1. num. 230.* Sopranus *lib. 4. cap. 8. quæst. 5. dub. 3.* existimant in tali cunctu electionem pertinere ad Romanum Clerum, non excluso Cardinali superstite. Alij putant conuocandum esse Concilium Generale, à quo fiat electio: ita Decius *in cap. licet, de elect.* Azorius *loco citato*, & alij; nam Concilium Generale iurisdictionem Sede vacante in totam Ecclesiam habet.

Ex quo licet inferre quid faciendum esset, si Cardinales omnes, nullo superstite obijissent; & tunc temporis Apostolica Sedes vacaret; tunc enim congregandum esset generale Concilium ab eoque Pontifex eligendus, vel à Romano Clero: nam congruentior modus eligendi assignari non potest, nec Collegium Cardinalium est de iure diuino, ita Decius Medices, & alij quos retuli *de legibus loco citato*, quibus adde Imolam, & alios apud Albanum *quæst. 25.* & apud Iacobatium *de Concilio lib. 1. art. 1. num. 231. & lib. 6. art. 4.*

4 Tertiò sequitur Cardinalem cui os clausum fuit ante mortem Pontificis, posse suffragium ferre in electione Papæ, quia verè Cardinalis est, consequenter non caret præcipua Cardinalium facultate, quæ in Summi Pontificis electione consistit; tum quia ita declarauit Pius V. anno 1571. die 26. Ianuarij, vbi aduertit hanc oris clausuram inductam fuisse ad indicandam modestiam, qua Cardinales in consistorijs, & congregationibus præfulgere debent, ita Cardinalis Albanus *de Cardinal. quæst. 17. Aor. 2. part. lib. 4. cap. 2. quæstio 7.* Decius Iason, & alij apud Albanum *loco citato.*

5 Quartò Cardinalem censura aliqua obstrictum non repelli à suffragio actiuo, imò neque à passiuo; ratio est, tum quia hic est verè Cardinalis, tum quia sic declarauit Clemens V. *in bulla ne Romani, §. ceterum de elect.* Pius IV. *in Bulla in eligendis sub finem, vers. & ne dissensiones,* & Gregorius XV. *in Bulla æterni, §. volumus*, quam Summus Pontifex Urbanus VIII. perpetuò confirmauit.

6 Secùs dicendum est de Cardinali qui Sacro Diaconatus ordine nondum est insignitus; hic enim ad electionem nullatenus admittendus est, nisi speciale priuilegium habeat, ex Bulla Pij IV. *in eligendis*

eligendis §. *statuimus*, eius tamen votum, si ad eligendum admittatur, irritari non videtur.

7 Quintò, Cardinalem posse quidem iuri eligendi cedere, quia nullus suo priuilegio vti cogitur, nisi aliud publici boni necessitas, aut alia causa suadeat, nihilominus posse adhuc facta cessione validè eligere, quia ob huiusmodi cessionem, non amittit eligendi priuilegiũ: nam priuilegium per cessionem, vel renunciationem non amittitur, nisi renuntiatio acceptata sit à concedente, vel eius vices gerente, vt docui *de legibus*, d. sp. 1. *quæst.* 3. *puncto* 8. §. 4. cum Sanchez, Suarez, & alijs, quibus adde Hostiensensem, & alios apud Sopranum, *de elect. lib.* 4. *cap.* 5. *ad finem*, cõtra Martinum Laudenum, *tract.* 2. *de Cardin. quæst.* 37. vbi pro sua sententia refert Hostiensensem, & Io. Andream, & contra Manfredum *de Card. decis.* 298.

Contra dicta in hac prima conditione, multæ suboriuntur difficultates, tum ad probandum posse aliquem, qui Cardinalis non sit, Pontificem eligere, tum etiam ad ostendendum ipsosmet Cardinales non posse Pontificis electionem facere. Has & alias difficultates in subsequenti obiectionibus explicabo.

8 Obijcies ergo primò, Cardinalis qui semel simoniacè aliquem eligit, ipso facto absque declaratione priuatus remanet Cardinalatu, & alijs quibuscumque titulis, dignitatibus, & beneficijs; & nihilominus, si alium postea cum alijs legitimè eligat, videtur validè eligere; ergo ad validam Summi Pontificis electionem requiri non videtur, vt eligens sit Cardinalis: antecedens patet ex Bulla Iulij II. incipit, *Cum tam diuino*, ibi, *Cardinale*. verò, *qui cum sic simoniacè elegerint, à suis ordinibus, & etiam Cardinalatus titulis, & honore, ac quibuscumque Patriarchalibus, Archiepiscopalibus, Episcopalibus, & alijs Prælaturis, ac dignitatibus, & beneficijs, quæ in titulum, vel commendam tunc obtinebant, vel in quibus, seu ad quæ ius tunc habebant, absque alia declaratione priuati existant.*

Suarez *lib.* 4. *de simonia*. *cap.* 57. *num.* 57. Filiucius, & alij respondent hanc Bullam vsu receptam non esse, aut per constitutionem

Pij IV. incipit *in eligendis*, abrogatā fuisse: Sed hæc expensio rejicitur, & reprobatur, tū q̃a huiusmodi Bulla adhuc etiā vires & robur habet, teste Iacob. *lib. 4. de Concil. art. 4. n. 86. l. 1. § 2.* & alijs, tū quia enumeratur, & recensetur inter approbatas, vt patet ex Ceremoniali nuper edito, cōtinente ritus electionis Papæ, & ex Quarāta, Cherubino, & alijs, qui eam tanquam vsu receptam enumerant: neque reuocata fuit in Bulla Pij IV. quia in ea statutum tantummodo fuit, vt electoribus, aut electo opponi non possit excommunicatio, aut alia censura; nos autem non agimus de censura, sed de priuatione Cardinalatus.

Alij aliter respondent, sed aliorum respōsionibus omiſſis, ego respondeo, Cardinales, qui semel simoniace elegerūt, & alium postmodum eligunt, validè eligere. Primò, quia si infra terminum octo dierū, postquā requisiti fuerint ab alijs Cardinalibus non conscijs simoni- cæ labis, eisdem Cardinalibus se coniunxerint in pristino statu constituuntur, & ad Cardinalatum aliāsque dignitates eo ipso reintegrā- tur, & restituntur. Secundò quia Cardinalis non videtur priuatus Cardinalatu ante sententiam Iudicis, probabile enim est pœnam quæ actionem hominis ad sui executionem requirit, non incurri ante sen- tentiam Iudicis, etiamsi pœna hoc pacto lata sit, vt incurratur absque alia declaratione, hæc enim loquendi forma non excludit sententiam criminis declaratoriam, sed declaratoriam pœnæ: ita Sanchez, Salas, Graffius, & alij quos retuli *de legibus d. sp. 1. quæst. 1. p. 7. §. 2. num. 16. 9* Obijcies secundò, Adrianus Primus congregata Synodo 153. Episcoporum, Abbatum, & Religiosorum potestatem Carolo Magno Pipini filio dedit, Pontificem eligendi, Sedem Apostolicam ordi- nandi, & inuestituram Episcopis concedendi, *cap. Adrianus dist. 63. & cap. in Synodo eadem distinctione*, vbi consimile priuilegium Othoni concessit Leo VIII. Ergo facultas eligendi Pontificem non solum ad Cardinales, verum etiam ad Imperatorem pertinet, & isti testus, seu priuilegia, tanquam vera admittuntur à Iacobatio, Albano, & alijs; quia verisimile non est, fictitium & commentitium esse, quod Ecclesia quingentis annis pro vero & legitimo habuit.

Respon-

Respondent primò Baronius circa annum 526. & præsertim anno 774. à num. 10. & 964. à num. 22. Suarez tract. de fidei defensione lib. 3. cap. 29. num. 7. Iacobus Gretserius in Apo'ogia Baronij cap. 1. & 2. Azorius 2. part. lib. 4. cap. 2. quæst. 3. & alij à quibus non dissentit Cardinalis Bellarminus de Summo Pontifice, lib. 2. cap. 29. & de Clericis, cap. 9. præfatostextus fictitios, & commentitios esse, & primum ipsorum Auctorem fuisse Sigibertem Monachum, à quo Gratianus hoc mutuauit, & ideò deceptus fuit. Idem à fortiori dicendum est de alijs, quæ ab aliquibus asseruntur concessa Imperatoribus ad eligendum, vel confirmandum Papam; nam huiusmodi indulta sunt apocripa, & ficta, vt docet Baronius locis citatis, & præsertim *tomo 11. anno 1059. num. 31.*

Respondent alij secundò Carolum Magnum non acceptasse, sed potius repudiasse huiusmodi priuilegium, alioquin Stephanus Papa, qui post Leonem successit ab ipso electus fuisset, vide Albanum de Cardinal. quæst. 11.

Respondent alij tertio hoc priuilegium à successoribus repudiatum fuisse, vt patet ex cap. ego Lodouicus 63. dist. ita Azorius 2. parte lib. 4. cap. 2. quæstio 2. & 3. Gondislaus Villadiego de orig. & potest. Card. quæst. 5. num. 18. Albanus loco cit.

Respondeo ergo quartò, priuilegium Caroli Magni fuisse personale, & consequenter extincta persona cui concessum fuerat, cessasse; Priuilegium verò Othonis fuisse quidem reale, sed postea reuocatum fuisse: nam huiusmodi priuilegium concessum fuerat per modum aduocationis, & defensionis in vtilitatem Ecclesiæ; priuilegium autem aduocationis, & defensionis reuocari potest à concedente, quoties ei visum fuerit, cum respiciat potius commodum concedentis, quam priuilegiarij.

Respondeo quintò, huiusmodi priuilegia reuocata fuisse, vt patet *expressis quinque capitibus 63. dist.* nam priuilegium licet reale, & concessum in remunerationem, & per modum contractus, reuocari potest, dum iusta superuenit causa reuocandi, vt patet ex dictis de priuilegijs,

uilegijs, & in *Bulla Cœna Domini* disp. 1. *quest.* 21. *sub finem* : legitimum autem extitit causa reuocandi hæc priuilegia, tum quia laici priuilegio abutebantur, cum postmodum vellent propria auctoritate interesse, nec recognoscerent priuilegium sibi ab Ecclesia collatum fuisse; tum quia promoueri sæpe curabant eos, qui corruptis erant moribus, relictis ijs, qui magna vitæ integritate ornati erant; tum quia in promotionibus simoniaca labes grassabatur; tum quia sua, vel suorum Legatorum præsentia, schismata faciebant potius, quàm extinguabant. Vide Suarez *loco statim citando*. Baronium anno 502. Azorium *cap.* 2. Sopranum *lib.* 2. *cap.* 7. & alios præcitatos Doctores.

Respondeo sextò Reges, & Imperatores, antiquis temporibus non elegisse propriè loquendo, sed nominasse, præsentasse, vel confirmasse, & postea Pontificem ab Ecclesiasticis absolutè electum fuisse, electio enim propriè loquendo est actus Ecclesiasticæ potestatis; præsentatio verò, & nominatio, potest esse actus ciuilis, sicut etiam erat illorum Regum confirmatio, Electio enim Ecclesiasticorum non absolutè fiebat, sed quasi suspendebatur, donec Imperator consensum, seu confirmationem præberet; & accedente illius confirmatione, electio ab Ecclesiasticis absolutè fiebat. Non nego tamen quin Laici possint de absoluta Papæ potestate, eligere electione propriè accepta, sicut etiam de *Censuris quest.* 1. *puncto* 2. *num.* 4. docui ex eadem potestate posse censuras ferre; tum quia nulla assignari potest implicancia; tum quia non minus spirituale est ius arcendi aliquem à cōmunionem fidelium, quàm admittendi aliquem ad Ecclesiasticam dignitatem; tum quia inde præiudicium Ecclesiæ non infertur, cum Laici id non agant proprio iure, seu ex iure ordinario; sed ex commissione, seu facultate delegata dependenter ab Ecclesia, vt bene Suarez in *tomo de fidei defensione*, *lib.* 3. *cap.* 29. *num.* 7. & seq. Sopranus de *elect. Papæ*, *lib.* 1. *cap.* 4. & alij quos retuli, *quest.* 14. in *expositione Bullæ Cœnæ*.

10 Obijcies tertio, non solum Imperator, vel eius Legatus assiste-
bat electioni Papæ, verum etiam Populus vnà cum Clero semper inter-
fuit

interfuit electioni Papæ, & consensum præbuit electioni Episcoporum & Sacerdotum, ut colligitur ex *Canone sacrorum, dist. 63.* Ego falsum videtur electionem Papæ ad solos Cardinales pertinere; Bellarminus *lib. 1. de clericis, cap. 11.* Azorius *2. part. lib. 4. cap. 5. quæsto 2.* & alij cum sancto Chrysostomo *lib. 3. de Sacerdotio*, docent populum per usurpationem se ingessisse in electionibus Sacerdotum. Idem probat Suarez *in tomo de fidei defensione, lib. 3. cap. 29. num. 7.* Ego verò respondeo primò, populum nunquam electioni interfuisse, ut verè & propriè eligeret, modò loquamur de electione propriè accepta; non verò de facta per usurpationem: nam ipsi interdicta erat electio in Concilio Laodicensi primo, in Concilio Martini Papæ, in Niceno XI. & in octauo generali Constantinopolitano; populus enim electioni assistebat, non ad verè & propriè eligendum, sed ad petendum, ad proponendum, ad testimonium ferendum de vita & moribus eligendi, ac denique ad præstandum consensum, & licet alicubi habeatur elegisse; nihilominus non verè, propriè & positivè elegit, cum electio sit actio Ecclesiastica, competens Ecclesiasticis personis, sed negativè quatenus non impediabat electionem suo testimonio, nec quidquam obijciebat, aut quatenus personam proponebat, in eam consentiebat, & acquiescebat electioni, *cap. nullus, 61. cap. cleri, & cap. vota, 63. dist.* ob id verbum eligere, aliter accipitur de Ecclesiasticis, aliter de populo, etiamsi in eodem verborum contextu adhibeatur, sicut sanitas aliter accipitur de pulsu, aliter de medicina, aliter de habitu, aliter de homine, sicut etiam Pilatus, turbæ, Sacerdotes, & milites Christum crucifixerunt, sed non omnes eadem ratione.

Hinc conciliari possunt Patres, quorum alij, ut Adrianus *in 8. Synodo*, prohibent Principes, Laicos immiscere se electioni, alij verò, ut Stephanus Papa *in cap. quia sancta 63. dist.* decernunt Papam creandum esse concurrentibus Episcopis, Clero, & populo; illi Patres intelliguntur de electione propriè accepta, isti de postulatione, testificatione, & consensu, ut bene Bellarm. *lib. 1. de clericis.* Azorius *locò citato, quæsto 4.* Sopranus *lib. 1. cap. 5. S. 2. & alij.*

11 Hoc tamen tempore populus ad electionem non admittitur, propter incommoda, quæ ex ipsius præsentia sequi possent: Populus enim antea admittebatur ad seditiones, & schismata vitanda, postmodum verò experientia docuit periculum seditionum, & schismatum ex præsentia populi imminere: præterea populus ex facultate Ecclesiæ adhibebatur ad proponendum, & testificandum, ad consensum præstandum, ad defendendum electum, postea id ex proprio quasi iure sibi competere prætendebat, in electione ipsa se immiscebat, & facultate sibi concessa abutebatur, vide Bellarm. lib. 3. de Sacerdotio. Azorium cap. 2. quæsto 2. & 4. Tuscum tom. 2. concl. 57.

12 Obijcies quartò, nemo dat quod non habet, sed Cardinales nō habent in se Pontificiam dignitatem: ergo neque eam dare possunt Papæ per electionem. Respondent nonnulli DD. Cardinales non habere Pontificiam dignitatem actu, sed habitu, & virtute. Alij respondent Cardinales nominare, & designare personam, cui postea à Christo Pontificia dignitas confertur, ita Suarez de fidei defensione, lib. 4. cap. 6. num. 7. alij aliter respondent; sed ipsorum responsiones mihi non probantur; nec operæpretium censeo in ipsis refellendis immorari, cum videri possint apud Albanum. quæst. 22. apud Azorium c. 2. quæsto 14. & apud alios DD. qui de hac re ex professo tractarunt. Ego igitur respondeo Cardinales non dici propriè dare, vel conferre Pontifici potestatem, quia nemo dat quod non habet, neque dici solum nominare, præsentare, vel designare personam eligendam, cum iuxta communem loquendi vsum dicantur Papam eligere, seu creare; dicuntur ergo propriè loquendo eligere, quia Pontificiam dignitatem per electionem tali personæ vniunt; nam qui duo coniungit, dicitur efficere id quod ex utroque resultat; ob id sol & homo dicuntur hominem generare, quatenus sua actione attingunt vniōnem corporis ad animam; & Comes Palatinus ab Imperatore constitutus, cum facultate creandi Doctores, potest Doctorem facere, etiā si forte ipse Comes Palatinus Doctoratus laurea insignitus non sit; & Sa-

Sacerdos dicitur gratum facere quem absoluit, licet ipse in gratia. Deitunc temporis non existat, vt bene argumentatur Sopranus *lib. 1 cap. 12*. Non tamen hinc sequitur Cardinales debere in se potestatem Pontificiam habere, vt eam alteri conferant, quia id non agunt auctoritatiuè, principaliter, & propria virtute, sed ministerialiter, & auctoritate sibi delegata, immediatè à Sede Apostolica, cui à Deo collata est potestas.

13 Dices primò, Sedes Apostolica, seu Pontificatus non est potestas principalis, & auctoritatiua, sed ministerialis, cum Christus sit caput super omnem Ecclesiam, *Ephes. 1.* & caput omnis Principatus, & potestatis, *ad Colossenses 2.* Papa verò sit minister, iuxta illud Apostoli, *Sic nos existimet homo, vt seruos, & ministros Christi*; ergo Cardinales non eligunt auctoritate sibi delegata à Papa.

Respondeo Pontificem dupliciter considerari posse. Primò respectu Christi, secundo respectu hominum quibus præest: si consideretur respectu Christi, ipsius potestas est ministerialis, cum à Christo omnis Ecclesiastica potestas pendeat; si consideretur respectu hominum, ipsius potestas est auctoritatiua, nullamque aliam in terris superiorem agnoscit, vt patet ex dictis *de Incarnatione*, dum loqueretur de Christo capite. Hinc refelli potest Hæreticorum error, afferentium Pontificatum subijci Ecclesiæ vniuersali, eò quòd potestatem ministerialem, non verò auctoritatiuam habeat, refellitur enim præfata distinctio.

14 Dices secundo, si Cardinales ministerialiter eligunt; ergo datur alius, nempe Papa, vel Deus, qui principaliter agit; consequenter si eligatur indignus, electio indigni principaliter nō imputabitur Cardinalibus eligentibus, sed alteri. Si dicas ipsi Pontifici non imputari, quia Pontifex indigni electionem vetat. Contra arguitur, hinc sequi electionem indigni inuolidam esse, vtpote factam contra prohibitionem, seu mandatum Papæ; cum enim Cardinales ministerialiter agant, tanquam Mandatarij, non possunt formam mandati & facultatis sibi præscriptæ excedere: nam quæ Mandatarius ultra man-

B dati

dati formam agit, inualidè agit, *l. diligenter. ff. manaati.*

Respondeo dari alium qui principaliter eligit, & cui Pontificis electio principaliter imputatur, nempe Pontifices, qui Cardinalibus potestatem eligendi concesserunt, & Christum, qui posita designatione, seu electione istius personæ Pontificiam tribuit potestatem; non tamen hinc sequitur malam designationem, seu electionem indigni quoad culpam, tribui Pontificibus aut Deo; tum quia à Deo tantum permittitur, & non impeditur, quatenus dat potestatem, quæ electores malè vtuntur; tum quia ista facultas eligendi, non habet propriè rationem mandati, neque data est ad eligendum hunc in particulari, sed simpliciter ad eligendum, relicta, seu permissa electoribus libertate eligendi quem velint; iniuncto tamen ipsis præcepto eligendi dignum: expediebat enim hanc libertatem ipsis permitti, alioquin dubium semper in Ecclesia extitisset de vero Pontifice, & de actibus ab ipso præstitis, consequenter electio indigni non est irrita, neque imputatur Christo, aut Pontifici qui eam in particulari non intendunt, sed dignis de causis permittunt; sicut peccatum non imputatur Deo, licet etiam ipse principaliter tanquam causa vniuersalis ad illius actum concurrat, vt patet ex dictis *de peccatis*. Item absolutio Sacramentalis, seu baptismi administratio indignè, sacrilegè, & culpabiliter facta à sacerdote valida est, secluso defectu substantiali; & tamen illa actio principaliter Christo tribuitur, sed ipsi ad culpam non imputatur.

Rursus matrimonium à Procuratore nomine Titij celebratum, iniuncto illi onere vt illud celebret præmissis denunciationibus validum est, etiamsi procurator denunciations prætermittat, & contra præceptum, non solum Concilij Tridentini, verum etiam Titij faciat, vide quæ tradidi *de leg. disp. l. quæst. l. puncto 7. §. 5. num. 17. & seqq.*

15 Obijcies quintò, si Cardinales potestatem haberent eligendi, aut creandi Pontificem, potestatem etiam haberent deponendi; nam quæ sunt principia generandi, sunt quoque principia corrumpendi,

c. omnis, de regulis iuris, & res per quas causas nascitur, per easdem dissolvitur; *c. omnis 27. quest. 2.* & sicut homo generat hominem, ita etiā potest occidere, & destruere: & sicut cōtractus mutuo consensu perficitur, ita etiā dissolvitur; sed falsum est Cardinalibus facultatem deponendi Pontificem competere: ergo etiā falsum videtur ipsos posse Papam eligere & creare. Respondeo negando sequelam maioris propositionis, falsū enim ex potestate eligendi Pontificem, arguitur potestas illum deponendi. Ratio est, tum quia Cardinales non eligunt auctoritative, sed ministerialiter, auctoritate sibi à Papa concessa; consequenter excedere nequeunt facultatem sibi concessam, ipsis autem non est concessa potestas deponendi Pontificem; tum quia falsum est generaliter loquendo, res per quas nascuntur, per easdem dissolui: nam votum propria voluntate contrahitur, sed sola voluntate non tollitur, & nodus ab vno perficitur, à quo explicari, & dissolui aliquando nequit, & sic de cæteris; tum quia Papatus est dignitas, & potestas, alias longè superans & excedens; potestas autem quæ alias superat, & excedit, non potest inferiori subijci, imò persona ipsa in qua talis dignitas reperitur, etiamsi secundum se spectetur, inferiori subijci non potest: omnis enim forma suum effectum tribuit subiecto in quo recipitur; sed Papatus est forma, seu dignitas, & potestas omnes alias superans & excedens; ergo reddit personam in qua existit, super omnes dignam, & ab omni alia exemptam; ergo Papa à Cardinalibus, vel ab alijs deponi non potest, ijsque non subijcitur.

Neque obstat dicere, non dedecere Papam, ut dicit hanc personam, præcisè subijci Cardinalibus, aut Generali Concilio, dedecere verò si spectetur hæc persona Pontificia dignitate prædita; nam in Papatu tria distingui possunt, primum est Papatus, id est, Pontificia dignitas; secundum est persona ipsa præcisè spectata, sine Pontificia dignitate; tertium est persona ipsa cui Pontificia dignitas adhæret. Respondetur enim etiā personam Pontificis præcisè spectatam alijs subijci non posse, quia illa abstractio est conceptus mentis, & sit per

intellectum, & ipsa persona à parte rei exempta est, quia Pontificia dignitas effectum suum formalem tribuit subiecto cui inhæret.

16 Rogabis primò, vtrum Pontifex possit facultatem deponendi alios Pontifices Cardinalibus tribuere. Respondeo negatiuè, quia par in parem non habet imperium, *l. nam magistratus, ff. de recept. arbit. cap. inferior, cap. denique 21. distinet.*

17 Ex quo patet differentia inter potestatem eligendi, & potestatem deponendi alium Pontificem, quòd Papa potest statuere formam eligendi, & potestatem eligendi conferre ex communi Doctorum sententia, quia hoc pacto agit circa Electores, electionem, & eligendum; quæ omnia præcedunt Põtificem: omnia enim fiunt antequam Pontificatum obtineat, & causa suum effectum præcedit, secùs dic de potestate deponendi, vt probatum fuit.

18 Rogabis secundò. Vtrum Papa possit se ipsum alieno iudicio subijcere. Respondent aliqui Doctores posse quidem in ijs, quæ ad animæ salutem pertinent, se ipsum quoad personam subijcere, vt in foro Sacramentali, in quo se subijcit Confessario, vt absoluator; alioquin dignitas, quæ ipsi in fauorem collata fuit in odium verteretur; non verò posse in alijs, quæ ad animæ salutem non spectant, alieno foro se subijcere, tum quia dedecet supremum, superiorem ab alio iudicari; tum quia maiestas Summi Pontificis diminui non debet; tum quia licet Papa in causa hæresis à Concilio iudicetur, id non fit ex humana concessione præcisè. Alij verò arbitrantur Papam, non vt Papam, sed vt personam cui Papatus adiunctus est, posse se ipsum alijs subijcere, non solum in foro Sacramentali, verum etiam forensi (salua tamen semper Sedis Apostolicæ reuerentia, & modò illi quibus se subijcit, purè Laici non sint.) Ratio est, tum quia id non vergit, in diminutionem maiestatis, sed ad illam augendam, & amplificandam facit, vt Papa innocentiam suam probet; vel si peccauit, poenam suorum peccatorum subeat; tum quia id fecit Marcellus Papa, *cap. nos si in competentem 2. quæst. 7.* hic enim se iudicio Concilij à se congregati subiecit, licet Concilium non admiserit concessionem sibi

sibi à Marcello factam; tum quia illa regula iuris habens potestatem à Principe, non potest ea uti contra Principem, *cap. inferior, de maior. & obed.* cum similibus, intelligi debet, non posse dici potestatem uti cum detrimento Principis, vel contra ipsius voluntatem; tum quia Papa, sicut se quoad personam subijcit Confessario, Medico, Chirurgico, ita etiam subijcere se potest iudiciali foro, tum quia Papa, cui adhuc superstites sint parentes, in sententia nonnullorum Doctorum subijcitur parētibus quoad honorem, & obligationem illis subueniendi: parentes enim suo iure non priuantur, ob assumptionem filij ad Pontificatum: quanquam glossa in *extrauag. execrabilis, de prae-bend. inter extrauagantes Ioannis 22. & Azor. 2. part. lib. 4. cap. 3. quæstio 2. vers. Vndecimum*, & alij putant Cardinales, & multò magis Papam, afflictione Cardinalatus, vel Papatus ab omni patria potestate eximi; ergo &c. ita Panormitan. & Ioannes Andreas in *cap. Ecclesia sancta Maria de constitut.* Sopranus *lib. 1. de elect. cap. 18. §. 5.* & alij apud Azorium *2. part. lib. 4. cap. 7. quæst. 6.* apud Salmeronem *tom. 1. 2. tractat. 17.* & apud Iacobatium de Concilio *lib. 6. art. 14.* vbi de hac re fusè differit.

19 Hinc à fortiori sequitur, Papam quoad personam in causa hæresis, à Concilio iudicari posse; tum quia Christus hanc potestatem contulit, volens eum quem super familiam suam constituit, in hac tantum causa per Concilium iudicari: tum quia Pontifex in hoc cōsentit; dum enim post electionem & consecrationem spondet se Canones & statuta diuinum ius continentia seruaturum, eo ipso consensum præstat, ut si in hæresis crimen incidat, à Concilio iudicari possit, ita Azorius *2. part. lib. 4. cap. 7. quæstio 2.* & alij. Verùm quid ego in præfato dubio, & in causa hæresis sentiam, patet ex dictis in *Bulla Coena, disp. 1. quæst. 2. puncto.... num. 12.* vbi plures Doctores pro mea sententia retuli, quibus adde S. Thomam Panormit. Turrecrematam, & alios apud Azorium *2. part. lib. 4. cap. 7. quæst. 8.*

20 Rogabis tertio, vtrum Papa teneatur vinculo iuramenti, quòd Cardinales sibi mutuò extorquent, iurantes, se adepto Pontifica-

tu,



tu, non vsuros potestate Pontificia, tali, & tali occasione; vt si iurent se neminem canonizatu-
 ros, nouas religiones non approbatu-
 ros, bona non alienatu-
 ros, aut similia sine consensu Cardinalium non
 acturos. Respondeo Pontificem ligari vinculo iuramenti, vt patet
 ex dictis de legibus; nam obligatio iuramenti oritur ex iure diuino,
 aut etiam ex naturali. Hoc tamen intelligitur, modò iuramentum
 non cadat in materiam illicitam, vel indifferentem, quæ alterius
 commodum non spectet, vel super omissionem contrariam diuino
 cultui, aut animarum saluti, cuiusmodi est iuramentum de nullo in
 Sanctorum numerum cooptando, de non approbando de nouo vlla
 religione, de non excommunicando vllò Principe, & similibus. Vi-
 de quæ tradidi de iuramento in tractatu de legib. & præterea Andr.
 Barbatiam tom. 1. consil. 1. Petrum Ancharanum consil. 269. Iacobatium
 lib. 7. de Concilio, art. 5. Albanum de Cardinalibus quaest. 36. Sopra-
 num de elect. cap. 18. §. 4. & Azorium tom. 2. lib. 2. cap. 5. quæst. 10. quo-
 rum nonnulli asserunt, Pontificem huiusmodi iuramento non ligari,
 quia Pontificiæ auctoritati aliqua in parte derogat. An autem Papa
 possit sibi iuramentivinculum relaxare, aut alteri, qui secum dispen-
 set, facultatem concedere, patet ex dictis de excommunicatione,
 quæ ob alienationem bonorum Ecclesiasticorum contrahitur in lib.
 variar. tractationum, de iuramento, & de dispensationibus in tract. de legi-
 bus.

Rogabis quartò, vtrum Papa possit seipsum deponere, seu Pa-
 patum à se abdicare, seu Papatui cedere.

Respondeo primò, non posse cedere, & renunciare per modum
 resignationis propriè acceptæ, quia Papa in terris superiorem non
 habet, resignatio autem propriè accepta, fit in manibus superioris,
 ob id, viuente Paulo IV. in controuersiam vocatum fuit, an valida
 esset cessio Imperij, qua Carolus V. Imperium fratri Ferdinando in-
 consulto Papa cesserat.

Respondeo secundò, non posse seipsum deponere, seu cedere iu-
 dicialiter per modum depositionis; tum quia depositio fit auctori-
 tati,

tiuè, & cum iurisdictione superioris, Papa autem non habet superiorem; tum quia nemo in seipsum iurisdictionem exercere potest, nullus enim imperium in se ipsum habet.

Respondeo tertio, Papam posse Papatui cedere, per modum simplicis renunciationis, abdicando à se potestatem iurisdictionis per actum voluntatis sufficienter expressum, & à Cardinalibus acceptatum. Ratio est, tum quia sicut Papatus obtinetur consensu in electionem, ita amittitur dissensu sufficienter manifestato, & acceptato: res enim per quas causas nascitur, per easdem dissolvitur, nisi res in alterius potestate constituto sit, aut alterius sit quæsitum, ut in voto, & similibus, iuxta dicta *num. 15.* tum quia Celestinus Papatui cessit; tum quia sic sancitum fuisse à Bonifacio VIII. patet, *ex cap. 1. de renunciatione in 6.* Ita communiter Doctores apud Iacobatium *lib. 6. art. 14. de Concilio*, apud Ægidium Columnam *in tract. de renūciat. Papat.* apud Parisium *de resignat. lib. 2. quæst. 1. num. 4.* apud Albanum *de Cardinal. apud Soprano lib. 1. de elect. cap. 18. §. 3.* Imò Caietanus existimat Papam posse Papatui renunciare, etiam sola sua voluntate; idem sentire videtur. Azor. *2. p. lib. 4. cap. 6. quæst. 2.* & Iacobat. *lib. 6. art. 14. n. 13.* Sed contrarium verius est, ut patet ex prima ratione tertiæ propositionis, & docet idem Azor. *c. 7. quæst. 6. sub finem.*

His præmissis nonnullæ adhuc difficultates emergunt, quarum solutio non leuiter conducit ad cognoscendam Cardinaliū facultatem circa Romani Pontificis electionem, eas autem in quæsitis proximè sequentibus proponam, diluam, & dissoluam.

§. I.

Quinam Cardinalium nomine veniant, & cur Cardinales hoc nomine vocentur.

S U M M A R I U M.

- 1 Cardinalium nomine quinam veniant.
- 2 Cardinales cur hoc nomine vocentur.

3 *Cardinalatus non solum est nomen dignitatis verum etiam officij.*

PRIMA PROPOSITIO.

1 **N**omine Cardinalium, si loquamur iuxta communem loquendi formam hoc tēpore vsu receptam, intelligo solum Præsules R. E. purpuratos, consilij Summi Pontificis assistentes, & ad Papæ electionem deputatos, vt omnes norunt, isti enim hoc tempore per antonomasiam Cardinales vocantur; aliàs verò etiam in iure Canonico Cardinales vocabantur, alij Clerici, qui suo Præsuli aderant, illumque suo consilio iuuabant in administratione diœcesis, vel prouinciæ; ob id Canonici Ecclesiarum Cathedralium Mediolanen. Rauennaten & nonnullarum aliarum, Cardinales vocabantur; & dum Iura Cardinalem Romanum singulariter nominant, semper addunt Sanctæ Romanæ Ecclesiæ, ad distinctionem eorum, qui Cardinales aliàs nuncupabantur.

SECUNDA PROPOSITIO.

2 **C**vr hoc nomine Cardinales vocentur à Doctoribus, rationes assignantur; aliqui enim putant, Cardinales hoc nomine vocari, eo quòd Apostolicæ Sedi inseruiant, quæ est veluti cardo, & axis aliarum Ecclesiarum. Alij etymologiam sumunt à cardine, eo quòd super ipsos nitatur, & vertatur ostium, id est Papa: vel, vt alij volunt, à cardine, eo quòd ipsis summa rerum omnium grauiorū totius prouinciæ, vel diœcesis incumbat; ad hoc enim ab initio institutos fuisse putant Cardinales. Alij denique arbitrantur dici à cardine, eo quòd vtrumque cardinem, vitæ scilicet, & interitus custodirent, & quasi ad ostium adstarent, dum homines ad vitam ingrederentur, vel ex hac vita egrederentur: Cardinales enim ex prima sui origine instituti fuerunt ad baptizandos infantes, qui in hanc lucem educuntur, & ad sacramenta ijs administranda, qui ex hac vita migrant,

grant, teste Archidiacono in cap. ubi periculum de elect. in 6. & alijs apud Barbatiam de præstant. Card. quæst. 1. Albanum de Card. quæst. 3 & apud Sopranum de elect. lib. 1. cap. 10. præcipuum enim in Ecclesia munus fuit Baptismi Sacramentum conferre, quod est ostium Sacramentorum; Christus enim Apostolis dixit, *Euntes docete omnes gentes baptizantes, &c.* & hoc munus tanti fiebat, quanti est vitam bene instituire, illamque sancto fine claudere.

Hinc ortæ sunt dissensiones, & hæreses in Ecclesia, dum vnus potius ab vno quàm ab alio sibi Baptismum conferri curaret, ac si non idem effectus ab omnibus conferretur. Hinc etiam cenſeo varios Cardinalium titulos institutos, vt vnus Cardinalis in vna vrbs regione, alius in alia adesset, ad sacra ministranda, & ad pandendum ostium, qui Christus est, in Ecclesiam militantem, & triumphantem; quamuis postea Cardinalium onera, & munera variata fuerint, & præsertim ad consilia Papæ adhiberi cœperint.

3 Ex quo licet inferre Cardinalatum in prima sui institutione, non solum esse dignitatem, vt aliqui arbitrantur, verum etiam officium, cui semper annexa fuit dignitas; nam dignitas secundum se est qualitas, seu conditio cui debetur honos, siue hæc conditio, seu qualitas fundetur in sanguine, siue in meritis, siue in Principis priuilegio; officium verò significat munus ad opus aliquod præstandum; quod si opus honorificum sit, vocatur dignitas; si sordidum, vel indifferens, non est dignitas; vide Cardinalem Tuscum concl. 7. Alban. de Cardin. quæst. 6. Azorium 2. p. c. 1. quæst. 8. & Sopranum loco citato. Martinum Laudensem de Cardin. tract. 2. quæst. 17. Andreæ Barbatiam de præstant. Card. q. 1. num. 11. & 33. & Iacobat. de Concilio lib. 1. art. 1. num. 246. & lib. 3. art. 1. num. 76.

S. I I.

A quonam Cardinales instituti fuerint, & ad quem creatio Cardinalium pertineat.

S V M M A R I V M.

- 1 Cardinales à quonam primò instituti fuerint.
- 2 Cardinalibus Regia quæst dignitas competit.
- 3 Cardinalium creatio ad quem pertineat.

P R I M A P R O P O S I T I O.

1 **H**ic loqui possumus de Cardinalibus in genere, vel de Collegio Cardinalium; si loquimur de Cardinalibus in genere, qui ab initio instituti fuerunt ad custodiendum introitum, & exitum hominum, vt dictum est §. *precedenti*, nihil certi definiri potest, quia nullus rerum antiquarum Scriptor, & Historiographus de ipsorum origine mentionem fecit, & nulli fides adhibenda est, nisi vel ipse audierit, vel Auctorem referat, à quo audiuit, & qui cõsuli possit: quanquam aliqui putant Cardinales à Marcello *sub annum Christi* 314. Alij à Pontiano *c. circa annum* 360. institutos fuisse. Alij aliter sentiunt; vide Manfredum *de Cardinal. decisione* 78. Albanum *de Cardinalibus, quæst.* 234. Turrecrematam *in Clement. ne Romani. Barbatiam in tract. de præstantia Cardin. quæst.* 1. Martinum Laudensem *quæst.* 27. & Iacobatium *de Concilio lib.* 1. *art.* 1. *num.* 245. *in tractatibus* tomo 13. *part.* 10. Si verò loquamur de Collegio Cardinalium, seu de augmento, & dignitate Cardinalium S. R. E. probabilissimum censeo id à Syluestro Papa factum fuisse; ratio est, tum quia persecutorum rabies Constantino regnante cessare cœpit, & Papa Collegiũ Cardinalium qui sibi à consilijs starent, & rebus magni momenti definiendis ex officio præessent, sibi assiscere, & deligere potuit; tunc enim primũ causæ grauiores omnium Ecclesiarũ ad Sedem Apostolicam liberè deferri cœperunt; tum quia Papa obtenta Vrbe à Constantino, & translatis Constantinopolim maiori ex parte Senatoribus,

bus, par fuit, vt sacrum Collegium Cardinalium institueret, vt sicut Senatores Imperatori assistebant, ita isti Papæ adessent, & controuersijs definiendis operam darent, ob id Collegium Cardinalium facer Senatus in iure nuncupatur.

Ex quo patet, probandam non videri opinionem illorum apud Albanum *quest. 5.* qui arbitrantur Papam, semper habuisse Cardinalium cœtum, quamuis enim Papa modò opera vnius, modò alterius vteretur, non tamen hinc sequitur Cardinalium cœtum ipsi adfuisse, sed certo astantium cœtu, & Collegio indiguissse, quod Collegiū non solum ipse instituit, verum etiam pluribus auxit, & amplificauit, & in cap. *Præsul. 2. quest. 5.* statuit, vt Præsul non damnetur nisi cum 72. testibus, Presbyter Cardinalis, nisi cum 44. Diaconus verò Cardinalis vrbis Romæ, nisi cum 27. Alij subsequentes Pontifices nouis priuilegijs sacrum Collegium locupletarunt, Innocentius I V. Galerum rubrum tribuit, illūque deferri iussit. Paulus II. habitus purpurei delationem præcepit ad indicandam Regiam dignitatem qua Cardinales gaudent; purpura enim olim utebantur Reges, Imperatores, & ij qui Regibus, vel Imperatoribus consanguinitate, affinitate vel necessitudine proximè accedebant.

2 Cardinalibus Regiam quasi dignitatem competere colligitur, tum ex cap. *felicis, de pœnis in 6.* vbi inferentes iniuriam Cardinalibus tanquam rei lesæ Maiestatis puniuntur; tum quia sunt veluti vnum corpus cum Summo Pontifice, cuius corporis caput est Summus Pontifex, Cardinales membra: perspicuum autem est Summum Pontificem Regia, & Imperiali dignitate frui, tum quia ita sentiunt Iason. l. centurio, ff. de vulgar. & pupillar. institutione. Card. Iacobatius de Concilio lib. 1. art. 1. num. 264. Barbatius de Cardin. *quest. 1. num. 24.* Albanus de Cardin. *quest. 6. & 42.* Azorius 2. part. lib. 4. cap. 3. *questio 18. & 20.* Tuschus tom. 1. lit. C. concl. 99. & seq. Sopranus lib. 1. cap. 10. §. 2. ad finem. Martinus Laudensis de Cardin. q. 7. & 40. Manfredus decis. 19. & seqq. & alij communiter.

S E C V N D A P R O P O S I T I O .

3 **C**reatio Cardinalium pertinet ad Papam, non ad alios; ratio est, quia nullibi reperitur hanc facultatem alijs concessam fuisse: ex quo sequitur primò Cardinales, seu Cardinalium Collegiū non posse Cardinalem creare, quamuis enim ius habeant eligendi Papam, non tamen potestatem habent creandi Cardinales; & à disparatis, & diuersis non valet illatio, *leg. Papinianus exuli, ff. de minor.* Secundò sequitur Concilium Generale nō posse creare Cardinales, vt patet ex ratione proximè allata; nisi fortè Concilium Generale auctoritate Papæ, cum huiusmodi facultate congregatum sit, ita Azorius 2. *part. lib. 4. cap. 1. quæsto 7.* contra Iacobatium *de Concilio lib. 6. art. 7. quæst. 1.* & Manfred. *de Card. decis. 386.*

Rogabis vtrum Papa, absque Cardinalium assensu Cardinalem creare possit. Respondeo affirmatiuè, tum quia institutio Cardinalium est de iure humano, cui Papa ex vi coactiua non subijcitur; tum quia Papa potestatem suam à Christo immediatè habet, non ab homine; vsu tamen receptum est, vt Papa neminem ad Cardinalatus apicem promoueat, re Cardinalibus non communicata, creatio enim Cardinalium res magni momenti est, Papa autem res magni momenti absquē Cardinalium consilio expedire non solet, & cū ipse homo sit, aliorum consilio indiget, non verò consensu ad valorem actus, ita Felin. *in rub. de constit. & alij apud Azorium loco citato, & cap. 3. quæsto 19.* & apud Albanum *de Card. quæst. 39.* contra Baldum Archidiaconum, & alios apud præcitatos Doctores, & apud Barbatium *conf. 40. tom. 4.* apud Martinum Laudens. *de Cardin. quæst. 2. tract. 1.* & apud Manfred. *cap. 13.*

§. I I I.

A quonam Cardinales acceperint potestatem eligendi Papam,
& quando nam eligere incœperint.

S V M M A R I V M.

1 Cardinales à quonam facultatem eligendi Pontificis acceperint.

2 Apr.

- 2 *Apostoli quomodo Petrum in Pontificem elegerint.*
- 3 *Cardinales dicuntur habere facultatem eligendi Pontificem potius delegatam quàm ordinariam.*
- 4 *Cardinales quando nam soli Pontificem eligere incœperint.*

P R I M A P R O P O S I T I O.

1 **C**ardinales facultatem eligendi Papam acceperunt immediate à Papa, ex facultate ipsi à Christo concessa; non verò ex iure diuino immediate. Ratio est, tum quia nullus textus ex veteri, vel nouo Testamento afferri potest, quo hanc facultatem ipsis iure diuino competere probetur; tum quia Cardinalatus non est officium, & dignitas ordinis, sed administrationis; sed omne officium iurisdictionis in Ecclesia (excepto Papatu, quod à Christo immediate collatum fuit Petro) à Papa pendet, cùm ipsius voluntate instituitur, augeatur, minuat, varietur, *cap. omnes 22. dist. cap. in nouo 21. dist. & cap. nulli 99. dist.* ergo immediate pendet à Papa, alioquin Papa non posset illud instituere, & variare; tum quia si hoc ius ipsis ex iure naturæ, vel diuino competeret, Papa non posset eos ab electione repellere; tum quia Clerus cuiuscumque Ecclesiæ auctoritatem eligendi suum Præsulem habet à Summo Pontifice; alioquin Papa illam sibi pluribus in locis non reseruasset: ergo illam etiam à Papa habent Clerici, seu Cardinales eligendi Papam; sicut enim se habet Clericus particularis ad suum Præsulem eligendum, ita se habet totus Clerus, vel Clerus Romanus, seu Cardinales ad suum; tum quia S. Petrus Episcopos per diuersa loca constituit, etiam antequam vlli fideles in illis locis adessent, vt probat Bellarminus *lib. 1. de Cleric. cap. 9.* Ergo potestas eligendi à Pontifice deriuatur; tum quia caput politicum præest omnibus membris, in illa influit, illaque dirigit: sed Summus Pontifex est caput Ecclesiæ politicum, fideles membra: ergo præest omnibus Christi fidelibus, illòsque dirigit, & potestatem, ac iurisdictionem influit; tum quia Papa est Christi Vicarius in terris: Vicarius autem

cum

cum plena potestate relictus, totum id præstare potest Vicaria potestate, quod facit Prælatus potestate principali; ergo ea potestas quam Ecclesiæ Ministri habent, à Christo tanquam summo capite & Pastore, illam eandem habent, à Pontifice, vt à capite, sub capite, seu tanquam Christi Vicario, cum plenitudine potestatis cōstituto; tum quia sic colligitur, ex *cap. Romanorum* 19. & *cap. solita, de maiorit. & obed.* vbi habetur Papam esse Christi Vicarium, cum plenitudine potestatis cōstitutum, vt omnibus Ecclesiæ necessitatibus consulere possit: tum quia sic colligitur, ex *cap. in nomine Domini* 23. *dist. cap. vbi periculum, in* 6. & *Clement. ne Romani de elect.* idemque coram Bessarione Cardinale Niceno, aliàs definitum fuisse tradit Barbatius *quest. 1. de Cardinalibus, num. 20.* licet ipse Barbatius loco citato. Albanus *quest. de Cardinali.* Anastas. Germon. *de sacror. immunit. lib. 3. cap. 6.* & alij existimauerint Cardinalatum esse de iure diuino, & eligendi facultatem ad Cardinales, iure diuino spectare.

2 Dices Apostoli elegerunt sibi Petrum, *cap. in nouo* 21. *dist. in* 2. ergo Cardinales iure diuino eligunt Pontificem.

Respondeo primò antecedens falsum esse. Petrus enim à Christo electus fuit, Apostoli verò consenserunt, & sua voluntate approbaverunt, seu recognouerunt electum à Christo, vt patet ex *cap. Sacrosancto* 22. *dist.*

Respondeo secundò, negando consequentiam, ex facto enim Apostolorum non sequitur Cardinales eligere iure diuino; alioquin Cardinales iure diuino tenerentur sibi prouincias visitandas eligere, prædicare, omnia in commune conferre, & similia quæ ab Apostolis facta fuisse constat. Alias obiectiones affert Barbatius, sed illas tanquam leuis momenti omitto.

3 Hinc colligi potest primò, solutio illius difficultatis qua quæritur, vtrum Clericis, seu potius facultas eligendi Cardinalibus competat ex facultate ordinaria, vel potius ex delegata, & ministeriali; licet enim vno sensu dici possit competere per modum potestatis ordinariæ, quatenus hæc potestas ex dispositione Papæ annexa est Cardina-

dinalatui, & Cardinales statim adepto Cardinalatu, ius habent Pontificem eligendi Sede vacante, nihilominus alio sensu dici potest cōpetere ex facultate delegata, & ministeriali, quia qui facultatem habent eligendi ad aliquam dignitatem, & officium quod dignitatem ipsorum eligentium excedit, non possunt hoc iure ordinario, seu ex propria facultate, sed ex potestate sibi à superiore collata præstare (nihil enim ultra suas vires agit, nisi aliunde vires acquirat, nec vllus dat quod non habet.) Sed dignitas Pontificis excedit dignitatem Cardinalium; ergo Cardinales non possunt Pontificem facultate ordinaria, sed potius delegata, & ministeriali eligere, ita Sopranus *De elect. Papæ, lib. I. cap. 6. vers. Dico ergo.*

SECUNDA PROPOSITIO.

4 **Q**Uandò nam soli Cardinales eligere inceperint non constat, quia ignoratur Papæ, à quo facultas eligendi restricta, & solis Cardinalibus primò communicata fuit; perspicuum tamen est Cardinales iam diu hoc iure præditos esse, ut patet ex cap. licet, de elect. in quo Alexander III. qui creatus fuit circa annum 1170. præscribit ad electionem Papæ numerum duarum ex tribus partibus Cardinalium.

§. I V.

An Cardinales facultatem habeant eligendi Papam solum Sede vacante, eamque singuli habeant, an solum Collegium Cardinalium.

S V M M A R I - V M.

1 Cardinales eligendi potestatem habent quoties Sedes vacat, siue vacet per mortem, siue alia ratione.

2 Car-

- 2 *Cardinales an singuli facultatem habeant eligendi, vel solum Collegium.*
- 3 *Cardinales vnus vel duo in Conclauis existentes alijs è Conclauis egressis, vel extinctis an Pontificem eligere possint.*
- 4 *Cardinales Concilium Generale Sede vacante conuocantes, an possint ipsi Pontificem eligere, vel potius eligendi facultas Collegio competat.*

P R I M A P R O P O S I T I O.

1 **C**ardinales circa electionem Summi Pontificis habent ius proximum, & in actu, solum mortuo Summo Pontifice, aut Sede vacante, siue Sedes vacet per mortem, siue per renunciationem, siue alia ratione. Ratio est, quia Pontifices contulerunt Cardinalibus facultatem eligendi solum Sede vacante; ergo eligere nequeunt viuente Summo Pontifice; tum quia viuente Pontifice potestatem eligendi habent solum in habitu, & non in actu, sicut est ius hæredis superstitis adhuc testatore, aut ius substituti in fideicommissio, viuo adhuc illo qui prius institutus fuit; tum quia in *Clement. ne Romani, de electione*, irritatur quicquid factum fuerit à Collegio Cardinalium pertinens ad iurisdictionem, & potestatem Summi Pontificis: electio autem Papæ pertinet ad potestatem Papæ, cum Cardinales non eligant auctoritatiuè, & iure proprio, sed ministerialiter, auctoritate sibi à Papa concessa; ita sentire videtur Pannonitanus, Suarez, Salas, Manfredus, & alij quos retuli *de legibus, disp. 1. quæst. 1. puncto 3. num. 25.* quibus adde Cardinalem Tuschum *tom. 2. lit. E. concl. 57. num. 19.* Iacobatium *lib. 4. art. 3. & lib. 6. art. 9. num. 10.* Sopranum *lib. 1. de elect. cap. 17.*

S E C V N D A P R O P O S I T I O.

2 **S**olum Collegium Cardinalium adæquatè, & proximè facultatem habet eligendi Pontificem, singuli verò inadæquatè, & remotè;

remotè; Collegium enim ex multis singularibus personis conflatur. Ratio est, tum quia ad electionem Summi Pontificis necessariò requiruntur suffragia duarum ex tribus Cardinalium partibus in Conclauis existentibus; ergo potestas eligendi adæquatè, & proximè, pertinet solum ad Collegium; tum quia Summi Pontifices mandant in electione Pontificis, tractatus de electione haberi, Cardinales debere simul agere, conuentum habere, & similia, *cap. in nomine Domini* 23. *dist. cap. ne Romani, de elect.* & alibi: sed hæc sunt propria Collegij; ergo facultas eligendi non competit proximè, & adæquatè singulis Cardinalibus, sed Collegio.

3 Dices si vnus, vel duo Cardinales, alijs è Conclauis egressis, vel extinctis, superesset, posset solus Papam eligere, ergo potestas eligendi singulis proximè competere videtur, & non tantum Collegio; vt enim res Collegialiter agatur, tres saltem personæ requiruntur, *l. Neratius, ff. de verbor. signific. & cap. 1. de elect.*

Respondent aliqui negando antecedens, quia vnus, vel duo Cardinales Collegium non constituunt, consequenter in tali euentu electio pertinet ad Romanum Clerum, vel saltem conuocandum est Generale Concilium, ita Sopranus *lib. 1. cap. 11.* & alij quos tacito nomine innuit Azorius, & Manfredus *decis. 382.* & patet ex supradictis *puncto 1. num. 3.*

Alij verò arbitrantur vnum vel duos Cardinales superstites, posse Papam in tali euentu eligere; tum quia Collegium Cardinalium in vno virtualiter remanere potest; multa enim ad eum statum recidunt in quo remanent; à quo tamen validè incipere non possent, *l. si optio. ff. de optio. legat.* tum quia Sede vacante ea permittuntur Cardinalibus, quæ pertinent ad electionem Papæ, *cap. vbi periculum, de elect.* ita Glossa in *clement. ne Romani de elect.* Cardinalis Imola, Panormitanus, Innocent. Iason, & alij quos citat & sequitur Albanus *quest. 23. & 25. de Cardinalibus.* Gondislaus Villadiego *de orig. & potest. Card. quest. 5. num. 26.* Rodriquez *tom. 2. quest. 63. art. 11.* Manfredus *de Cardinal. decis. 268. 287. & 291.* Salas, & alij, quos retuli *de legibus disput. 1.*

D *quest. 1.*

quæst. 1. *puncto* 3. Quid autem faciendum sit dum omnes exierunt, & vnus postea reuertitur, vel plures, videri potest apud Albanum *quæst.* 27. & constabit ex infrà dicendis.

4 Quæres vtrum Cōcilio Generali, vel potiùs Cardinalibus competat ius eligendi Pontificem, si Cardinales Sede vacante Cōcilium conuocari iubeant, dum electionem aliter expedire non possunt. Respondeo ius & facultatem eligendi etiam tunc temporis Cardinalibus competere, quia Cardinalibus, & non Concilio huiusmodi facultas à Papa concessa fuit, & facultas à superiore concessa, non potest ab inferiori immutari, lædi, vel restringi, *cap. inferior, de maiori. & obed.* Concilium autem Generale inferius est Summo Pontifice; ergo non potest priuilegium Cardinalium lædere, variare, vel restringere; vide Albanum *quæst.* 35. & Iacobatium *lib. 6. art. 4.* & alios proximè citandos.

Obijciēs Concilium Generale est superius omnibus alijs Ecclesiasticis Capitulis, Cœtibus, & Collegijs; ergo etiam Collegium Cardinalium illi subijcitur, consequenter facultas eligendi ad Conciliū Generale potius, quàm ad Collegium Cardinalium in tali euentu spectare videtur.

Respondeo Collegium Cardinalium non subijci Concilio Generali in ijs, quæ Collegium Cardinalium agit auctoritate Papæ, seu quoad ius ipsum electionis, vt patet ex ratione superiùs allata, nisi fortè Cardinales iuri eligendi cedant, aut nisi dubium sit ipsos esse veros Cardinales, vt si Cardinales tempore schismatis creati sint ab eo, quem non constabat esse verum Papam; tunc enim præfati Cardinales Concilio Generali subijciuntur, quia non constat de iure huiusmodi Cardinalium, constat verò Concilium Generale potestatem in tota Ecclesia habere; vide Albanum *quæst.* 35. 39. & 43. *de Cardinal.* Iacobatium *de Concilio lib. 6. art. 9.* vbi de hac re fusè tractat, Māfredum *decis.* 245. Cardinalem Tuschum *tom. 2. lit. E. concl. 57. num. 19.* Sopranum *de elect. lib. 1. cap. 18. art. 2.* Azorium *2. part. lib. 4. cap. 2. quæsto* 13. quorum aliqui, vt Albanus, & Azorius obseruant, Concilium

cilium Generale posse iusta de causa facultatem eligendi Cardinalibus ad tempus adimere.

5 Quæres utrùm Pontifex possit sibi successorem, saltem de plenitudine potestatis eligere.

Respondeo istam quæstionem proponendam, & dissoluendam esse ad finem primæ disputationis.

P V N C T V M I I.

An Electores liberè & sponte debeant eligere, & an electio facta per metum valida sit.

S V M M A R I V M.

- 1 Electio Pontificis valida non est nisi liberè fiat.
- 2 Invalida est electio Pontificis facta per metum, etiamsi de huiusmodi metu omnibus Cardinalibus non constet.
- 3 Electio facta per metum leuem valida est.
- 4 Electio facta per metum Cardinalibus in genere incussum ad eligendum valida est.
- 5 Electio facta per metum incussum ad eligendum aliquem certi generis, vel nationis, valida est.
- 6 Electio valida est dum metus incutitur ad excludendas personas certi generis, aut certam aliquam personam.
- 7 Electio facta metu aeris inficiendi, valida est.
- 8 Electio facta per metum à Deo miraculosè incussum, valida est.
- 9 Electio facta à Cardinalibus audientibus Turcas adesse, valida est.
- 10 Electio Urbani VI. valida fuit, etiamsi fortè per metum initio facta fuerat.

V N I C A P R O P O S I T I O.

- 1 **V**T electio valida sit, opus est, ut Cardinales liberè eligant, & non per metum grauem incussum ab homine ad certam ali-

D 2 quam

quam personam eligendam. Ratio est, tum quia electio ex sua natura libertatem requirit ad eligendum vnum ex pluribus, *cap. ubi periculum, de elect. S. ceterum*, ibi cessat electio, dum libertas adimitur eligendi, tum quia sic expresse decernitur in Concilio Constantiensi *sess. 29. ibi*, *Quod si forte electionem Romani Pontificis per metum factam, qui cadat in constantem virum, seu impleffionem de cetero fieri contingat, ipsam decernimus nullius efficacia, vel momenti, nec posse per sequentem consensum, etiam metu predicto cessante ratificari, & approbari*; ita Alban. *quest. 16. Azorius 1. part. lib. 1. cap. 11. questio 11. & 1. part. lib. 4. cap. 2. questio 6. Nauarrus in summa cap. 17. num. 29. & cap. 22. num. 51. Rodriquez questionum regularium tom. 2. quest. 51. art. 10. Baldus in cap. quis de elect. Tuschus tom. 2. concl. 62. Gondislaus Villadiego de Card. quest. 5. num. 26. Martinus Laudensis de Card. tract. 2. quest. 96. Manfredus decis. 264. 278. & 322. Iacobatius de Concilio lib. 4. art. 4. numero 79. & num. 224. ubi hanc propositionem pluribus probat: Miranda tom. 2. quest. 23. art. 1. & alij contra nonnullos Doctores apud Iacobatium. Quis autem dicatur metus grauis ab homine incussus, constat ex dictis *de matrimonio, de voto, & de censuris*, quæ hic opus non est repetere, cum ibi facile consuli, & videri possint. Hæc conditio, seu propositio limitatur à Soprano *lib. 4. cap. 7. vers. Ex parte eligentium*, modò de hoc metu constet omnibus Cardinalibus, alioquin liberum cuique esset electionem impugnare confingendo sibi metum incussum fuisse ad electionem talis personæ.*

2 Sed hæc limitatio in foro conscientie mihi non probatur, nec habenda est fides Cardinalibus asserentibus se per metum elegisse, nisi antea protestati essent, se per metum eligere, ex Baldo *in cap. ubi periculum, de elect.* Imò in Concilio Constantiensi prohibetur Cardinalibus, post factam per metum electionem alium eligere, donec per Concilium Generale iudicatum fuerit de electione, aut donec electus per metum renunciaret, vel moriatur; alioquin electio irrita est, & tam eligentes, quam electus priuationem status, & dignitatis Cardinalatus, & Pontificalis ipso facto incurrunt, & inhabiles ad eosdem eligentes

eligendos, ac etiam ad Papatum efficiuntur. Ratio verò cur præfata limitatio mihi displiceat, est; quia natura, & ratio electionis postulare videtur, vt voluntariè & liberè fiat; ergo electio in foro conscientiae vitatur, etiamsi metus notus non sit alijs Cardinalibus; natura, enim electionis non mutatur ob aliorum notitiam, vel ignorantiam.

3 Ex dictis sequitur primò, electionem factam per metum leuem, validam esse; tum quia hic non est metus grauis; tum quia metus levis libertati, & voluntati non valdè aduersatur, ob id neque in Iure haberi solet ratio metus leuis; tum quia præsumendum non est viros prudentes, & constantes leui metu concuti; metus enim levis in virum constantem non cadit; tum quia à ratione alienum est, vt Summi Pontificis electio tam leui de causa infirmetur, & rescindatur, ita Paulus Cortesius *lib. 3. de elect. Papa, col. 5. vers. Nec*; item Albanus *quest. 16. vers. Qualis autem, contra Gondislaum loco citato, Iacobatium lib. 4. art. 4. num. 133. & alios.*

4 Secundò sequitur metum quo Cardinales in genere compelluntur ad electionem Pontificis faciendam, non vitare electionem, quia hic metus non incurritur ad eligendam certam personam, sed in genere ad electionem, cum quo metu adhuc stat libertas electionis; libertas enim electionis non in hoc posita est, vt possit eligere, vel non eligere; sed vt vnum è pluribus voluntariè, & liberè eligat, & possit non eligere quem eligit, quæ vocari potest libertas specificationis, & exercitij; ita Hieronymus Manfredus *de Cardinal. decis. 311. Iacobatius lib. 4. art. 4. num. 143. & alij.*

5 Tertiò sequitur grauem metum incussum ad eligendum aliquem certi generis, & nationis, exempli gratia, Italum, vel Hispanum, nõ irritam reddere electionem, quia per huiusmodi metum restringitur quidem, sed non tollitur libertas electionis, cum vnus è pluribus voluntariè eligatur, ita Abbas Sicularius, apud Iacobatium *lib. 4. art. 4. numero 140. Nauarr. consil. 7. de constit. lib. 1. Miranda in manuali Prælat. 2. part. quest. 23. art. 22. Rodriquez tom. 2. quest. 51. art. 11. & Azor. 1. part. lib. 1. cap. 11. questio 11. contra Gondislaum loco citato num. 29. Iacobat.*

cobat. *lococitato num. 140.* Manfredum *decif. 392.* & alios, idem à fortiori sentientes, dum metus incussus fuit ad vnum è duobus tantum eligendum.

6 Quartò sequitur metum incussum ad excludendas personas certigenis, aut certam aliquam personam non obesse valori electionis, quia cum huiusmodi metu subsistit ratio liberæ electionis, quæ in hoc posita est, vt vnus è pluribus voluntariè capiatur, ita Panor. *mit. in cap. licet, de elect.* Iacobatius *lib. 4. de Concilio art. 4. num. 143. & seqq.* Innocentius, & alij apud Sopranum *lib. 4. de elect. cap. 5. ques. 2.* & apud Cardinalem Iacobatium *de Concilio lib. 4. art. 4. num. 144.*

7 Quintò sequitur electionem à Cardinalibus factam metu aeris in Conclauis inficiendi, validam esse, tum quia non est metus ab homine incussus; tum quia hic metus non tollit libertatem, quin vnus potius quàm alius eligatur.

8 Sextò validam esse electionem factam Deo miraculosè grauissima mala minitante, nisi Cardinales eligerint, quem Deus ipse designauit, hic enim metus non est ab homine, sed à Deo; nec iniuste, sed iuste incurritur, & quæ à Deo extraordinario modo fiunt, ordinarijs legibus non subiiciuntur.

9 Septimò validam esse electionem factam à Cardinalibus eo quod audierint Turcas prope vrbs mœnia adesse, animo deuastandi, depopulandi, rapiendi, &c. Ratio est, quia electio istius personæ non est facta ob metum incussum, ad hanc personam eligendam, qui vocatur metus *ad hoc*, sed ob metum ad alium finem incussum, qui dicitur metus *non ad hoc*, vt in simili patet ex dictis de matrimonio, & de voto metu celebrato, & emissio, consequenter huiusmodi metus non tollit libertatem actus.

10 Obijcies contra dicta in propositione, & illationibus, electio Urbani VI. valida fuit, etiamsi facta fuerit per metum à populo Cardinalibus incussum, teste Alphonso Ciaconio, ex quo deinde originem traxit magnum illud schisma, quod ab anno 1378. vsque ad annum 1429. perdurauit.

Respon-

Respondeo electionem Urbani VI. validam fuisse, tum quia celebrata non fuit per metum grauem, teste Onuphrio Panuino; tum quia etiamsi metus à populo incussus fuerit; non tamen incussus fuit ad hanc personam eligendam; tum quia etiamsi admitterem metum illatum fuisse ad hanc personam eligendam: nihilominus electio postea ratificata fuit, nouo consensu; Cardinales enim in illum postea consenserunt, & tanquam verum Pontificem toti orbi proposuerunt; nec tunc editum fuerat decretum Concilij Constantiensis, ita Azorius *loco citato*. Iacobatius *lib. 4. art. 4. num. 138*. Sopranus *lib. 4. cap. 5. quest. 3.* & alij contra Ægidium Cardinalem *consil. 97. & 99.* ac alios apud Iacobatium *loco citato*.

P V N C T V M I I I.

De quatuor alijs conditionibus requisitis ex parte eligentium, quarum prima est, vt elector non eligat seipsum: secunda vt eidem non suffragetur in scrutinio, & in accessu: tertia, vt dignum eligat: quarta, vt alia à iure sibi præscripta obseruet.

S V M M A R I V M.

- 1 Elector se ipsum eligere non potest.
- 2 Elector qui suffragium vni in scrutinio dedit, non potest eidem in accessu suffragari.
- 3 Electores debent idoneum eligere.
- 4 Electores possunt ceteris paribus eum præferre, quem sibi magis proprium sperant.
- 5 Cardinalis qui suffragium digno confert relicto digniori, quem ipse eligi vellet, alijs eum respuentibus, à mortali excusatur.
- 6 Cardinalis tribuens votum manifestè indigno, non vt eligatur, sed vt votum inane reddatur, per se loquendo grauiter peccat.
- 7 Electores seruare debent ea quæ sibi præscripta sunt.

PRI-

PRIMA PROPOSITIO.

1 **E**lector se ipsum eligere non potest, alioquin electio irrita est ex Gregoriana constitutione, *si suffragium proprium compleat numerum requisitum ad electionem*: de hac conditione plura infra, dum agam de requisitis ex parte formæ, seu de electione per scrutinium, *quæst. 5. condit. 4.*

SECUNDA PROPOSITIO.

2 **E**lector non potest in accessu illi suffragium ferre cui suffragatus est in scrutinio, alioquin suffragium accessus irritum est, sicut etiam irritum est, dum inter schedulas scrutinij, nulla reperitur schedula notata eo signo quo notata est schedula accessus, ut patet ex *Bulla Gregorij XV. in S. At si.*

TERTIA PROPOSITIO.

3 **E**lectores debent idoneum eligere (quanquam hac conditione deficiente irrita non est electio, nisi simul adsit defectus substantialis.) Ratio est, quia Cardinales constituuntur, ut loco vniuersitatis idoneum Ecclesiæ Pastorem eligant; ergo cōtrā proprium officium delinquant, eum eligendo qui tanto muneri aptus, & idoneus non est. Idoneus autem is dicitur, qui debita scientia, peritia, fama, vitæ integritate, viribus, ætate, & legitimis natalibus gaudet, ita S. Thomas 2.2. *quæst. 63. art. 2.* Sotus 3. *de iust. quæst. 6. art. 2. conclus. 9.* Miranda in *manuali tom. 2. quæst. 23. art. 13.* & alij communiter.

4 Existimo tamen cæteris paribus liberum esse Electoribus eligere quem velint ex duobus æquè idoneis. Ratio est, tum quia in hoc etiam libertas electionis posita est; tum quia nulli faciunt iniuriam, cum dignum eligant, nec duos eligere possint.

Amplia, etiam si Electores id faciant, ut proprijs commodis consulant, nam in diiudicanda personæ eligendæ habilitate, rationem quidem

quidem habere non debent priuati commodi, sed publicæ vtilitatis; lato tamen iudicio de alicuius habilitate, & aptitudine, iuxta communem, & publicam vtilitatem, vetitum non videtur cæteris paribus ex duobus æquè dignis eum eligere, quem Electores sibi magis propitium sperant. Ratio est, tum quia Gregorius XV. in sua constitutione non prohibuit rationem sui commodi secundariò haberi, sed vetuit carnem, sanguinem, & humanam sapientiam, quæ stultitia est apud Deum, dominari, hæc autem dominantur, dum in electione ratio præcipuè non habetur publicæ vtilitatis, sed priuati cōmodi; tū quia nullus vnquā carnē propriam odio habuit; tum quia ex ordinata charitate, quilibet potest se ipsū cæteris paribus præferre, in hoc aut casu cætera paria sunt, cū ambo æquè digni sint, vt suppono; ergo.

5 Maior difficultas est primò, vtrum à mortali excusetur Cardinalis, qui suffragium confert digno, relicto digniori, quem ipse eligi vellet; sed alij eum respuunt, & suffragium ei conferre nolunt.

Respondeo excusari posse, tum quia per ipsum nō stat ne dignior eligatur; tum quia acquiescere potest aliorum conscientia existimantium alium digniorē, & hoc præsertim valet, si animaduertat absque suo voto, & suffragio compleri numerum ad electionem requisitum, vel id faciat ad præcauendas amicorum dissensiones, odia, & persecutiones; quamquam huiusmodi periculum hoc tempore imminere non solet, cū suffragia per scrutinium & accessum occultè ferantur, ita sentire videtur Albanus de Cardinalibus q. 10. & Azorius 2. parte lib. 4. cap. 3. quasi to 17. dum in simili quærent, an Cardinalis tuta conscientia tacere possit, dum aliquid in consistorio contra vtilitatem, & decus Ecclesiæ proponitur.

6 Secundò difficultas est, vtrum grauitèr peccet Cardinalis, qui votum & suffragium manifestè indigno tribuit, non vt eligatur, sed vt votum inane reddatur, aut alia de causa.

Respondeo, grauitèr peccare per se loquendo: Ratio est, tum quia facit contra proprium officium, votum indigno tribuendo; tum quia iniuriā dignioribus irrogat, tum quia Summi Pontificis ele-

E & io

ctio hoc pacto diutius differtur, & prorogatur cum notabili Ecclesiæ damno, seu periculo. Dixi per se loquendo, quia per accidens fieri potest, ut excusetur, si videlicet votū indigno iusta de causa tribuat, sciens fore ut ipse indignus nō promouetur, sed dignior iniecta mora eligatur. Ratio est, tum quia tunc non dicitur eligere indignum, cum certō ipsi constet votum indigno non profuturum, ut suppono; tum quia iniuriam digniori non facit, cum moras neget, ut dignior eligatur, eique melius consulatur.

Q V A R T A P R O P O S I T I O.

7 **E**LECTORES obseruare debent ea, quæ sibi à Summis Pontificibus præcepta sunt, & ab ijs abstinere debent, quæ ipsis interdicta fuerunt, ut ex se patet; quanquam hæc vitare non solent electionem, iuxta dicenda in Quæstionibus, & Punctis proximè sequentibus.

Q V Æ S T I O II.

De requisitis ex parte Electi ad validam Summi Pontificis electionem.

S V M M A R I V M.

1. *Eligendus in Papam debet esse masculus, & non femina.*
2. *Femina nulla fuit vnquam in Papam electa.*
3. *Alta huiusmodi femina irrita essent.*
4. *Vir coniugatus valide eligi potest.*
5. *Eligendus in Papam rationis vsum habere debet.*
6. *Pontifex cuiusnam ætatis esse debeat dum ad Pontificatum promouetur.*
7. *Quid faciendum si eligatur aliquis qui postea rationis vsum amittat.*
8. *Eligenda est persona certa.*
9. *Pontifex consentire debet in electionem alioquin electio inualida est.*
10. *Cardinales facta iam vnius electione recedere non possunt ab electione.*

- 11 *Cardinales ab Ecclesia gubernare possint donec electus consensus proficiet.*
- 12 *Cardinales an facultatem aliquam habeant in electum, qui electionem nondum accepit.*
- 13 *Eligendus in Papam debet esse baptizatus.*
- 14 *Eligendus in Papam debet esse Christi fidelis non Hereticus.*
- 15 *Eligendus in Papam vitio simoniæ in electione carere debet, alioquin non solum tunc inualide eligitur, verum etiam inhabilis efficitur, qui in futurum eligatur.*

V N I C A P R O P O S I T I O.

S EX conditiones ex parte personæ eligendæ necessariae sunt ad validam electionem.

I Prima est, vt masculus sit, & non fœmina. Ratio est, tum quia, non decet fœminam omnibus tam Ecclesiasticis, quàm Laicis præferre, tum quia fœmina incapax est clauium præsertim Ordinis, *cap. in nouo, de pœnit. & remis.* tum quia nusquam legitur, Christum alios ministros instituisse, præter viros, vt docui *de Sacramentis disp. 8. quæst. vnica, punct. 5. num. 5. & de censuris quæst. 1. punct. 2.* cum S. Thoma, Vasquez, & alijs, quibus adde Azorium *in terminis 2. part. lib. 4. cap. 5. quæst. 7. vers. Quæres in super,* & Iacobatium *de Concilio lib. 4. art. 4. num. 112.*

Obijcies primò, olim in Ecclesia fuerunt Diaconissæ, & Presbyterissæ *27. quæst. 1. & can. mulieres dist. 37.* ergo mulieres ad Ordines promoturi, alijsque fidelibus in Ecclesia præfici possunt.

Respondeo primò huiusmodi fœminas, eo nomine vocatas fuisse, eo quod essent Diaconorum vxores. Secundò, huiusmodi fœminas sacris Ordinibus initiatas non fuisse, sed curæ quarundam rerum Ecclesiæ deputatas fuisse, vt docui *de Sacramentis loco citato*, cum Valentia, Henriquez, Conincho, Vasquez, & alijs.

2 Obijcies secundò, nonnulli Historiographi ferunt quandam Ioannam ad Papatum euectam fuisse; ergo sexus masculinus non est

conditio ad Papatum necessaria ; hæc consequentia patet , quia ad probandam potentiam ad aliquem actum , maximè valet actus .

Antecedens verò quòd videlicet fœmina in Papam electa fuerit . Probatur primò , ex ipsismet Historicis Mariano , Scoto , Sigiberto Polono , Platina , & alijs asserentibus hanc fœminam , cum ab Amasio Athenas ducta fuisset , ibique tam in sacris , quàm in profanis litteris mirificè profecisset , indèque Romam rediens litterariæ Palæstræ præfuisse , ad Pontificiam dignitatem assumptam fuisse , & cum solemnem Corporis Christi processionem comitaretur , vel potius ipsa Christi Corpus deferret , filium in via propè amphitheatrum , & D. Clementis ædem , peperisse .

Secundò , quia fama publica cōstabat , inquit Polonus , hanc Ioannam fœminam fuisse , imò Platina hac de re loquens , sic ait ; hæc quæ dixi , vulgò feruntur .

Tertiò , quia aliàs in via , in qua hæc fœmina filium peperit , exibat huius rei statua , & constructa fuerat capella , in qua tumulto recondita iacebat .

Quartò , quia Pōtifices in detestationē tā scelestæ fœminæ ea via in qua præfata fœmina peperit , nō progrediūtur , imò sedem cōfici curant , vt electus de recenti in Papam explorari valeat cuius sit sexus .

Respondeo primò , quicquid sit de antecedenti quod falsum esse ostendam in secunda responsione , neganda est consequentia : nam ipsimet Historici concedunt , hoc esse portentum , & monstrum , consequenter non permittendum , quamvis Hæretici Anglicani fœminam Anglicanæ Ecclesiæ præfecerint , & tamquam caput , & superiorem non solum in temporalibus , verum etiam in spiritualibus agnouerint , errorem suum regentes Papissæ exemplo , quod fabulosum , commentitium , & mendacijs plenum esse perspicue constabit ex dicendis in secunda responsione .

Respondeo secundò antecedens , nempe Ioannam ad Papatum promotam fuisse , alienissimum est à veritate , nullòque apparenti , ne dicam solido , nititur fundamento . Ratio est primò , quia nullus antiquarum

tiqvarum rerum scriptor spatio quingentorum annorum villam de hac re mentionem fecit: nam Hæretici huius fabulæ fabricatores electionem istius foeminae contigisse putant, anno 855. vel vt alij, anno 848. alij alio tempore, Primus huius rei Scriptor fuit Polonus, qui post quingentos annos extitit. Neque obstat testimonium Mariani, Scoti, & Sigiberti, quia in primis suarum historiarum editionibus, testibus Onufrio in *Platinam*, & Genebrardo *lib. 4.* id minimè habetur, sed solum in aliquibus exemplaribus in margine, variato charactere exprimitur, ex quo licet conijcere, id ab Hæreticis additum fuisse, vt hac saltem ratione fides fabulæ adhiberetur. Neque obstat dicere Historicos illius temporis ausos non fuisse, hanc rem perscribere, & omnibus notam facere prohibentibus id Pontificibus.

Respondetur enim Pontifices non prohibere, ne publicæ, & omnibus notæ historiæ commendentur; præterea fieri non potest, vt Pontifices id prohibuerint, cum iuxta ipsos innet aduersarios quædam capella, & statua, auctoritate Pontificum, in huius rei detestationem publicè constructa fuisset. Denique, si Pontifices id vetuerunt, quomodo, quo fundamento, & qua auctoritate Polonus ausus fuit, post quingentos annos hanc rem perscribere, suisque historijs cum nota mendacij commendare.

Secunda ratio est, quia huius fabulæ fabricatores, non conueniunt in nomine huius Papisæ, nam alij Agnetem, alij Iuttam, aut Dorotheam, alij Isabellam, Margaritam alij, alij Gilbertam, alij alio nomine vocant; alij denique nomen ipsius ignorari affirmant; sed omnes verius locuti fuissent, nullam vocando: in hoc etiam discordes sunt, quod vnus Ioannem septimum, alius Ioannem octauum, alius Ioannem vigesimum secundum fuisse confingit, quos tamen constat fuisse legitimos Ecclesiæ Romanæ Pontifices; alij natione Germanam, alij Anglicanam dixerunt, alij putant eam sedisse vno anno, & mense vno, alij sedisse duobus annis, & duobus mensibus, alij duobus annis cum dimidio.

Tertia ratio est, quia aduersarij discrepant in assignando virum
ex quo

ex quo factum concepisse confingunt; alij ex Amasio, à quo Athenas perducta fuerat; alij ignari, vel immemores originis, & institutionis Collegij Cardinalium, à quodam Cardinali; alij à quodam famulo carnaliter cognitam fuisse testantur; rectius dixissent se hanc fabulam auctore Demone concepisse, vel somniasse.

Quarta ratio est, quia aduersarij putant hanc foeminam successisse Leoni IV. & 2. annis, & 5. mensibus, & 4. diebus vixisse; hoc autem falsissimum est, cum Leonem subsecutus fuerit post sex dies Benedictus Tertius, vt seriem Pontificum, Cardinalium examinanti perspicue constabit, & testatur Anastasius Bibliothecarius, qui tunc temporis Romæ præsens erat, Lupus Ferrariensis Abbas, & alij apud Baronium anno 833.

Ad primam rationem allatam ad probandum antecedens, responsio patet, ex prima ratione à me allata, nullus enim Historicus intra quingentos annos verbum vllum de hac re scripsit.

Ad secundam respondeo, probationem ex fama, & vociferatione infirmam esse, multa enim vulgò feruntur, quæ omnino à veritate aliena sunt, iuxta illud, *Fallitur, & fallit vulgi qui pendet ab ore*, nec valet dicere, vulgo ita fertur, ergo verum est, sicuti non valet dicere, Caluinistæ communiter aiunt Papam esse Antichristum, aut monstrum, ergo Papa verè est Antichristus vel monstrum; quis non videt hæc esse absurda Meridiana luce clariora? ob id Platina huius fabulæ falsitatem agnoscens, in hæc verba loquitur, *hec quæ dixi, vulgò feruntur, incertis tamen & obscuris auctoribus, erremus etiam nos hac in re cum vulgo*, hæc Platina, qui scienter errare voluit ob prauum erga Pontifices affectum.

Ad tertiam respondeo, nullam huius rei statuam, vel capellam Romæ vnquam extitisse, vt bene probant Scherer, & alij Doctores statim citandi.

Ad quartam respondeo, Pontifices per quamlibet transire viam, quæ sibi opportuna & commoda videatur, nulla penitus istius rei habita ratione; neque obstat argumentum à sede stercoraria desum-

sumptum, alias enim Pontifex nuper electus tribus sedibus infidebat, prima erat stercorearia, quæ illi præbatur, non ut pudenda inspicerentur, sed ut meminisset se non esse Deum, sed hominem necessitatibus nature adhuc subiectum, vel ut memor esset prioris conditionis & status, iuxta illud 1. Regum 2. *fuscitæ de pulvere egenum*; & de stercore eleuat pauperem, ut sedeat cum Principibus, & solium gloriæ teneat; in secunda sede, tradebantur virga, & clauds Ecclesiæ Lateranensis, ut inde conijceret potestatem sibi à Deo datam, ad continendos in officio fideles, & Ecclesiam regendam, custodiendam, administrandam; intertia Pontifex virgam, & clauds restituebat, ut animaduerneret se Pontificiam dignitatem non perpetuò retenturum, sed breui tempore administrationis sue rationem redditurum; vide Onuphrium Panuinum in Platinam, Baronium anno 853. Spōdanum eodem anno 853. n. 5. *vers.* Hoc ipso anno. Bellarminum lib. 3. de Pontifice cap. 24. Georgiū Scherer Serenissimi Arnulphi concionatorem, & Florimundum Remundum, qui de hac re fusillimè tractarunt.

Dices si fœmina per errorem eligeretur in Pontificem, eius acta essentne valida?

3. Respondeo negatiuè contra Iasonem in l. Barbarius, num. 64. ff. de offic. Prætor. Ratio est, quia fœmina iure Diuino incapax est dignitatis Pontificiæ, atque adeo caret iurisdictione, neque Ecclesia potest hunc defectum supplere, quia supplere non potest defectui iuris Diuini, aut naturalis, ut cum communi Doctorum sententia docui de Matrimonio, vbi ostendi gesta per eum, qui titulum habet coloratum cum errore communi valida esse, modò non adsit impedimentum iuris naturalis, vel Diuini: idèmq; in terminis docent, Alterius de censuris tom. 1. lib. 2. d. spū. 2. cap. 2. Mascard. de probat. conf. 649. num. 29. Antonius Gabriel lib. 1. comm. concl. tit. de probat. conclus. 8. num. 9. Si vero aliquis vir ad Pontificatum inualidè euehatur cum aliquo vitio, iure solum humano irritante electionem, valida essent ipsius acta cum titulo putatiuo, & errore communi facta, quia Ecclesia tunc ei iurisdictionem delegare, & supplere diceretur, quamuis enim Ecclesia non

non sit supra Pontificem; esset tamen supra hunc qui non verus, sed præsumptus Pontifex esset, vt benè Alterius loco citato, vbi tamen addit huiusmodi præsumptum Pontificem, non posse infallibiliter definire res fidei, quia potestas definiendi infallibiliter res fidei soli vero Pontifici, & Generali Concilio inest.

Sed modò dubium est, vtrum vir coniugatus eligi validè possit.

4. Respondeo affirmatiuè, quia electus à duabus Cardinalium partibus censetur validè electus, exceptis casibus in iure expressis; hic autem casus in iure exceptus non est: quamobrem si Summus Pontifex virum coniugatum ad Cardinalatus gradum promoueat, eumque Cardinales, Sede vacante, ignorantes vinculo matrimonij obstrictum, in Papam eligant, valida est electio, etiamsi cognito matrimonij vinculo non elegissent, nec eligere debuissent, ita Gondislaus Villadiego *de origine Cardinalium num. 33.* & alij quos sequitur Iacobat. *lib. 8. art. 9.* contra Paulum Cortesium *de Cardin. lib. 3. cap. 4. vers. Nec item.*

An autem Papa in tali euentu possit debitum petere, vel coniugi petenti reddere teneatur, constat ex regulis generalibus traditis de voto castitatis in tractatu de legibus, & de matrimonio, vbi docui Papam teneri debitum reddere, si vxor ad continentiam induci nequeat, nec ipsa iuri suo antea cesserit.

5. Secunda conditio est, vt eligendus rationis vsu polleat, ob id demens, & insanus, seu furiosus, aut infans, qui plenè rationis vsu nondum vtitur, eligi non potest, ratio est, tum quia sicut matrimonium validè celebrari non potest cum infante, vel infano, tempore furoris, vel insanix, ita neque validè eligi potest in Papam, qui rationis vsu non habet, cum Papatus sit veluti quoddam matrimonium, inter Papam, & Ecclesiam, vt Doctores in simili tradunt de illo cui beneficium confertur; tum quia is, cui Pontificatus confertur potestatem habet ligandi, & soluendi super terram, iuxta illud *quodcumque ligaueris super terram, erit ligatum & in cælis, quodcumque solueris super terram, erit solutum & in cælis;* sed is ligare aut soluere non potest in subiecta

subiecta materia, qui rationis vsum nondum adeptus est: ergo Papat-
 us ei conferri non potest, aut saltem non debet; tum quia is eligi de-
 bet qui consentire potest, sed infans aut demens consentire non po-
 test, nisi lucidis fruatur interuallis, consensus enim est actus liber, &
 voluntarius; ergo infans vel demens eligi non potest; tum quia sicut
 inualida est electio illius qui dissentit, aut consentire electioni de se
 factæ renuit, ita etiam inualida est electio illius, qui consentire non
 potest, ita Io. Azor. 2. p. lib. 4. cap. 6. p. 7. vers. *Quæres insuper*, Sopranus,
 & alij.

Obijcies Episcopus, Princeps, Rex, vel etiam Imperator, iuxta
 nonnullorum sententiam, eligi potest, etiamsi adhuc in puerili æta-
 te existat; ergo etiam Pontifex.

Respondeo primò, negando antecedens illi enim non eliguntur
 propriè loquendo, sed solum designantur, aut Reges fiunt, non ele-
 ctione, sed successionem, seu iure hæreditario. Idem dic de Episcopis,
 ipsi enim potius designantur, quàm eligantur.

Respondeo secundò, negando consequentiam, quia etiamsi ad-
 mittamus illos in puerili ætate eligi, negandum tamen est Papam in
 tali ætate eligi posse; ratio disparitatis est, quia possunt adesse alij na-
 tu, vel etiam dignitate maiores, qui vices illorum in officio gerant, &
 illorum electionem acceptent; nullus verò est qui Papæ vices, ipso nō
 concedente, sustinere valeat, aut ipsius electionem acceptare possit.

6 Rogabis primò, cuiusnam ætatis esse debeat Papa dum eligitur.
 Respondeo æquum esse vt eligendus trigésimum saltem annum com-
 pleuerit, ætatem enim triginta annorum in promouendo ad Episco-
 patum Ius Canonicum requirit *cap. cum in cunctis de electione*: quam-
 quam nonnulli vt Ioannes XXII. & Bonifacius IX. ad Papatum as-
 sumpti fuerint, antequam præfatam ætatem nacti fuissent.

Addo cæteris paribus seniore saltem ex honestate præferendum
 esse. Ratio est, quia senior sicut alios ætate, ita etiam prudentia, re-
 gulariter loquendo, præcedere consuevit, ita Sopran. lib. 4. cap. 1.
quæst. 1. ad fin.

7 Rogabis secundò quid faciendum, si eligatur aliquis sui compos, & idoneus, qui postea rationis vsum amittat, & inhabilis ad Ecclesiæ gubernationem reddatur, aut ab hostibus capiatur, nec ipsius voluntas cognosci possit.

Respondet Iacobatius *de Concil. lib. 4. art. 3. num. 52. & lib. 9. art. 1. num. 66.* & Manfredus *de Cardin. decis. 319.* conuocandum esse Concilium, à quo administrator in Ecclesia eligatur.

Hoc tamen ego limitandum censeo, nisi aliquis antea constitutus, & deputatus fuisset ad negotia Ecclesiæ gerenda, hic enim priuilegium, & iurisdictionem non amittit ob Pontificis morbum, vide Iacobatium *loco citato, num. 40. & seqq.*

8 Tertia conditio est, vt persona certa eligatur, cum enim Elector non habeat ius eligendi plures, sed vnum (plures enim Pontifices eodem tempore creari nequeunt, vt infra probabo) ferre non potest suffragium, quod pluribus accommodetur, aut quod incertum sit cui conueniat: quamobrem si duo eiusdem familiæ, & cognominis Cardinales in Conclaui existant, & Elector vnum eorum eligat, nulla addita distinctionis nota, inualidè ex sua parte eligit, quia sufficienter non constat quemnam eligere intendat. Idem valet si suffragium ferat corrupto nomine, addendo, vel detrahendo aliquam coniunctionem, aut vocalem, aut particulam propter quam ignoretur, cui nomen illud conueniat, secus, si mutatio adeò leuis sit, vt communiter sciatur, quemnam Elector intenderit, nec ante peractam electionem aliud exprefferit; sicut enim dispensatio, aut etiam Sacramenta, irrita non efficiuntur ob quamlibet verborum mutationem, ita nec ob quamlibet nominis alterationem, substantiam electionis vitari censeo; in dubio tamen, tutius erit schedulam aperire, & auctorem interrogare de ipsius intentione, sic enim omne dubium è medio tollitur; an autem qui eligitur debeat esse ex Cardinalium Collegio, constabit ex dicendis, §. *proximè sequenti ad finem, num. 19.*

9 Quarta conditio est, vt electus consentiat. Ratio est, tum quia non potest quis moraliter incipere aliquid possidere sine consensu; ergo

ergo vt quis Papatum, seu Pontificiam potestatem possidere incipiat, necessarius est ipsius consensus; tum quia electus per collationem Papatus plures contrahit obligationes, & quasi ex contractu obligatur: obligatio autem ex contractu, vel quasi contractu, non contrahitur absque consensu, vt bene Caietan. in opusculo primo de comparatione Pap. & Concil. cap. 26.

Nec tamen hinc sequitur primò Papam se ipsum eligere, seu creare, seu Papatum sibi coniungere, quia consensus in electionem non est electio, seu creatio, vel constitutio Papæ, sed conditio requisita ad completum electionis effectum, & Papæ constitutionem.

Secundò non sequitur Sedem Apostolicam simpliciter vacare, dū facta est electio à Cardinalibus, & electus nondum consensum præstitit, vt si electus sit Cardinalis absens (sicut Adriano VI. in Hispanis degenti contigit anno 1521.) quamuis enim electio effectum suum completum nondum sortita sit, & Sedes Apostolica nondum impleta dicatur, quamdiu consensus electi non accessit, non tamen ob id Sedes Apostolica vacat, quia tunc Sedes vacare dicitur, cū nullaratione Pontificem habet; in nostro autem casu aliqua ratione Pontificem habet, cū Pontifex iam electus sit, & licet nondum creatus sit, tamen est quasi conceptus, & in vtero, vt ita loquar, existit.

Tertiò non sequitur liberum esse Cardinalibus facta iam vnus electione, ab electione recedere, antequam electo consensum præstet; quia Cardinales iam ex parte sua elegerunt, & iam suo functi sunt munere, & cū ministerialiter agant, non possunt limites sibi præscriptos excedere; potestas enim ministerialis data ad aliquem actum, eo actu perfecto completur: ex quo patet Cardinales non posse tunc electionem mutare, etiamsi comperiant electum minus idoneum esse ob imperitiam, aut longè abesse, aut alio obstrictum esse impedimento, quod electionem irritam non reddit, secus si impedimentum irritam reddat electionem; tunc enim Electores non dicuntur suo munere functi, cū electio viribus careat, & perinde sit, ac si facta non fuisset; vide Iacobatium lib. 4. de Concilio, art. 3. num. 43. &

Sopranum *lib. 1. cap. 18.* quamquam Sopranus ex parte dissentit, putant Cardinales posse nouam electionem facere, dum Cardinales aduertunt electum fuisse qui longius abest, aut alium qui non nisi post longum tempus consensum præstabit, & Ecclesiæ administrationem sustinebit, vt si electus sit absens quem Cardinales Neapoli esse arbitrabantur, sed postea deprehendunt longam nauigationem suscepisse, vel ita obsideri, vt facilis ad ipsum aditus non pateat, aut si electus sit aliquis præsens, qui peracta electione in amentiam incidit, & ignoratur an sui compos aliquando sit futurus, & sibi ipsi reddendus. Ratio Soprani est, quia Cardinales iubentur quamprimum electionem peragere, & Ecclesiæ de Pastore providere, sed per huiusmodi electionem non prouidetur Ecclesiæ de Pastore; ergo possunt, & debent electionem nouam instituere.

10 Ego verò probabilius arbitror, Cardinales in tali euentu non posse nouam electionem facere, tum quia functi sunt suo munere; tum quia ex noua electione periculum imminet schismatis, à quo Ecclesia semper maximè abhorruit; tum quia licet Cardinales teneantur citò Ecclesiæ providere, & electionem accelerare, nihilominus facta semel electione, liberum ipsis non est nouam electionem instituere, & electum iure suo priuare, consequenter ipsorum culpæ ascribendum est, quòd cum elegerint, qui citò nequeat Pontificatus onera sustinere: hinc patet responsio ad rationem Soprani.

11 Rogabis ad quem pertineat Ecclesiam gubernare dum facta à Cardinalibus electione, nondum exploratus est consensus electi absentis.

Respondeo ea quæ necessaria sunt ad rectam administrationem expedienda esse à Cardinalibus, suo, & nominati Pontificis nomine; tum quia hoc conforme videtur benignæ Summorum Pontificum intentioni; tum quia ita peractum fuit post electionem Adriani VI. donec de ipsius acceptance, & consensu constaret, teste Iacobatio *lococitato*; tum quia in cap. *vbi periculum, de electione*, facultas Cardinalibus data fuit faciendi Sede vacante, quæ ad electionem Papæ, & defensio-

ensionem Ecclesiæ, & ad occurrendum imminentibus periculis pertinent, ob id Panormit. *cap. his quæ de maiorit. & obediunt.* & alij apud Manfredum *decis. 9. de Cardinalibus*, apud Iacobatium *lib. 3.* & apud Sopranum *cap. 18. §. 1.* existimant Collegium Cardinalium posse Nūcium à Pontifice antea missum reuocare, si Ecclesiæ expedire iudicauerint, item posse, & debere Concilium conuocare, si hoc ad electionem necessarium duxerint, id enim non faciunt auctoritate propria, sed auctoritate Sedis Apostolicæ, à qua huiusmodi facultatem obtinuerunt: (Concilium enim ab alio auctoritatiuè conuocari non potest, quàm à Papa, vt pluribus Iacobatius *de Concilio lib. 3.*) ergo Cardinalibus incumbit Ecclesiæ gubernatio quoad necessaria, si Papa nondum electus est; si verò electus est, sed nondum cōsensit, possunt id suo, & electi nomine præstare: nam ipsorum ius quoad administrationem, cessat per acceptationem electionis ab electo factam, electus autem nondum acceptauit electionem, vt suppono.

12 Maior difficultas est vtrum Collegium Cardinalium aliquam facultatem habeat in ipsum electum, qui electionem nondum acceptauit. Respondendum mihi videtur cum Soprano *loco citato*, habere facultatem præcipiendi, vt electionem quamprimum acceptet, vel eam respuat, si acceptare nolit. Ratio est, quia totum Collegium Sede vacante potestatem habet in singulos Cardinales, saltem in ijs, quæ ad electionem pertinent, *cap. vbi periculum citato*: ergo cogere potest electum, vt electionem acceptet, vel illam renuat, si acceptare nolit.

13 Quinta conditio est, vt eligendus sit baptizatus, sic colligitur, tum ex *cap. veniens, de Presbye. non baptiz.* tum quia character Ordinis necessario supponit characterem baptismi, vt docui *de Sacramentis*; tum quia iuri naturæ aduersatur, vt is rebus omnibus sacris præficiatur, qui ne sacra quidem attingere potest.

Obijcies Ambrosius ad Episcopatum electus fuit, antequam sacri Fontis lauacro imbutus fuisset; ergò potest etiam quis ad Papatum eligi ante Baptismum. Respondeo primò negando consequentiam.

Ad

Ad exemplum sancti Ambrosij Respon. id factum fuisse miraculosè, & extraordinario Spiritus sancti impulsu, seu de potestate Dei absoluta; quæ autem de potestate Dei extraordinaria, & absoluta fiunt, in exemplum trahenda non sunt, in ijs quæ consueto cursu, & usu fiunt, vide Caiet. opusculo 1. de comparatione Papatus, & Concilij cap. 26.

14 Sexta conditio est, vt non sit hæreticus, sed Christifidelis. Ratio est, tum quia non potest quis esse caput illius cuius nec membrum est, nec potest esse caput totius, qui est extra totum, cap. in totum; de regul. iur. in 6. & Christus statuit, vt nullus sit caput Ecclesiæ Christianæ, nisi sit membrum Christi, & qui Ecclesiam non audit, debet esse tanquam Ethnicus, & Publicanus; tum quia sic colligitur ex constitutione Iulij II. in Concilio Lateranensi, sess. 5. incipit, cum tam diuino; quamquam ibi sermo præcipuè est de hæresi simoniaca; ita Panormit. Francus, & alij in cap. licet de elect. Azor. lib. 4. cap. 5. quæsto 7. & cap. 7. quæsto 1. & alij contra Innocentium & Adrian. in cap. licet citato.

An autem Papale legitime electus, possit in hæresim incidere, & ob hæresim Papatu priuari, constat ex dictis in Bulla Cænæ disp. 1. quæst. 2. punct. 1. num. 12. & sequentibus, quidquid Ioan. Azor. 2. par. lib. 4. cap. 7. quæst. 1. & sequentibus, & multi alij in oppositum sentiant, existimantes Papam Hæreticum, vel Hæreticorum fautorem, defenso-rem, vel receptatorem, Pontificatu priuari posse.

15 Sexta conditio est, vt simoniam in electione non commiserit, nam quis simoniam in electione ad Papatum commisit, non solum tunc inualidè eligitur, verum etiam inhabilis efficitur qui in futurum eligatur, ex Iulio II. in Bulla, quæ incipit, cum tam diuino; verum vt ista conditio clariùs intelligatur, sit.

§. V N I C V S.

Vtrum electio Summi Pontificis facta per simoniam, valida sit.

S V M M A R I V M.

1. Electio Summi Pontificis facta per simoniam, inualida est.

2. Ee-

- 2 *Electio Papæ an invalida sit, dum Cardinalis gratiam suam, vel operam promittit alteri, ut se in Papam eligat.*
- 3 *Electio precibus facta, valida est.*
- 4 *Electio valida est; dum eligendus aliquid alteri tradit, ut eum ab iniusta impugnatione renocet.*
- 5 *Electio va ida est, dum Cardinalis in Papam eligendus, promittit se facturum aliquid in utilitate totius Ecclesiæ.*
- 6 *Electio valida est, dum eligendus promittit se facturum aliquid in gratiam Conclavistarum, scilicet aliorum qui ad electionem non concurrunt.*
- 7 *Simonia mentalis non vitiat electionem.*
- 8 *Simonia ut electionem vitiet, debet influere in electionem.*
- 9 *Electio an valida sit, dum facta fuit, non solum ab eo cum quo simonia commissæ fuerat, verum etiam ab alijs conferentibus suffragia sufficientia ad electionem.*
- 10 *Simonia electionem non vitiat, nisi consentiente, vel saltem conscio ipsomet electo.*
- 11 *Electus in Papam quomodo se gerere debeat dum animadvertit in sua electione simoniam factam fuisse.*
- 12 *Simonia non irritat electionem nisi commissæ fuerit ab ipso electo, vel ab aliquo ex Electoribus.*
- 13 *Simonia non vitiat electionem, dum tradita fuit res levis, & non magni momenti.*
- 14 *Simonia vitiat electionem, etiam si notoria non sit.*
- 15 *Simonia notoria quandonam dicatur.*
- 16 *Suffragia an aperienda sint, dum alicui Cardinali simonia crimen circa electionem opponitur.*
- 17 *Cardinalis an incurrat pœnas constitutionis Iulianæ, si commissæ simonia, ut in Papam eligeretur, nominatus quidem fuit, sed non electus defectu nonnullorum suffragiorum.*
- 18 *Electio Papæ irrita non est ob aliqua crimina, excepta hæres, & simonia in electione.*
- 19 *Eligendum in Papam an debeat ex numero Cardinalium esse.*

VNICA PROPOSITIO.

1 **E**lectio Summi Pontificis facta per simoniam irrita est, & inualida, quia expresse irritatur à Iulio II. in *Bulla*, quæ incipit, *cum tam diuino*, vbi irritatur electio simoniacè facta, dando, promittendo, recipiendo pecunias, bona cuiuscumque generis, officia, beneficia, &c. per se, vel per alium, & tam pro se, quàm pro alio, vt patet ex dicendis *disp. 2. quæst. 6.* vbi constitutionem Iulij II. ex professo explicabo.

Hinc sequitur primò electionem factam pecunia, muneribus, promissione officij, vel beneficij, & similibus inualidum esse, quia ista electio simoniaca est, ita Albanus *quæst. 25.* & alij communiter.

2 Secundò sequitur probabiliùs dici posse, inualidam esse electionem dum Cardinalis amicitiam suam, gratiam perpetuam, vel operam, non quidem ex vrbantate, sed ex obligatione ciuili pollicetur, si votum tradiderit sibi, vel alteri, quem in Papam eligi cupit, hæc enim electio simoniaca est, cum fiat præuia promissione alicuius boni, vel obligationis pretio æstimabilis: contrarium valde probabiliter docent Gambara in *expositione huius Bullæ, num. 133.* Sopranus in *manuscriptis de electione Papæ, lib. 4. cap. 2. quæst. 15.* & alij asserentes simonia præfata non vitiari electionem, quia illo nomine bona cuiuscumque generis, inquit ipsi, intelligitur id quod possidetur, & quod potest fieri accipientis; & nomine obligationis intelligitur obligatio ad præfata bona, quæ videlicet possidentur, & cum versemur in materia pœnali, non est facienda extensio, sed restrictio.

3 Tertiò sequitur, electionem precibus, suasionibus, & hortationibus factam, irritam non esse, quia hæc simoniacam electionem non efficiunt, alioquin precibus impetrans beneficium à Papa, vel ab alio, simoniam committeret, & obtinens aliquid à Deo præuia oratione, labem simoniæ incurreret.

Dices simonia committitur non solum munere à manu, & ab obsequio, verum etiam à lingua: preces autem sunt munus à lingua.

Respon-

Respondeo, negando preces esse munus à lingua ; cùm is cui preces funduntur nihil ob id recipiat, vel recepturus sit, sicut accipit is, cui laus, vel linguæ officium apud alium promittitur ; preces igitur præcisè sumptæ simoniæ crimen non pariunt, nisi fortè precibus adiungantur pollicitationes, seu promissiones pecuniæ, vel alterius boni temporalis, iuxta dicta *illatione præcedenti, & in tractatu de simonia.*

4 Quartò sequitur electionem validam esse, dum Cardinalis permittit, vel tradit aliquid non ad impetrandum suffragium, sed eo solum fine, vt ab impugnatione retrahat eum, qui ipsius electionem iniuste impedit, vel impugnat. Ratio est, quia electio non est simoniaca, cùm nihil tradatur ad obtinendam electionem, sed ad redimendam iniustam vexationem ; quilibet enim ius suum tueri potest, ita communiter Doctores in genere loquentes ; quamobrem si eligendus, Principi suam electionem iniuste oppugnant, dicat se futurum illius amicum, seu patrem, & iudicem, omnibus fidelibus æquum, & propitium, simoniam non committit ; secùs dicendum est, si tradat aliquid ad impediendum iustam impugnationem, & oppositionem, vel ad auertendam iniustam impugnationem, & simul etiam ad impetrandum suffragium, hæc enim electio simoniaca est, cùm pretio impetretur ; quamobrem si quis Principi, vel Cardinali sibi infenso dicat, se, cùm in Papam electus fuerit, talia & talia in ipsius gratiam præstiturum simoniam committit, quia promissionibus non solum auertit iniustam vexationem, verum etiam vota, & suffragia aucupatur, id tamen intelligi ab aliquo posset iuxta dicta *num. 2. vide quæ in simili tradidi in meo tractatu de simonia.*

5 Quintò electionem validam esse, dum Cardinalis eligendus in Papam, promittit alijs Cardinalibus se facturum aliquid in vtilitatem totius Ecclesiæ, seu id, ad quod Papa tenetur ex officio, hæc enim electio simoniaca non est, cùm solum exigatur id, quod officio, seu dignitati, ad quam eligitur adnexum est, seu quod vtilitatem respicit totius Ecclesiæ, cui Papa maximè consulere debet, alioquin etiam

G simo--

simonia committeretur, dum is cui Canonicatus confertur, iurât se præstiturum ea, quæ ad suum pertinent officium, ita communiter Doctores in genere loquentes, in specie verò Andr. Barbat. tom. 1. *conf. 1. Sopranus lib. 4. cap. 2. loco citato quæst. 2 1. casu 1. & Gambarini compositione Bullæ Iulij II. num. 130. & sequentibus.*

6 Sextò validam esse electionem, dum Cardinalis promittit se aliquid in gratiam Conclauistarum, aut aliorum facturum, si ad Papam assumptus fuerit; nam ista electio non dicitur facta per simoniã, cum promissio facta non fuerit in gratiam eligentium, nec sit causa electionis, vt constabit ex infrà dicendis *limitatione 2.*

Septimò inualidam esse electionem, dum Cardinales inter se conueniunt, vt qui in Papam electus fuerit sua beneficia, & officia, aut alia tunc temporis vacantia conferat ijs, qui suæ electioni cooperati fuerint; nam huiusmodi electio simoniaca est, vtpote facta præuia conuentione, seu promissione beneficiorum, aut aliorum bonorum. Nonnulli tamen Doctores oppositum sentiunt, innixi ratione, quam in proximè sequenti obiectione afferam.

Obijcies, illa conuentio non habet rationem pactionis, seu quasi contractus, sed quasi legis; ergo electio vi illius facta, simoniaca non est. Respondeo illam conuentionem vim legis habere non posse, tum quia Cardinales nequeunt huiusmodi leges condere Sede vacante, *cap. vbi periculum, de electione*; tum quia, si vim legis haberet, non afficeret electum in Papam, cum Papa nullum in terris superiorem habeat, Papa enim assécutione Papatus, à legum humanarum iugo eximitur; ergo illa conuentio vim, & naturam conuentionis retinet, aut saltem suspitione labis simoniacæ non caret, obseruant tamen Sopranus *loco citato quæst. 2 1. casu 2.* & alij, conuentionem qua Cardinales conueniunt, vt qui in Papam electus fuerit, inter Cardinales præsentēs sua beneficia, & officia distribuat, simoniacam quidem esse, si ob id aliquis Cardinalium moueatur ad eligendum diutorem, vt plura beneficia vacent, & plus sibi obueniat, nihilominus hanc electionem irritam non esse, quia huiusmodi simonia non est

noto-

notoria, cum non constet an aliquis hoc fine ditio-
rem elegerit, sicut neque constat, utrum ditior ex Cardinalibus eam con-
ventionem fecerit, eo affectu, ut ipse præ cæteris eligeretur. Verum quid ego hac
in re sentiam, constabit ex dicendis *num. 14.*

7 Limitantur, & intelliguntur, quæ diximus in præfata propo-
sitione. Primò, modò simonia non sit tantummodo intentionalis, seu
mentalis; nam actus merè internus sub legem humanam non cadit,
ut docui *de legibus*, sufficit tamen simonia realis ex parte dignitatis
re ipsa obtentæ per simoniam, etiamsi res promissa nondum tradita
sit; nam Pontifex absolute irritat electionem simoniacè factam, dan-
do, vel promittendo: quid autem sit simonia mentalis, realis, & con-
ventionalis, patet ex dictis *de simonia*, & communiter traditur à Do-
ctoribus.

8 Limitatur secundò, modò simonia influxerit in electionem; quam-
obrem si Cardinalis alium pretio corrumpit, ut se ipsum eligeret, sed
corruptus mutata voluntate alium elegit, electio valida est. Ratio
est, tum quia pœna ob aliquod delictum imposita non incurritur ef-
fectu non secuto, in hoc autem casu effectus secutus non est, cum fa-
cta non fuerit electio, cuius intuitu simonia commissæ fuerat; tum
quia Iulius II. in sua constitutione irritat electionem factam per si-
moniam; ista autem electio non fuit facta per simoniam, cum simo-
nia non fuerit illius causa, & in illam non influxerit, quamvis dici pos-
sit facta cum simonia concomitante, & electus simoniæ reus sit, ut
bene Sopranus *loco citato quest. 16.* & alij. Ex quo patet à fortiori ele-
ctionem validam esse, si postea is, qui simoniam commiserat, ut eli-
geretur, eligatur solum ab ijs, qui simoniam non commiserant, hæc
enim electio non dicitur facta per simoniam.

Obijcies cōtra istam limitationem, etiamsi admittamus præfatam
electionem non esse inualidam, eo quod simonia illius causa non fue-
rit, nihilominus inualida videtur defectu Cardinalis, qui simoniam
commiserat, hic enim priuatus ipso facto remanet Cardinalatu, ut
dicitur in *Bulla Iulij II.* Electio autem Papæ facta ab ijs, qui non sunt

Cardinales, irrita est, *cap. in nomine Domini, 23. dist. & c. licet, de elect.*

Responderi posset, primò Cardinalem simoniacum adhuc Cardinalem esse, cùm non teneatur se Cardinalatu abdicare ante sententiam criminis declaratoriam, si sequamur sententiam asserentium neminem teneri pœnam, quæ actionem hominis ad sui executionem requirit, subire ante sententiam saltem criminis declaratoriam, de qua re sufficienter egi in *tractatu de legibus*.

Respondeo secundò cum Soprano *loco citato quest. 17. & alijs*, Cardinalem priuari Cardinalatu ob simoniam commissam simoniacè eligendo, hunc autem simoniacè non elevisse, vt suppono, cùm simonia non fuerit causa efficiens electionis, sed solùm concomitans, & per accidens, consequenter electio ex neutro capite inualida est, vide quæ suprà tradidi *quest. 1. obiect. 1. num. 8.*

9 Rogabis vtrum electio valida sit, quoties quis electus fuit, non solum ab eo, quem pretio corruerat, verum etiam ab alijs simoniæ labi non infectis, quorum vota sufficiunt ad electionem, etiam exceptis votis, & suffragijs simoniacorum.

Respondentaliqui Doctores electionem inualidam esse. Ratio est, tum quia ista electio dicitur facta per simoniam, cùm simoniacus ad illam suo voto cooperatus sit, sicut cooperati sunt cæteri simoniaci simoniæ labi expertes; tum quia Iulius II. in sua *Bulla*, statuit, vt electus per simoniam Apostolicus sit, etiam si vota omnium habeat nemine discrepante, ita Soprano *quest. 18.* Contrarium improbabile mihi non videtur, vt constabit ex dicendis, *quest. 5. punct. 1. num. 9.*

10 Tertiò limitatur, modò simonia commissæ sit, consentiente, vel saltem conscio ipsomet electo, & non contradicente. Ratio est, tum quia gravis pœna Ecclesiastica graue delictum supponit, nullum enim est peccatum nisi voluntarium, non potest autem esse voluntarium sine præuia cognitione, tum quia Iulius eam irritat electionem, ob quam electus accusari potest, tanquam de indubitata hæresi, is autem qui non consentit in simoniam, aut qui eam ignorabat, accusari non potest tanquam de indubitata hæresi, ita P. Andreas Gamba-

ra

ra in expositione Bullæ Iulij II. num. 137. & Sopranus lib. 4. cap. 1. quæst. 4. Immo addit Sopranus quæst. 8. non posse legem ferri qua irritetur electio Papæ simoniacè facta, in scio ipso electo. Ratio est, tum quia innocens puniri non potest ob alterius delictum, poena enim sub ratione poenæ imponitur, vt delictum puniatur, & delinquens corrigatur, consequenter infligi debet illi, in quo est delictum, alioquin non corrigeret delinquentem, sicuti lignum distortum, & curuum nō efficitur rectum directione, & correctione erga aliud lignum adhibita; tum quia Iure Ciuili cauetur, ne poena imponatur ei, qui culpā non commisit, l. *fancimus*, C. *de pœnis*; idemque decernitur Iure Canonico, cap. *crimen*. 1. quæst. 4. cap. *si habes* 24. quæst. 3. & in Scriptura Ezechielis 18. dicitur, *anima quæ peccauerit ipsa morietur*, & *filius non portabit iniquitatem patris*. Verum quid ego sentiam in hac vltima additione, seu ampliatione Soprani, constat ex dictis in tract. *de legibus disp.* 2. quæst. 7. punct. 3. cum S. Thoma, Vasquez, Valentia, & alijs, & ex dictis *de simonia*, vbi contrarium sustinui, & probaui.

Obijcies Iulius II. in præcitata Bulla irritat electionem Papæ factā per simoniam ab ipso electo commissam, vel ab aliquo ex Electoribus; cū autem Electores possint simoniam committere, in scio, & non consentiente Papa electo, sequitur electionem simoniacam, irritam esse, etiam si electus non consenserit, vel in scius fuerit, alioquin Iulius II. frustra locutus fuisset, sub illa forma disiunctiua, ab electo, vel ab aliquo ex Electoribus.

Respondeo Iulium II. irritare electionem simoniacè factam, videlicet consentiente, vel in scio electo, hæc enim limitatio, seu tacita interpretatio non est voluntaria, & conficta, sed quasi necessaria, vt patet ex rationibus in hac tertia limitatione allatis. Neque hinc sequitur illam formam disiunctiuam frustra adiectam fuisse: nā addita fuit ad irritandam electionem simoniacè factam ab electo, aut ab alio, in scio ipso electo, licet ipse non mandauerit, nec consenserit, vt benè Sopranus lib. 4. cap. 1. quæst. 4. vers. *Dico* 3.

II Rogabis quomodo gerere se debeat electus qui animaduertit simo-

simoniam ab aliquo commissam fuisse. Respondeo iuxta dicta in simili de *simonia* teneri reclamare, & talem electionem respuere detegendo simoniæ crimen, simulque curare, vt electio iterum instruat, ita Sopranus in *manuscriptis de electione Pontificis, lib. 4. cap. 1. quest. 4. sub finem*, & alij communiter quos in simili retuli de *simonia*.

12 Limitatur quartò, modò simonia committatur ab ipso electo, vel ab aliquo ex Electoribus, sic enim expressè habetur in *precitata Bulla*. Ex quo sequitur primò electionem non vitari, quoties simonia ab alijs committitur infcio electo, vel Electoribus: quamobrem si Princeps, aut alius pecuniam tradat consanguineo alicuius Cardinalis, aut alteri qui gratia apud ipsum valet, vt Cardinalem inducat ad certum aliquem eligendum, electio irrita non est, quia simonia commissæ non fuit ab electo, aut Electoribus, vt suppono? Secundò sequitur irritam esse electionem, quoties Princeps aut alius tradit aliquid Cardinali, vt certum aliquem eligat.

13 Limitatur quintò à Gambara in *expositione Bullæ Iulij II. num. 122. à Soprano lib. 4. cap. 2. quest. 12.* & ab alijs à me relatis in *tract. de simonia*, nisi pecunia quæ traditur sit levis summæ, seu modici, & non magni momenti. Ratio est, tum quia sicut paruitas materiæ excusat à mortali, ita etiam à pœna graui, quæ ob grauem culpam inducta fuit; tum quia Iulius II. in *dicta Bulla*, dicit pecunias, nō pecuniam; id modicum censendum videtur, quòd iudicio prudentis viri non est sufficiens, ad flectendum, seu corrumpendum animum. Alij verò probabilius arbitrantur electionem vitari, quoties res, seu pecunia etiam non magni momenti, causa fuit talis electionis. Ratio est, tum quia huiusmodi electio simoniaca est, & mortaliter peccaminosa; tum quia Pontifex irritat electionem factam simoniacè, tradendo, vel recipièdo bona cuiuscumque generis, ita in simili sentire videntur. Nauarr. *consil. 52. de simonia*, & Suarez. *de simonia lib. 4. cap. 53. num. 17. & cap. 56. num. 6.* asserentes excommunicationem ob simoniam, in ordine, vel in beneficio impositam, incurri dum ordine, vel beneficio iam collato ex præuio pacto, soluitur pars, licet minima pretij conuenti; sen.

sententia tamen Gambaræ, & aliorum probabilis est; vide quæ tradidi de *Simonia quæst.* 3. *num.* 13.

14 Limitatur sextò ab aliquibus, modò simonia notoria sit. Ratio est, tum quia hoc pacto vitantur multæ fraudes, & incommoda, quæ in Ecclesia suboriri possent, irritata electione ob quamlibet simoniã, quilibet enim Electorum confingere posset, se labem simoniæ in talis Papæ electione commisisse, aut saltem (quia allegans propriam turpitudinem facilè repellitur) inducere posset alium, qui de huiusmodi crimine accusaret; sicque probata falsis testibus simonia, Papam excluderet; tum quia illa simonia electionem irritat, cuius exceptio opponi potest, exceptio autem simoniæ opponi non potest, nisi simonia sit notoria, vt patet ex *Bulla Iulij II.* Summus enim Pontifex ibi loquitur de simonia quæ possit contra sic electum opponi, sicut de vera, & indubitata hæresi: hæresis autem, seu crimen, tunc verum & indubitatum videtur, quando est notorium; præterea post factam oppositionem de simonia, recedendum est ab electo, non expectata ulla sententia, sicut receditur ab hæretico in Papam electo, cum autem ab Hæretico in Papam electo recedendum non sit, nisi hæresis notoria sit, *cap. 1. dist. 23.* & ibi glossa sequitur; neque recedendum ab electo simoniacè, nisi simonia notoria sit, ita P. Andreas Gambara in *extravagantijs Iulij II. num.* 33. Tuschus *tom. 2. littera E. concl.* 57. Cardinalis Iacobatius de *Concilio lib. 4. art. 4. num.* 84. Sopranus loco citato *quæst.* 5. & 7. & alij apud Iacobatium loco citato.

Addit autem Sopranus *quæst.* 6. simoniam tunc notoriam esse quando de ea per instrumentum publicum constat.

15 Ego verò dico primò, simoniam notoriam esse, quoties in præsentia multorum perpetrata fuit, & nulla rationabili tergiversatione celari potest, vt in simili alibi docui, de *percussione Clerici*, aut quoties simoniacè electus, simoniæ crimen in iudicio confessus fuit, aut quoties de tali crimine fama publica ex indicijs sufficientibus orta est.

Dico secundò, probabilius mihi videri electionem simoniacam in foro conscientie irritam esse, etiamsi notoria non sit. Ratio est, tum
quia

quia Iulius II. absolutè irritat electionem simoniacam, modò simoniâ perpetrata fuerit ab electo, vel ab eligentibus, & frustra ab aliquibus Doctoribus additur, huiusmodi electionem debere esse notoriam, Pontifex enim istam conditionem non addit, alioquin cuique liberum esset, clausulas legibus addere, & limitationes contra expressam legislatoris mentem confingere; tum quia sicut omnes excommunicati vitandi erant ante extrauagantem *Ad euitanda*; post illam verò vitandi sunt tantummodo excommunicati denunciati, & notorij, ita omnis simoniaca electio Pontificis irrita est, nisi aliter decernatur.

Ad rationes in contrarium. Respondeo, illas solum procedere pro foro externo, seu ad probandam, vel admittendam exceptionem de simonia, dum Papa nondum receptus fuit, vt tradit Iacobatius *lib. 4. art. 4. num. 44. 70. & sequentibus*.

Ex quo sequitur primò, duos, vel tres qui inter se simoniacè paciscuntur de electione, non solum affici excommunicatione, & alijs pœnis, vt concedunt etiam Gambarà, & Sopranus *locis citatis*, verum etiam electionem irritam efficere, vt probatum est, licèt præfati Doctores electionem validam esse arbitrentur.

Secundò irritam esse electionem, quoties Cardinalis qui Papatum affectabat dedit alteri Cardinali prædium, hoc solum fine, vt ei votum in electione conferret. Ratio est, quia ista actio est verè simoniaca ex parte dantis, consequenter electionem vitiât. Oppositum sustinetur ab aliquibus Doctoribus, quia licèt hæc datio simoniaca sit ex parte dantis, nihilominus non est notoria, & manifesta, etiam si fortè omnes præsumpserint simoniæ labem in huiusmodi donatione fuisse; dixi ad hunc solum finem, quia si tradat animo conciliandæ sibi beneuolentiæ, vt postea, ea mediante, suffragium illius obtineat, electio non subuertitur, quia hæc non est propriè simonia, vt suo loco docui.

O hijcies primò, si electio simoniaca, licèt occulta, irrita esset, sequeretur acta Pontificis hoc pacto electi irrita esse, cōsequenter plurima

rima absurda, & incommoda in Ecclesia sequerentur. Respondeo negando sequelam, ut alibi probavi, *ex l. Barbarius, ff. de officio Prætoris*, Ecclesia enim in tali euentu supplet id, quod supplere potest.

Obijcies secundò, Summus Pontifex non ligatur legibus humanis quoad vim coactiuam; ergo illius electio irritari non potest. Respondeo Papam non ligari legibus humanis, electionem tamen legibus humanis subijci, Ecclesia enim formam electionis præscribit, qua nõ seruata, non tenet electio; consequenter electus forma non seruata, non est Papa, cum Papa constituatur per legitimam electionem, ut bene Azor. 2. part. lib. 4. cap. 5. quæst. 7. vers. Et certè, & alij Doctores communiter de hac re agentes.

16 Quæres primò, vtrum suffragia publicari possint, dum alicui Cardinali simoniæ crimen circa electionem opponitur. Respondeo affirmatiuè dum crimen aliter purgari non potest. Ratio est, tum quia Iulius II. statuit semper posse opponi contra simoniacè electum, cum autem ista oppositio aliquando nequeat alia ratione purgari, quàm publicatione suffragij, sequitur suffragium tunc temporis publicandum esse, tum quia Gregorius XV. in sua Bulla de electione Pontificis, decreuit suffragium electi aperiri, quando suboritur casus, ut sciri debeat, an aliquis sibi suum suffragium contulerit, ergo à simili, &c. ita Sopranus lib. 4. cap. 29. quæst. 18. & 19.

17 Quæres secundò, vtrum pœnæ istius constitutionis Iulianæ incurrantur ab eo qui simoniam commisit, ut in Papam eligeretur, qui postea nominatus quidem fuit, sed non fuit electus, eo quod nõnulla suffragia ad congruam electionem ei defuerint. Respondeo primò, pœnas istius constitutionis non incurri, licèt aliæ pœnæ iure cõmuni contra simoniacos editæ contrahantur. Ratio est, quia Iulius II. has pœnas non imposuit ob nominationem simoniacam, seu ob electionem incompletam, sed ob completam; nam loquitur de illa electione, ob quam electus sublato defectu simoniæ, ius ad Papatum haberet, & posset esse verus Papa, ita Sopranus loco citato, quæst. 20. vers. Sed tamen dicendum.

18 Quæres tertio, vtrum sicut electio Papæ infecti labe hæresis, vel simoniæ, irrita est, ita etiam irrita sit, si Papa notoriè criminofus eligatur. Respondeo negatiuè, ratio est, tum quia nullo iure constat huiusmodi electionem irritari; tum quia contra Papam aliàs legitimè electum, non potest aliud vitium, præter simoniam, & hæresim opponi, *cap. licet, de electione*; ergo electio irrita non est, ob alia crimina, etiam si grauiter peccent ij, qui criminofum scientes eligunt. Abb. in *cap. licet, de elect.* Azor. 2. p. lib. 4. cap. 5. quæst. 7. vers. *Rogabis*; Iacobatius de Concilio lib. 4. art. 9. num. 3. Gambarà in *extrauag. Iulij II. num. 164. Sopran. lib. 4. cap. 5. ad finem*, & alij communiter, idem sentientes de eligète indignum ad alias dignitates & officia, vide *supradicta quæst. 1. puncto 3. num. 3. & seqq.*

19 Quæres quarto, vtrum Papa eligi debeat, ex ipso Collegio, & numero Cardinalium. Respondeo eligendum esse ex numero Cardinalium, si habilis, & idoneus inter ipsos reperiatur, *cap. in nomine, distinct. 23.* verum si eligatur aliquis extra Collegium, etiam dum aliquis ex Collegio Cardinalium habilis reperitur, electio tenet. Ratio est, quia in *cap. licet, de electione*, simpliciter decernitur, vt electus à duabus Cardinalium partibus recipiatur, nec alibi oppositum cauetur in hoc casu, ita Sotus lib. 4. de inst. quæst. 6. art. 2. ad 5. Azor. 2. part. lib. 4. cap. 5. quæst. 6. Cardinalis Tuschus tom. 3. littera E. conclus. 5. 7. num. 24. Gondislaus de orig. & potest. Cardinalium quæst. 5. num. 31. Iacobat. de Concil. lib. 1. fol. 44. Manfred. de Cardin. decis. 265. vide infra dicenda disput. 2. quæst. 2.

Q V A E S T I O I I I.

De requisitis ex parte loci ad validam Summi Pontificis Electionem.

S V M M A R I V M.

1 Electio facienda est in Conclau clauso.

2 Ele-

- 2 *Electio facta Conclauis clauso valida est, etiam si forte ibi aliqui extranei lateant.*
- 3 *Conclauis nomine quid intelligatur.*
- 4 *Conclauis ubi constituendum sit.*
- 5 *Conclauis anticonstituendum sit in Palatio Papæ.*
- 6 *Conclauis iam clauso quinam in illud admitti possint.*
- 7 *Conclauis clausa an consensus omnium Cardinalium requiratur, dum aliquis in Conclauis admittendus est.*

V N I C A P R O P O S I T I O .

ELECTIO Summi Pontificis facienda est in Conclauis iam clauso, hæc propositio patet, Primò, ex iure antiquo *in cap. ubi periculum, de electione.* Secundò ex constitutione Gregorij XV. in qua non solum præcipitur electionem in Coclauis clauso celebrari, verù etiam electio aliter facta irritatur, ibi, *Quod si electio alibi celebrata fuerit, quàm in Conclauis clauso, nulla sit, & inualida, eo ipso absque ulla declaratione.* Tertiò quia expedit electionem in Conclauis clauso fieri, vt liberè fiat sine metu, coactione, sordibus, & his similibus; ex quo patet quæ ratione ductus, sit Gregorius XV. ad irritandam electionem, Conclauis nondum clauso factam.

Obijcies primò, ex istius constitutionis, & clausuræ obseruantia, grauissima sequi possunt incommoda; Primò enim fieri potest, vt electio malitiosè ab aliquibus impediatur, si Conclauis clauso, dum Cardinales ad electionem in capella conuenerunt, aliqui Conclauis perfringant, vel ingrediantur; Secundò irrogari posset iniuria Spiritui sancto, nam si Cardinales Spiritu sancto afflati statim ac Conclauis ingressi sunt, illudque nondum claudi curarunt, vna voce aliquem in Papam eligerent, huiusmodi electio inualida esset, contra dictamen, & inspirationem Spiritus sancti; qui *ubi vult spirat*, nec humanis subiacet legibus, & *ubi Spiritus Domini, ibi libertas.* Respondeo hæc incommoda non obesse; ad primum enim dico electionem validam esse, quia Conclauis cum iam clausum fuerit, moraliter cèsetur

clausum, & pro clauso habetur, ad effectum validitatis electionis; donec de consensu duarum partium Cardinalium in Conclavi præfentiū per secreta suffragia apertum esse declaratur; vide Cæremoniae electionis pag. 100. vers. *Quoniam autem*, ubi assertur forma claudendi Conclauē, & declaratur quamdiu clausum censeatur.

Ad secundum, Dico primò hunc casum nunquam fortè euenturū peculiari Spiritus sancti impulsu; nam Spiritus sanctus non est sibi cōtrarius, & sicuti verisimile est istam constitutionem impulsu Spiritus sancti conditam fuisse, (Spiritus enim sanctus Summo Pontifici præsertim in grauioribus assistit) ita existimandum censeo Spiritum sanctum ad illius obseruantiam cooperaturum. Dico secundò in præfato casu, si daretur, inspiciendum esse, vtrum constet id miraculosè, & ex peculiari Dei dispositione fieri, vel non; si non constat miraculosè fieri, electio valida non est; tum quia, quæ à Spiritu sancto via ordinaria fiunt, subiacent legibus Pontificis, vt patet in sacrificio Missæ, in absolutione à peccatis, in administratione Sacramentorum, quæ sunt actiones à Spiritu sancto, nihilominus cū via ordinaria fiant, subiiciuntur legibus Pontificis; ita vt licitè fieri non possint, nisi tali loco, tempore, & circumstantijs ab Ecclesia præscriptis; tum quia facilè credendum non est omni Spiritui, inquit Apostolus, tum quia Spiritus sanctus, qui semel afflauit, afflabit etiam clauso Conclauī; si constat id miraculosè fieri, electio valida est; tum quia opera miraculosa non cadunt sub humanam dispositionem, & quæ à Spiritu sancto de potentia absoluta fiunt, nullis legibus, aut rationibus humanis subiacent, *causi cum pridem de renunc. & cap. duæ sunt* 19. q. 2. tum quia Papa non est Deo superior, sed ipsius Vicarius; Vicarius autem non irritat facta Principis, cuius vices gerit.

2 Regabis, vtrum valida sit electio Papæ facta in Conclavi clauso, sed ibi existentibus aliquibus, qui facultatem ibi existendi non habeant. Respondendum mihi videtur validam esse, tum quia electio facta videtur in Conclavi clauso; Conclauē enim non amittit clausuram præcisè ob alicuius ingressum, contra Iuris dispositionem, vt apertè

apertè constat in simili de clausura Monialium; & ex Cæremoniali loco citato, tum quia versamur in materia poenali, in qua benignior interpretatio facienda est. Contrarium ex parte docet Sopranus lib. 3. cap. 8. & 9.

Obijcies, propter quod vnumquodque tale, & illud magis, Authent. multò magis, C. de sacros. Eccles. sed præcipitur Conclaue claudi, & obstrui, vt extranei excludantur, alioquin electio irrita est, & inualida; ergo multò magis irrita, & inualida est electio facta omnibus extraneis non exclusis, cum obstrui Conclaue præcipiatur propter extraneorum exclusionem. Respondeo illam propositionem valere, dum finis præcepti est materia præcepti, in nostro autem casu admissio, seu existentia alicuius extranei in Conclauis iam clauso, non est materia præcepti irritantis electionem factam Conclauis nondum clauso; nam fieri potest, vt Conclaue clausum sit, etiamsi ibi extraneus aliquis absque debita facultate existat, vt patet ex Cæremoniali loco supra citato.

An autem hic peccet, & excommunicatione ligetur, explicabitur infra disp. 2. quæst. 4.

3 Rogabis secundo, quid nomine Conclauis intelligatur. Respondeo intelligi locum in ædibus, qui clauditur clauis communi ijs, qui ad illud accedere debent: Ex quo licet inferre in Conclauis non debere vlla loca clausa adesse, quæ Cardinales adire nequeant, alioquin Conclaue non diceretur, fieri tamen potest, vt aliqua loca sine Conclauis clausa, quia satis est, vt ipsis peruia, & aperta sint loca deputata ad obsequia, ad quæ ipsi adhibentur; vide infra dicenda. quæstio 5. puncto 3. num. 2.

4 Rogabis tertio, vbi construendum sit Conclaue in quo Summi Pontificis electio facienda est. Respondeo distinguendo, vel Papa perijt in aliqua vrbe in qua residebat; vel perijt in vrbe in qua non residebat; vel in nulla vrbe perijt. Si perijt in vrbe in qua residebat, & Curiam habebat, in ea vrbe construendum est Conclaue, ibique facienda est electio, cap. vbi perit. de elect. Clem. ne Romani, vers. Sanè, de elect.

et eff. & constabit ex dicendis, *disp. 2. quest. 3. questio 1.* Si perijt in vrbe in qua non residebat, nec Curiam habebat, vt si in vno loco Pontifex existeret cum sua familia, & alibi causarum Tribunal, seu Curia Romana residebat, electio facienda est, vbi Romana Curia, seu causarum Tribunal existeret, quia in *prefato cap. vbi periculum*, habetur electionem faciendam esse, in ea ciuitate, in qua Summus Pontifex cum sua Curia residebat; si ergo Romana Curia ibi non existeret, sed Romæ. Electio Romæ facienda est, ita decisum fuisse Romæ post mortem Pij II. qui Auignione diem suum clausit extremum, relicta Romæ Curia, testatur Cardinalis Papiensis, *lib. 1. suorum Commentariorum*; & Sopranus præceptor meus in *manuscriptis*, de electione Summi Pontificis, *lib. 3. cap. 7.* idem sentire videtur Iacobatius *lib. 9. art. 8. de Concilio*.

Si verò Papa in nulla vrbe perijt, Conclauē constituendum est in ciuitate, in cuius districtu, territorio, seu diocesi mortuus est; si verò illud territorium, nullam habet ciuitatem, Conclauē construī posse videtur in loco, quem Cardinales pro tempore opportuniorem iudicauerint, quia locus in hoc casu non videtur ipsis præcisè definitus Gemin. in *cap. vbi periculum*. Manfred. *decis. 293.* Abb. *quest. 29.* Sopranus *lib. 2. cap. 1.* Neque obstat locum interdictum esse, quia acceleratio electionis Pontificis iustam exhibet causam non seruandi interdictum. Platea de *excomm. §. si*; & alij apud Iacobat. *lib. 4. art. 4. num. 94.* quorum opinionem limitandam cenſeo, modò necessitas electionis vrgeat, alioquin electio faciendā videtur in ciuitate viciniore nō interdicta, vt decernitur in *cap. vbi periculum*, §. *porro de electione*. Vbi autem faciendā sit electio, quando Sedes vacat per renunciationem factam per Procuratorem, Papa alibi existente, Iacobat. *lib. 9. art. 8.* putat faciendam esse in loco, in quo facta fuit renunciatio per Procuratorem; nam Sedes ibi vacare dicitur: Ego verò existimarem electionem potius faciendam esse, vbi est Curia, nisi aliud iusta causa suadeat, vt colligitur ex dictis.

5 Maior difficultas videtur, vtrum Conclauē construendum sit in Pala-

Palatio Papæ. Respondeo, regulariter loquendo, construendum esse in Palatio Pontificis, vt colligitur ex cap. *ubi periculum*, de elect. in 6. vbi Gregorius X. in Concilio Lugdunensi statuit, vt Cardinales presentes post decem dies à morte Pontificis conueniant in Palatium; hoc tamen non est de substantia electionis, neque necessarium est ad electionem, licet, regulariter loquendo, seruandum sit ex Clemente V. cap. *ne Romani de electione*, & cap. *ubi periculum*, §. *hoc sacro de electione*; ita Manfredus de Cardinali cap. 21. col. 2.

6 Rogabis quartò, qui admitti, & intromitti possint in Conclaue iam clausum. Respondeo admitti posse eos, qui faciunt, & conferunt ad electionem, cap. *ubi periculum* cit. ibi; Nulli ad eosdem Cardinales aditus pateat, vel facultas secretè loquendi cum eis, nec ipsi ad se venientes admittant, nisi eos, qui de voluntate omnium Cardinalium, ibi presentium pro ijs tantum qua ad electionis negotium pertinent.

Ex quo patet primò intromitti posse Iurisperitum, Tabellionem, Religiosum, si id electionis causa exigit, Secundò, patet Laicos ad eligendum Pontificem admitti non posse; tum quia id non pertinet ad negotium electionis, nec Cardinales Laico huiusmodi ius conferre possunt, cum enim ius electionis spirituale sit, non potest conferri Laico, nisi à Summo Pontifice, cap. 2. de iudic. & cap. 4. de consuetudine, & cap. causa de constitutionibus.

7 Si petas vtrum consensum omnium, & singulorum Cardinalium necessarius sit, dum quis in Conclaue intromittendus, vel admittendus est, vt loquatur. Respondent Ioannes Monachus in cap. *ubi periculum* citato, num. 7. Sopran. loco citato cap. 19. ad finem, sufficere cōsensum maioris partis; Archid. verò, & Anchar. arbitrantur requiri consensum omnium, & singulorum, nullo excepto.

Sed mihi distinguendum videtur; vel consensus præstat à Cardinalibus collegialiter congregatis, & consentientibus, vel non; si præstat à Cardinalibus non collegialiter consentientibus, existimo requiri consensum omnium, & singulorum, quia, cap. *ubi periculum*, gener aliter loquitur, ibi omnium Cardinalium inibi presentium, si verò consensus

sensus exhibetur à Cardinalibus collegialiter congregatis, existimo sufficere consensum maioris partis; nam quæ à maiori parte Capituli, seu Collegij fiunt, ab omnibus fieri censentur, nisi aliud in particulari casu decernatur, *cap. denique 2. q. 2. & c. quia propter de elect.* vide quæ infra tradam, *disp. 2. quest. 4.* ubi explicabo excommunicationem latam contra eos, qui Cardinales secretò in Conclavi alloquuntur.

Q V Æ S T I O I V.

De requisitis ad electionem Summi Pontificis ex parte temporis.

Duo in hac quæstione breuiter explicabo: primò, quònam tempore fieri debeat Summi Pontificis electio: secundò, vtrum electio facta vltra præscriptum tempus, valida sit.

S V M M A R I V M.

- 1 Electio Summi Pontificis facienda non est ante decem dies ab obitu Pontificis, nec vltra differri debet.
- 2 Electio Pontificis quandònam fieri possit, ante lapsum decem dierum, & quando non vltra differri possit.
- 3 Pontificis electio ex graui causa vltra decem dies differri potest.
- 4 Electio Pontificis facta ante elapsos decem dies, valida est.
- 5 Electio dilata vltra decem dies, valida est.
- 6 Electio an nocturno tempore fieri possit.
- 7 Electio nocturno tempore inchoata, & absoluta, irrita non est.

P R I M A P R O P O S I T I O.

- 1 **E**lectio Summi Pontificis, non est facienda ante decem dies integros ab obitu Pontificis, nec vltra decem dies differri potest; hæc propositio duas habet partes: Prima est, electionem faciendam

ciendam non esse ante decem dies ab obitu Pontificis. Ratio est, tum quia ita præscribitur *in cap. ubi periculum*, in quo præceptum Cardinalibus iniungitur conueniendi ad electionem Pontificis decem diebus elapsis; tum quia Cardinalibus absentibus iniuria fieret, electione ante decem dies facta; ipsi enim intra decem dies expectandi sunt, Summis Pontificibus hoc ipsis priuilegium cōcedentibus, præsertim *in cap. ubi periculum citato*, ibi, *Absentes expectare decem diebus tantummodo teneantur, quibus elapsis, siue absentes venerint, siue non ex tunc omnes conueniant in Palatium, in quo idem Pontifex habitabat*, tum quia spatium decem dierum à Pio IV. in Bulla quæ incipit *in eligendis*, assignatur: non solum ut Cardinales absentes decem diebus expectentur, verum etiam ut solitæ nouem continuorum dierum exequiæ celebrentur: *Cardinales, inquit, præsentem decem tantummodo diebus iuxta dicti Gregorij Prædecessoris constitutionem in Concilio Lugdunensi editam Cardinales absentes expectare teneantur, & interim solitas nouem continuorum dierum exequias omnino peragant*, vide Albanum *quest. 13*.

Ex quo sequitur primò, Cardinales electionem præuenientes ante integros decem dies elapsos ab obitu Pontificis grauiter peccare, tum contra Summorum Pontificum decreta; tum contra Cardinales absentes quibus in electione ius suum auferre videntur.

Secundò sequitur electionem Summi Pontificis ante decem dies fieri non posse, etiamsi duo, vel tres tantummodo Cardinales absint, quos omnino constet intra decem dies conuenire non posse ob itineris distantiam, prauam valetudinem, vel ob aliud impedimentum. Idem dic etiamsi omnes Cardinales in Curia præsentem sint, nam spatium decem dierum, non solum præfigitur ad expectandos absentes, verum etiam ad exequias peragendas; cessante autem vna causa legis, & alia remanente, legis obligatio non cessat, ut docui *de legibus disp. 1. quest. 1. puncto. ult. §. 2.* cum Suarez Couarruua, Alphonso à Castro, Salonio, Gutierrez, Salas, Caietano, & alijs.

2 Hæc tamen intelligenda sunt modò iusta non subsit causa præueniendi, & non expectandi integrum decem dierum spatium. Ra-

I tio est,

tio est, quia in qualibet dispositione, intelligitur excepta iusta causa, quæ oppositum rationabiliter suadeat, *cap. excellentissimè I I. quest. 3.* & legis obligatio cessat in ijs casibus, qui per epicheiam in lege comprehensi non existimantur, *l. non dubium, C. de leg.* vide tradita de legibus loco citato *num. 8. & seqq.*

Iusta autem causa præueniendi videtur esse grauis Ecclesiæ necessitas ita exigens, bellum ingruens, incussiones, & seditiones repente exortæ, timor aeris inficiendi, & similia, quæ iudicio prudentum relinquuntur.

3. Secunda pars propositionis est, vt electio Summi Pontificis vltra decem dies non differatur, nisi grauissima causa dilationem permittat. Ratio est, tum quia Gregorius X. in *cap. vbi periculum*, præcipit Cardinalibus, vt decem diebus elapsis ex tunc omnes conueniant in Palatium, & Pius IV. prohibet electionem vltra decem dies differri, ibi, *Nec vlllo pretextu vterius differant*; tum quia dilatio electionis non leue incommodum Ecclesiæ afferre potest, dum Ecclesia suo vniuersali Pastore destituta, & viduata remanet. Dixi nisi grauissima causa dilationem permittat; nam iusta concurrente causa, electio differri potest, quatenus iusta, & rationabilis causa permittit: vt patet, tum ex rationibus in simili allatis, *num. 2.* ad probandam præcedentis partis limitationem; tum exemplis, nam post obitum Alexandri VI. & Pauli III. longius dilatam fuisse Summi Pontificis electionem multi Scriptores ferunt: Hinc sequitur electionem differri posse, dum vitæ periculum Cardinalibus impendat, aut dum impressio popularis, aut alius metus libertati electionis contrarius imminet.

Secundò sequitur electionem differri non posse vltra decem dies, vt Cardinales absentes expectentur; hæc enim non est iusta, & sufficiens causa, sed potius iniusta, & à sacris Canonibus reprobata, vt patet ex verbis, *cap. vbi periculum*, & constitutionis Pij IV. superius relatis.

SECUNDA PROPOSITIO.

Electio Summi Pontificis facta, nondum expletis decem diebus irrita non est, si circumstantia temporis præcisè spectetur. Ratio est, tum quia circumstantia temporis, non est de substantia electionis, sed de præcepto; tum quia electio facta à duabus Cardinalium partibus, valida est; & qui hoc pacto electum non recipit, excommunicationem incurrit, *cap. licet, de elect.* sed potest aliquis eligi à duabus Cardinalium partibus, non seruata temporis circumstantia; ergo huiusmodi electio valida est; ita Glossa in *cap. ubi periculum*. Francus Archidiaconus, & alij apud Abba. *de Cardin. quest. 14*. Sopranus præceptor meus in *tract. de elect. lib. 4. cap. 6. quest. 1. cōtra Cardinalem Alban quest. 14. ad finem*. Dixi si circumstantia temporis præcisè spectetur, nam aliunde fieri potest, vt electio irrita sit, vt defectu debiti numeri Cardinalium; nam si Cardinales, qui non expectato debito tempore Pontificem eligunt, duas ex tribus partibus totius Collegij Cardinalium partes non conficiant, electio inualida est, numerus enim necessarius ad electionem perficiendam constat duabus partibus totius Collegij Cardinalium vbicumque existentium, vel duabus partibus Cardinalium legitime præsentium, cum autem nondum legitimus tempus elapsus sit, intra quod absentes expectari debent, Cardinales legitime præsentibus non censentur, consequenter electio non subsistit.

5 Sed modò dubium est, Primò, an sicut circumstantia temporis non vitiat electionem præueniendo, ita nec eandem subuertat differendo, si videlicet Cardinales elapsis decem diebus statim non cōueniant. Respondeo eodem modò non vitare, vt patet ex rationibus allatis; exceptio enim contra Summum Pōtificem à duabus Cardinalium partibus electum, opponi non potest, nisi in casibus in Iure expressis; sed dilatio & prorogatio non est impedimentum in Iure expressum, ergo opponi non potest; tum quia sequeretur semel dilata electione, nullum postea creari posse legitimum Pontificem, quod est absurdum.

6 Secundò dubium est, vtrum electio Summi Pontificis nocturno tempore fieri possit. Respondeo nocturno tempore faciendam non esse præcisa graui necessitate, nisi fortè diurno tempore inchoata fuerit, & noctu compleatur, & perficiatur. Ratio est; quia dies publicis functionibus, & operibus dicatus est; non verò priuatis consilijs, iuxta illud Psalmi, *Exibit homo ad opus suum, & ad operationem suam, vsque ad vesperam*; tum quia Papa est Vicarius Christi, qui est Deus lucis, non tenebrarum, vt benè aiebat Reginaldus Polus, dum Cardinales vellent ipsum noctu ad Pontificatum eligere, & alia vice Robertus Cardinalis Bellarminus, dum rogaretur vt noctu cum alijs accederet ad eligendum Pontificem, sic effatus est (teste Soprano *lib. 4. de elect. cap. 4. quest. 3. ad finem.*) Pontifex qui sic eligitur, non Pontifex lucis erit, sed tenebrarum. Dixi præcisa graui necessitate, quia leges positivæ in graui necessitate obligare non consueuerunt, vt suo loco docui, idèmq; in terminis docet Abbas *in cap. 1. de clandest. spons.* & alij cõmuniter *in cap. quia propter, §. fin. de elect.* Dixi nisi fortè diurno tempore inchoata fuerit, nam si die lucente inchoata fuit, eius absolutio in noctem protrahi potest, nihil enim absurdi sequitur, si electio die lucente inchoata, noctu absoluator, cum non minus respiciendum sit principium, quàm finis, ita Ripa, Antonius Cuccus, & alij apud Rodriquez *tom. 2. quest. 52. art. 15.*

7 Rogabis vtrum electio Summi Pontificis noctu inchoata, & absoluta, irrita sit. Respondeo negatiuè, quia cõtra Summum Pontificem à duabus partibus electũ, exceptio opponi non potest, nisi in casibus in Iure expressis, sin Iure autem expressum nõ est, vt exceptio opponatur cõtra Pontificem noctu à duabus partibus per scrutiniũ electũ.

Obijcies, sententia noctu lata à Iudice non supremo, irrita est, ex Iasone, *l. non minorem, C. de transact.* & alij apud Rodriquez *to. 2. quest. 52. art. 15.* ergo etiam irrita est electio. Respondeo primò, negando consequentiam, quia à disparatis non valet illatio: secundò, antecedens non admitti à Menochio *de arbitrat. lib. 1. quest. 62.* & alijs, præsertim si processus die inceptus fuit, & in noctem vsque prorogatus.

Q V Æ S T I O V.

De requisitis ex parte formæ ad electionem, seu de varijs eligendi Pontificem modis & formis.

S V M M A R I V M.

- 1 *Eligendi Magistratus forma quotuplex sit.*
- 2 *Electio Ecclesiasticorum per sortes, vetita est.*
- 3 *Electiois forma quotuplex sit.*

P R I M A C O N C L V S I O.

TRiplex assignari potest modus, quo Magistratus instituitur, seu quo aliquis in dignitate, vel officio constituitur, primus est per electionem, vt Imperator, Rex Poloniæ, & alij; secundus per fortitionem, vt olim apud Persas, & alias nationes; tertius per successionem, vt in Hispania, Gallia, Anglia; has autem eligendi rationes ab hominibus inuentas fuisse nulli dubium est; cum enim homines vellent sibi Reges constituere formam constituendi sibi Reges per electionem inuenerunt, sed quia nonnulla inter eligendum dubia, aliquando exurgebant (vt quando paria erant Electorum vota) ad sortes confugiebant, ijsque litem dirimebant, deinde Regi, seu Principi, sic Electo facultatem transmittendi Regnum, seu Principatum in successores aliquibus in locis concesserunt, & hæc vocatur acquisitio Regni, seu Principatus, ac Magistratus per successionem; hæc porro successio, vel contingit sanguinis propagatione, (nam qui Principi proximior est, succedit:) vel contingit designatione defuncti, vt experientia docet.

S E C U N D A C O N C L U S I O .

V O I T 2 A V O

2. **M**agistratus, seu Præsules Ecclesiastici, non constituuntur per sortitionem. Ratio est, tum quia periculum est, ut fors super indignum cadat; tum quia ius Canonicum vetuit sortes in dignitatibus Ecclesiasticis, *cap. vlt. de sortileg.* & ibi Glossa; Alban. *quest. 38.* Azorius 2. *part. lib. 4. cap. 3. questio 6.* Miranda in *manuali tom. 2. quest. 23. art. 13.* Tuscus *tom. 2. concl. 79.* Neque cōstituuntur per successionem, siue loquamur de successione quæ sit sanguinis propagatione, siue de illa quæ sit designando successorem; cū enim Ecclesiastici voto castitatis obstricti sint, non possunt dignitates Ecclesiasticas ad successores deferre propagatione sanguinis; & cū Ecclesiastici successorem sibi eligere nequeant, non possunt dignitates Ecclesiasticas, ad alios transmittere per designationem; quamquam peculiaris difficultas est, utrum Papa possit sibi successorem eligere, vel designare, de qua re *infra quest. vlt.* cū ergo Præsules Ecclesiastici, non constituantur sortitione, aut successione, dicendum est constitui electione; hæc porro electio, si ab vno tantum fiat, vocatur institutio, vel collatio; si à pluribus fiat, propriè appellatur electio, ex Aristotele 2. *Ethic.* S. Thoma 2. 2. *quest. 13.* & alijs, quos retuli in *tractatu de beneficijs.*

Sed modò peculiare dubium hic suboritur, utrum suborta inter duos discordia in electione Summi Pontificis, vter eorum sit electus, mitti possint sortes, ita ut is verus sit Pontifex, super quem sortes ceciderint. Cardinalis, & alij, quos citat, & sequitur Felinus *cap. Capitulum, num. 2. 1. vers. Sed seruando, de rescript.* Sanchez in *opere morali, lib. 2. cap. 38. num. 80.* Paulus Layman *lib. 4. tract. 10. cap. 3. num. 9.* affirmant, modò id fiat de consensu Cardinalium, ad quos electio spectat; sed negatiua sententia sustinenda est, quia Pontifex hoc tempore eligi non potest, nisi seruata Summorum Pontificum Gregorij XV. & Urbani VIII. forma, de qua *infra.*

TERTIA CONCLUSIO.

3 **T** Resunt species, seu formæ electionis, ex Innocentio in cap. *quia propter, de elect.* prima fit per scrutinium; secunda per inspirationem; tertia per compromissum, cap. *quia propter, de elect.* Electio per scrutinium perficitur certo numero suffragiorum, dum videlicet singulorum vota feruntur, ut is electus censeatur, qui certum suffragiorum numerum obtinuerit, seu iuxta conventionem, vel statutum. Electio per inspirationem fit suffragijs omnium, nemine dissentiente. Electio per compromissum contingit, dum Electores inter se non conveniunt, & ob id alium, vel aliquos eligunt, ut electio ipsius iudicio, vel arbitrio fiat, has omnes electionis formas servari permittit Gregor. XV. & electionem alia ratione factam irritat, ut patet ex §. *matura*, & §. *quod si electio*. Addi posset quarta creandi Pontificem forma, quæ fieri potest à Papa, designando, seu eligendo successorem. Has singulas electionis formas seorsim maioris perspicuitatis gratia explicare decrevi in quatuor punctis proximè sequentibus.

P V N C T V M I.

De electione per scrutinium, seu per scrutinium, & accessum. In hoc puncto explicabo conditiones ad electionem per scrutinium, vel per scrutinium & accessum requisitas.

S V M M A R I V M.

- 1 Electio per scrutinium requirit debitum suffragiorum numerum.
- 2 Suffragium iam latum, an revocari possit?
- 3 Suffragium in quo plures nominati sunt, irritum est.
- 4 Electio fieri debet per secreta suffragia.
- 5 Suffragium quando nam dicatur secretum.
- 6 Electio facta per adorationem in valida est.
- 7 Electio valida est etiam si Cardinalis retulerit quod in suo suffragio continetur.
- 8 Electio an valida sit, dum Cardinalis suum suffragium alijs ostendit antequam illud clauderet.

- 9 *Electio valida est etiam si aliqui tulerint sua suffragia aperta, is tamen cui lata sunt non fuit electus, sed alius.*
 10 *Electio an vitietur ob duo, vel tria suffragia aperta.*
 11 *Electio inualida est, dum quis seipsum eligit, & ipse suffragium complet numerum ad electionem requisitum.*

V N I C A P R O P O S I T I O.

- I **Q** Vatuor saltem conditiones in electione per scrutinium necessariae sunt. Prima est, ut adsit debitus suffragiorum numerus, debitus autem numerus consistit in suffragijs duarum partium Cardinalium in Conclavi existentium, siue ad hunc numerum perueniatur in solo scrutinio, vel in scrutinio, & accessu simul; nam in *Bulla Gregor. XV.* dicitur, *suffragia duarum ex tribus partibus Cardinalium in Conclavi praesentium in scrutinio, seu scrutinio, & accessu.* An autem in numero suffragiorum computari possit suffragium, quod electus sibi tribuit, constabit ex infra dicendis *conditio 4. num. 14.*
 2 Quæres utrum is qui suum suffragium tulit, possit illud reuocare, & alium eligere. Respondeo negatiue dum suffragium in calice positum est. Ratio est, tum quia eligens iam functus est munere suo, & electo per huiusmodi suffragium acquisitum est aliquod ius, licet non plenum, nec perfectum; tum quia nemo mutare potest consilium in alterius prauiudicium, dum res non est integra, sed inchoata, *l. nemo, ff. de reg. iur.* tum quia huiusmodi mutatio, & reuocatio damnum Ecclesiae afferre posset, hoc enim pacto protrahi & differri posset electio in qua periculum est in mora *cap. cum inter vniuersas, de electione*; ita Glossa, Ioannes Andreas, & Panormit. in *cap. unico, verb. occultis, de Ecclesiastica beneficia*, Syluester verbo *electio 2. quas. 4.* Miranda in *manuali Pralatorum, tom. 2. q. 23. art. 24.* Rodriquez *tomo 2. quas. 51. art. 7.*
 3 Secunda conditio est, ut in schedula scrutinij, vel accessus, plures non nominentur, alioquin suffragium irritum est, licet postea in accessu liberum sit illi qui huiusmodi suffragium cum plurium nomina-

mina-

minatione in scrutinio tulit, eligere vnū ex nominatis in primo scrutinio, vel ad alium accedere, qui in scrutinio ab vno saltem nominatus fuerat, vt patet ex eadem Gregorij Bulla, ibi: *Nulli autem tam in schedula scrutinij, quàm accessus plures nominare liceat, alioquin suffragium, in quo plures fuerint nominati, nullum sit; accedere tamen vni ex nominatis à se in dicta schedula, vel alij, dummodo aliquod aliud suffragium in eodem scrutinio tulerit non prohibeatur, & in numero Cardinalium in Conclauis presentium numeretur.*

4 Tertia est, vt electio fiat per suffragia schedularum secreta, alioquin irrita est electio, nam in præfata Gregorij Bulla, dicitur, *Quod si electio aliter, quàm per secreta schedularum suffragia duabus ex tribus partibus Cardinalium in Conclauis presentium in scrutinio, seu scrutinio, & accessu, electi suffragio non computato, celebrata fuerit, nulla sit, & inuvalida, eo ipso absque vlla declaratione, & ita electo nullum ius tribuat, &c.* Garzias part. 5. cap. 4. num. 183. & sequentibus.

5 Sed modò dubium est, quandònam suffragia schedularum dici possint secreta. Respondeo, dici secreta, dum obsignata sunt, ita vt ab alijs communiter deprehendi nequeat, quod in ipsis est. Ratio est, tum quia secretum contrà distinguitur, à publico, patente, & notorio, sed quamdiu suffragium est obsignatum, non est publicum, patens, & notorium; ergo est secretum, oppositum enim oppositas habet rationes, *l. si n. ff. de legat.* tum quia suffragia idèò obsignari iubentur, vt suffragator deprehendi non possit; ergo tamdiu suffragium est secretum, quamdiu suffragium ita obsignatum est, vt nomen suffragatoris communiter cognosci non possit ab ijs, qui schedulam præ manibus habent.

6 Ex dictis sequitur, Primò inuvalidam esse electionem hoc tempore factam per adorationem; tum quia huiusmodi electio non fit per secreta suffragia; electio enim per adorationem olim fiebat præui tractatu de speciali persona, non solum informatiuo, & consultiuo, sed etiam inclusiuo, vel exclusiuo; deinde sequebatur saluatio, & veneratio, deinde apertum & publicum scrutinium, quo sin-

K guli

guli suffragium aperte proferebant, profitebantur, & protestabantur; tum quia præcipuus Gregorij XV. scopus, & finis in hac constitutione fuit, formam eligendi per adorationem auferre, & abrogare; quamvis enim forma electionis per adorationem non sit intrinsecè mala, nec iuri naturæ aduersetur (singuli enim ipsius actus, si per se præcisè spectentur, mali non sunt, vt patet eos singillatim perpendenti, & examinanti, alioquin tot Cardinales integerrimi, & Pontifices Doctissimi hoc non permisissent:) nihilominus iure merito abrogata fuit propter incommoda quæ ipsam consequebantur, nempe inquietudo animi, diuisio factionum, præcipitatio deliberationis, & consiliorum, inæqualis conditio Cardinalium ad Pontificatum, imò perpetua exclusio nonnullorum à Pontificatu, priuatio libertatis ferendi suffragia, periculum simoniacæ conuentionis, & similia quæ non minus fusè, & prolixè, quàm eruditè 28. quæstionibus prosequitur Sopranus de electione Pontificis lib. 4. par. 2.

7. Secundò sequitur validam esse electionem, etiamsi aliquis Cardinalium alijs reculerit, quod in schedula cõtinetur; suffragium enim schedulæ adhuc secretum est, vt colligitur; tum ex allatis rationibus; tum quia fieri potest, vt aliud in schedula scriptum sit, aliud voce, & ore proferatur; tum quia testamentum non definit esse clausum, & secretum, etiamsi testator alijs significet dispositionem in eo contētam; ergo etiam suffragium schedulæ, non definit esse secretum, quamvis suffragator indicet contenta in sua schedula; aliud enim est suffragium, seu contenta in suffragio non manifestari, aliud ipsummet suffragium schedulæ secretum esse; suffragium schedulæ in se, & materialiter loquendo secretum remanet, etiamsi suffragator manifestet contenta in schedula; nam per huiusmodi manifestationem nihil additur, vel detrahitur suffragio schedulæ, & Summus Pontifex non absolute, & simpliciter irritauit quamlibet electionem factam per suffragia non secreta, sed eam quæ fit per suffragia schedularum non secreta, vbi notanda sunt illa verba *schedularum non secreta*, ita Garzias de benef. part. 5. cap. 4. num. 196. vbi in simili adducit declarationem

non

rem sacra Congregationis.

Tertio sequitur validam esse electionem, etiam si contentum in suffragio reuelatum fuerit conuento signo, seu nota aliqua ex conuentione superaddita, seu contrasigno; quamuis enim reuelans grauiter peccet, & excommunicatione puniatur in Bulla Gregor. XV. nihilominus electio valida est, quia suffragium schedulae adhuc secretum est.

8 Addunt Nauar. *consil. 9. de elect.* Rodriquez *tom. 2. q. 5 1 art. 9.* & Sopran. *lib. 4. cap. 8. quest. 2. c. 3.* Miranda *q. 23. art. 29.* electionem validam esse, etiam si suffragium alijs Cardinalibus demonstratum sit, antequam clauderetur; electio enim adhuc dicitur facta per suffragia schedularum secreta, id est clausa, & obsignata, non vero aperta, publica, & patentia. Hæc opinio probabilis est, quamuis opposita non careat probabilitate; tum quia suffragium demonstratum pluribus effectum est publicum, nec per occlusionem, & sigillum superadditum publicitatem amittit; tum quia aliud est electionem fieri per suffragia clausa, aliud per secreta; præfata electio diceretur facta per suffragia clausa, non per secreta, ita Garzias *de beneficijs part. 5. cap. 4. numero 193.*

9 Quarto sequitur, validam esse electionem, si nonnulli suffragia aperta, & non obsignata tulerunt, sed is, cui data fuerunt suffragia aperta, electus non fuit, sed alius. Ratio est, tum quia electio istius facta est per suffragia secreta, cum suffragium illud apertum, non ad electionem istius, sed alterius pertineret; tum quia quemadmodum ut electio vitietur ob simoniam, opus est ut simonia influat in electionem; ita ut electio vitietur ob suffragia aperta, & non secreta, opus est, ut suffragia aperta influant in electionem; alioquin electio non dicitur facta per suffragia non secreta, ita Nauar. & Sopran. *locis statim citandis*; Miranda *in Manuali tom. 2. q. 23. art. 19.*

10 Rogabis utrum electio vitietur, ob duo, vel tria suffragia aperta, seu non secreta; Nauar. *tom. 1. conf. 9. num. 3. de electione*, Rodriquez *quest. regular. tom. 2. quest. 5 1 art. 9.* Miran. *tom. 2. quest. 23. art. 19.* Sopran.

pran. *quæst.* 1. & *sequentibus.* & alij in simili loquentes de electione Regularium facienda per secreta suffragia, iuxta dispositionem Concilij Tridentini *sess.* 25. c. 6. *de regular.* asserunt electionem non vitari, & subverti, etiam si vnus, vel duo suffragium apertum, & non obsignatum ferant, nisi hoc publicè constaret, & permetteretur à Capitulo. Ratio ipsorum est, primò, quia factum vnius aut plurium, toti Capitulo, seu Collegio nocere nõ debet; secundò, quia alioquin in vnus, vel alterius potestate positum esset quancumque Romani Pontificis electionem turbare; quisque enim posset suffragium apertum ferre, & secuta electione alicuius, qui sibi non probatur, opponere vitium suffragij non secreti. Tertiò, quia illud vitium irritam reddit electionem, quòd culpa electi committitur, hoc autem vitium non committitur culpa electi, cum ipse inscius sit talis vitij, vt suppono, nullum enim vitium imputari potest culpæ illius, qui præfatum vitium ignorabat: peccatum enim non est, nisi sit voluntarium: voluntarium autem esse non potest, vbi deficit cognitio.

Hinc præfati Doctores inferunt præfatum electionem validam esse, nisi fortè toti Collegio constet, de suffragio aperto. Tunc dicitur aliquid constare toti Collegio, seu notum esse toti Collegio, seu fieri Collegio vidente, aut consentiente, seu collegialiter, dum omnes hoc sciunt, & præterea sciunt hoc sciri ab alijs; quamobrem, si omnes quidem aliquid sciant, sed nesciant idem ab alijs scire, non dicitur sciri collegialiter, sed potius singulariter; consequenter illud dicitur secretum toti Collegio, sicut notorium illud dicitur, non quod centum, mille, & plures sciunt, si singulariter sciunt; sed quod quis ita scit, vt sciat etiam ab alijs sciri.

Sed mihi respondendum videtur, cum distinctione, vel is qui electus fuit, habuit sufficientem numerum suffragiorum, præter illa aperta, vel non habuit: si habuit sufficientem numerum suffragiorum, præter illa aperta, probabile est electionem validam esse, quia dicitur facta per secreta schedularum suffragia; aperta enim superflua sunt, vt suppono, nec electioni aliorum obesse debent; si verò non habuit

habuit numerum sufficientem, sed suffragia aperta numerum sufficientem cum alijs constitutebant, existimo electionem inualidam esse, quia dicitur aliter facta, quàm per secreta suffragia; facta enim fuit non solum per suffragia secreta, verum etiam per nō secreta, etiam si fortè Capitulum capitulariter ignoraret; ignorantia enim Capituli non efficit, ut suffragia schedularum aperta, secreta sint; ita Garzias *de benefic. part. 5. cap. 4. num. 184. & 193.*

Ad primam rationem in contrarium. Respondeo primò, vitium vnius, vel plurium non noceret toti Capitulo, ita ut totum Capitulum puniri debeat, sed solum ipsimet delinquentes. Respondeo secundo vitium vnius, vel plurium in præfato casu non nocere toti Capitulo, vel Collegio, sed non prodesse, quia ipsorum suffragium non sufficit ad electionem.

Ad secundam respondeo, cuiuslibet competere ius turbandi electionem, quæ legitimè facta non fuit, præsertim si electio nondum completa fuit; completa verò, & absoluta electione, credendum non est, præsertim alleganti propriam turpitudinem, ut suprà dixi, cum Baldo, & alijs *capit. inter dilectos de donat. & l. mercenalem, C. de condit. ob turp. caus.*

Ad tertiam respondeo, electionem aliquando irritari, non solum ob culpam electi, verum etiam ob defectum formæ substantialis, sine culpa electi contingentem.

II Quarta conclusio est, ut nullus seipsum eligat. Ratio est primò, quia Gregorius X. *in S. numerum, & in S. quod si electio*, decernit neminem posse sibi suffragium dare, & huiusmodi suffragium computandum non esse in duabus ex tribus partibus Cardinalium in Conclavi præsentium requisitis, quamvis ipsemet electus computandus sit in numero Cardinalium, consequenter si sexaginta Cardinales computato electo in Conclavi existant, is qui obtinuit quadraginta suffragia; censetur legitimè electus, modò sibi suum suffragium nō dederit, alioquin non est legitimè electus defectu debiti numeri; suffragium enim proprium non prodest; ob id in præfato casu, in quo quis

quis habuit quadraginta suffragia, aperiendum est suffragium electi, ut cognoscatur an ipse sibi suffragatus sit.

Secundò, quia nemo sibi sumere debet honorem, sed qui vocatur à Deo, tanquam Aaron ad Hebr. 5.

Tertiò, quia nemo debet oriri à seipso, *cap. in Scripturis 8. quest. 1.*

Quartò, quia suffragijs confertur potestas, & iurisdiction; sed nulus potest sibi iurisdictionem dare; ergo neque potest sibi suffragium dare, seu eligere: minor probatur, quia inter dantem, & acceptantem, necessaria est distinctio, *l. 1. ff. de auctor. tutorum, & cap. finali, de constit.* nec ullus potest seipsum producere, electus autem ad aliquam dignitatem, censetur moraliter, & ciuilitè productus, quoad illam dignitatem ad quam electus est: ex quo licet inferre suffragium, quo quis ante Gregorianam constitutionem se ipsum eligebar, non profuisse, nec computatum fuisse in numero suffragiorum, sicut neque modo computatur, licet in numero eligentium cõputetur nunc persona ipsa quæ se ipsam eligit, aliàs verò non computabatur, & ob id ipsius suffragium non proderat positiuè, sed negatiuè, quatenus eligens seipsum, non computabatur in numero eligentium, sicque minor suffragiorum numerus ad electionem sufficiebat, ita Romanus *consil. 227.* Gondislaus Villadiego *de orig. & potest. Cardin. quest. 5. num. 24.* Panormit. & alij, quos citat & sequitur Gambarà *de potest. legati, lib. 9. num. 140.* Nauar. *lib. 1. consil. 6. num. 4. de elect.* Miranda in *Manuali tom. 2. quest. 23. art. 15.* Albanus *quest. 18. de Cardinalibus.* Azorius *2. part. lib. 4. cap. 5. questio 8.* Emanuel Rodriquez *tom. 2. quest. regular. quest. 53. art. 12. sub finem.* Sopran. *in tract. de elect. Pontificis, lib. 4. cap. 8. quest. 5.* contra Bartholomeum Soccinum asserentem absolute electionem sui valere, & votum pro se ipso in electione computandum esse, & contra Bart. *l. si consul. ff. de adopt.* existimantem aliquem posse seipsum eligere, dum facultas eligendi pluribus commissa est, non verò quando vnitantum est demandata, *l. si mandauero, §. si tibi, ff. mandato;* quæ sententia probabilis mihi videtur præcisa Gregorij XV. constitutione. Ratio est, quia dum facultas eligendi pluri-

pluribus commissa fuit electio fit à communitate, à qua singulares personæ seorsim sumptæ inadæquatè distinguuntur; & hæc distinctio sufficit ad collationem dignitatis, & iuxta istam distinctionem, facile solui possent rationes aliorum DD. præcisa illa, quæ ex Gregorij Bulla desumitur, & est præcipuum quartæ conditionis fundamentum.

P V N C T V M I I.

De electione per compromissum.

S V M M A R I V M.

- 1 *Compromissum de consensu omnium Cardinalium fieri debet.*
- 2 *Electio per compromissum, valida non videtur, nisi Cardinales compromittentes consentiant, non solum in compromissum, verum etiam in ipsos compromissarios.*
- 3 *Compromissum qua forma inendum sit.*
- 4 *Taciturnitas an sufficiat ad compromissum.*
- 5 *Compromissarii in electione Pontificis plures esse debent.*
- 6 *Compromissarii quot esse possint.*
- 7 *Compromissarii qua forma instituendi sint.*
- 8 *Compromissarii in electione Papæ debent esse Cardinales.*
- 9 *Compromittere nemo potest in seipsum.*
- 10 *Compromissarius ab alijs eligi potest.*
- 11 *Compromissarii debent eligere Papam in Conclavi clauso.*
- 12 *Compromissarii servare debent formam sibi à Cardinalibus compromittentibus præscriptam.*
- 13 *Electio minus idonei facta à compromissarijs, an valida sit.*

VNICA PROPOSITIO.

I **S**Ex conditiones in electione Summi Pontificis per compromissum seruandæ sunt.

Prima est, vt omnes & singuli Cardinales præsentés consentiant, vt colligitur; tum *ex cap. in causis, de electione*, & *ex cap. quia propter, de electione*; tum *ex constitutione Gregorij XV. ibi, praterquam si omnes, & singuli Cardinales similiter in Conclauis præsentés, nemine dissentiente, aliquibus ex eorumdem Collegio Cardinalium committerent eligendi potestatem, qui vice omnium Catholica Ecclesia prouiderent*. Ratio autem, qua Gregorius XV. adductus videtur ad hoc statuendum, est, tum quia Compromissarius eligit vice omnium; ergo par est, vt cōsensum omnium obtinuerit; tum quia Cardinales constituendo Compromissarium, in ipsum ius suum circa electionem transferunt; ergo par est, vt Compromissarij electi fuerint ab omnibus, & singulis; nam quod omnes tangit ab omnibus approbari debet *de reg. iuris, in 6.*

Verum si rei naturam spectemus, necessarius non est omnium consensus in compromissarium, consequenter Summi Pontificis constitutione decerni potuisset, vt compromissum validum censeatur, accedente solum maioris partis Collegij consensu; nam quod à maiori parte Capituli, Collegij, vel Vniuersitatis fit à toto Capitulo, Collegio, vt Vniuersitate factum censeatur.

2 Sed modò dubium est, primò vtrum omnes Cardinales consentire debeant, in ipsosmet Compromissarios; an potius sufficiat, vt cōsentiant in Compromissum faciendum, seu in forma compromissi seruandi à Compromissarijs in electione Summi Pontificis. Albanus de Cardinalibus *quest. 21. Azorius 2. p. lib. 4. cap. 2. quasi to 2. Sopranus præceptor meus in manuscriptis, de electione Pape, lib. 3. cap. 23.* existimant satis esse, vt Cardinales omnes consentiant in ipsum compromissum constituendum, seu in forma electionis per Compromissum faciendæ; non autem opus esse consensu omnium, & singulorum in ipsosmet Compromissarios. Ratio est quia, quæ in vnam intentionem, seu finem inducta sunt, contrarium effectum operari non debent;

bent; *l. qui hominum, ff. de solut. l. legata inutilibus, ff. de adimendis legatis, & cap. cum dilectus de condit.* sed ista constitutio edita fuit, vt electio Summi Pontificis facilius, & celerius fiat; facilius autem, & celerius fieri non posset, si omnium Cardinalium cōsensus in ipsosmet Compromissarios requireretur, si enim maior pars Cardinalium conuenire non potest in certum Pontificem eligendum, multò minus credendum est, omnes & singulos consensuros in vnum, vel plures Compromissarios designandos.

Ego verò arbitror requiri consensum omnium, & singulorum, etiā in ipsosmet Compromissarios. Ratio est, tum quia Gregorius XV. statuit, vt in electione facienda per compromissum, Cardinales omnes, nemine dissentiente, committant potestatem eligendi aliquibus Cardinalibus eiusdem Collegij, sed tunc datur alicui facultas eligendi, dum adest consensus in ipsum cui facultas datur; ergo necessarius est consensus in Compromissarium, id est eum, cui facultas eligendi conceditur; tum quia Summus Pontifex requirit consensum omnium in compromissum in eundem, ibi, *Electio celebrata aliter, quàm per viam compromissi, nemine dissentiente ab omnibus initi nulla sit, &c.* Sed tunc compromissum initur, dum cōsensus, & facultas datur ipsismet compromissarijs; ergo requiritur consensus in ipsosmet Compromissarios; tum quia Compromissarij eligunt immediatè Pontificem, vice omnium Cardinalium; ergo par est, vt immediatè omnium consensu constituantur; hæc ratio communiter affertur à Doctoribus, quamuis apud me difficultate non careat, vt patet in alijs negotijs, quæ à Procuratore Capituli à duabus Capituli partibus cōstituto peraguntur; hic enim vices omnium gerit, licet ab omnibus constitutus non fuerit, sed tantum à maiori parte; tum denique quia sic expressè colligitur ex Cæremoniali, pag. 101. *vers. Secundus modus*, ita in simili Miranda tom. 2. *quæst. 23. art. 33.*

Ad rationem in contrarium. Respondeo inde non sequi constitutionem Gregorij superfluum esse, suòque fine, ac intentione defraudari: fieri enim potest, vt Cardinales qui in eligenda certa in Pō-

L tificem

rificem persona discordes sunt, & disconueniunt, concordess efficiantur in eligendis Compromissarijs, de quorum fide, integritate, & affectu minimè dubitent.

3 Secundò dubium est, qua forma consensus in compromissum ineundum exhibendus sit. Respondeo exhiberi posse ea forma, qua ipsimet Cardinales compromittentes voluerint; cum enim in iure definitum non fuerit, quo pacto compromissum ineundum sit; relicta videtur compromittentibus facultas consentiendi, seu compromittendi ea ratione qua voluerint. Quamobrem viua voce, seu acclamatione, seu scripto Compromissarios instituere, & enunciare possunt, vt bene Sopran. *loco citato, cap. 24.*

4 Rogabis vtrum taciturnitas sufficiat ad compromissum ineundum, vt si Cardinalis interrogatus an velit talem in Compromissarium eligi, & ipse non abnuat, non respondeat, sed omnino taceat. Respondeo negatiuè, tum quia taciturnitas non sufficienter indicat consensum, dum agitur de renunciando iure suo, tum quia compromissum inicitur consensu compromittentium, qui autem tacet, neque consentire, neque dissentire videtur *de reg. Iuris, in 6.* ita Rodriguez *quest. regular. tom. 2. quest. art.* Miranda in *manual. tom. 2. quest.*

Obijcies, qui tacet consentire videtur, *de reg. Iur. in 6.* Respondeo videri consentire in ijs, quæ proprium commodum, & vtilitatem respiciunt, non autem in ijs, quæ sibi præiudicium, & incommodum afferunt, vt in simili docui *de Matrimonio, & de Sacramentis*, cum Sanchez, Rebello, Suarez, & alijs.

5 Secunda conditio est, vt plures sint Compromissarij: Ratio est, tum quia Gregorius XV. afferit potestatem eligendi commitendam esse aliquibus Cardinalibus, vbi notanda est illa particula *aliquibus*, quæ numero plurali enunciat, & de pluribus verificatur; tum quia Summus Pontifex, si vno Compromissario, vel pluribus disunctiuè contentus fuisset, hac loquendi forma vsus fuisset, vni, vel pluribus; tum quia in materia dubia standum est propriæ verborum significationi,

tioni, nisi aliud ex subiecta materia, vel ex antecedentibus, & consequentibus, vel ex alia lege colligatur.

Contrarium sustinet Sopranus *lib. 3. cap. 26.* putans satis esse, ut vnus tantum Compromissarius eligatur. Ratio est, tum quia verbum *aliqui*, vel *aliquibus* non necessàriò plures requirit, sed in vno etiam verificari potest, ex Glossa in *cap. quia propter, de electione*, tum quia, plurale aliquando pro singulari ponitur, propterea in Iure dicitur pluralem orationem esse aliquando in suas singularitates resoluendâ, ex Bartol. in *l. falso, ff. de condit. & demonstr. l. 3. §. 1. ff. de negot. gestis*, & Matthæi 27. Latrones dicuntur illufisse Christo, etia nî vnus tantum illuferit, vt alij Euangelistæ innuunt.

Ad has rationes respondeo, solutionem constare ex rationibus à me allatis; plurale enim non ponitur pro singulari, nisi ex subiecta materia, aut aliunde colligatur pro singulari vsurpari, vt tradit Cardinalis Tuschus *tomo 2. lit. D. concl. 333. num. 1. & littera P. concl. 367.*

Sed modò dubium est, Primò, quot Compromissarij sint instituendi. Respondeo, duos vel plures institui posse, quia pluralis locutio etiam duorum numero contenta est, *reg. pluralis de reg. iuris in 7. l. vbi numerus, ff. de testibus*, cum alijs apud Euerardum in *top. legal. loco 54.*

7. Secundò dubium est, qua forma instituendi sint Compromissarij. Respondeo, eo modo eligendos esse, quo omnes, & singuli Cardinales compromittentes voluerint, vt dictum est *num. 3.* Ratio est, quia Gregor. XV. in sua constitutione non decernit modum eligendi Compromissarios; ergo eligi possunt ea ratione, & modo, qui à Cardinalibus compromittentibus approbatus fuerit; in Cæremoniali tamen Gregorij *vers. Secundus modus, pag. 101. & seqq.* assignatur modus, & forma qua fieri potest compromissum; præceptum tamen non imponitur seruandi illam Cæremonialis formam, in hac parte, vt colligitur ex illis verbis, *cuius formæ praxis potest esse huiusmodi.*

Obijcies, Gregorius in sua Bulla præscribit formam eligendi Summum Pontificem; ergo eadem forma seruanda est in electione Compromissariorum, cum eodem iure censeantur principale, & accessio-

rium, *reg. accessorium, de reg. iuris, & l. etiam. C. de iur. dot.* Respondeo, negando consequentiam; aliud enim est electio Pontificis, aliud Compromissarii, & à diuersis, & disparatis non valet illatio, *l. Papi-
nianus exuli, ff. de minoribus, & regula accessorium*, non valet, vbi mili-
tat diuersa ratio, *ex l. si is, C. de prædijs minorum*, cum alijs apud Tusch-
ium. 1. littera A. concl. 76. num. 36.

8 Tertia conditio est, vt Compromissarii sint Cardinales: sic enim
decernitur in Bulla Gregorij XV. ibi, *Aliquibus ex eorundem Collegio
Cardinalium committerent eligendi potestatem*. Ratio autem qua videtur
adductus Pontifex ad hoc constituendum, est: tum quia citius & fa-
cilius, hoc ita constituto, celebrari potest electio Summi Pontificis,
quàm si liberè facultas eligendi extraneum concessa fuisset: Cardi-
nales enim animo magis distraherentur in eligendo extraneo, quàm
Collega, tum quia Cardinales iure, & potestate gaudent eligendi
Pontificem: ergo facultas eligendi in ipsos potius, quàm in extraneos
qui nullo electionis iure gaudent, compromittenda est; tum quia,
Cardinales melius norunt mores aliorum Cardinalium, quàm extra-
nei; par autem est, vt Compromissum eligendi in eum fiat cui explo-
rati, & perspecti sint mores Cardinales eligendi, vt bene Sopranus
loco citato, cap. 28.

9 Quarta conditio est, vt nullus in se compromittat, aut post com-
promissum seipsum eligat. Ratio est, quia ex constitutione Grego-
rij XV. nemo potest sibi suffragium ferre, imò ipsius electio irrita est,
defectu vnus suffragij, si eius suffragium numerum ad electionem
sufficientem compleat; nam in Bulla Gregorij XV. dicitur, *In duabus
tertijis partibus suffragium electi non numeretur, nec quisquam siue scruti-
nij, siue scrutinij & accessus, siue compromissi via procedatur, seipsum eli-
gere, seu suffragium sibi dare nullatenus possit, electi tamen persona sè in
Conclau sit, debeat in numerum Cardinalium computari: & infra, electi
suffragio non computato, ita vt nemo seipsum elegerit.*

10 Sed modò dubium est, vtrum Compromissarii possint vnum ex
ipsis Compromissarijs eligere. Respondeo affirmatiuè, nisi opposi-

tum

tum habeatur in forma Compromissi. Ratio est, tum quia ipsi non sunt deterioris conditionis alijs; tum quia aliàs irrogari posset fraus, & iniuria Compromissario maximè idoneo, si ob aliquibus hoc sine Compromissarius constitueretur, ne ipse ad Pontificatum promoveretur; tum quia sicut deputatus ad erogandas pauperibus eleemosynas, non priuatur iure illius eleemosynæ, ita, &c. Huius sententiæ sunt Innocentius, Archidiaconus, Hostiensis, & Panormitanus in *cap. qui Episcopatum*, 8. *quest. 1.* Syluester *verb. electio 2. quesito 17.* Rodriguez *tom. 2. quest. 53. art. 12.* Miranda in *Manuali quest. 23. art. 40.* & alij. Imò Syluester *questio 18.* & Miranda *lococitato art. 40. sub finem*, putant Compromissarium posse sibi suffragium ferre, vt electionem de se factam compleat, & perficiat. Verum hæc doctrina post Constitutiones Summorum Pontificum Gregorij XV. & Vrbanij VIII. sustineri non potest.

11 Quinta conditio est, vt Compromissarij eligant Papam in Conclau clauso; nam Gregorius XV. irritat electionem alibi factam, ibi, *Electio alibi quam in Conclau clauso, nulla sit*, vide supradicta *quest. 3. num. 1.*

12 Sexta conditio est, vt Compromissarij seruent in electione formam sibi à Cardinalibus compromittentibus præscriptam, si forma eis præscripta fuit, ita Syluester *verb. electio 2. quesito 14.* Miranda *tom. 2. quest. 23. art. 37.* Gloss. in *cap. si quando de elect. in 6.* Azorius *2. part. lib. 4. cap. 14. quesito 11.* Ratio est, tum quia Compromissum veluti rationem, & quasi speciem mandati habet; de ratione autem mādati est, vt eius forma non excedatur, *l. diligenter, ff. mandati*; tum quia sic colligitur *ex cap. tum in iure, de electione*, ex quo textu Doctores communiter colligunt compromittentes posse formam Compromissarijs præscribere, quam Compromissarij seruare teneantur, modò aliquid illicitum non iniungatur: quamobrem hanc formam præscribere possunt, vt qui plura suffragia tulerit electus censeatur; plura autem voco, vel in ordine ad ipsos Compromissarios eligentes, & ad ipsamet suffragia simul, vel tantum in ordine ad ipsamet suffragia; quapropter

propter conuenire possunt, vt si quinque Compromissarij designati sint, & vnus electus sit in Papam à tribus, validè censeatur electus, quia plura habet suffragia, tam in ordine ad eligentes, quàm ad ipsa suffragia, item mandare possunt, vt si vnus electus sit à duobus alijs, singulis singulos eligentibus, electus à duobus validè censeatur electus, quia plura tulit suffragia, quàm alij; melius tamen, & tutius est præscribere, vt istantum legitime electus censeatur, qui à duabus partibus electus fuerit; hoc enim pacto accommodant se formæ, toti Cardinalium Collegio præscriptæ in electione Papæ. Idemque in Cærimoniali Gregorij *vers. Secundus modus, pag. 102.* innuitur, vbi assignatur forma Compromissarij præscribenda; caueant tamen compromittentes, ne quid illicitum imponant (nullus enim ad illicita obligatur) aut aliquid contra naturam electionis mandent, vt si obligent Compromissarios ad eligendum aliquem designatum ab ipsis compromittentibus; hoc enim naturæ, & rationi electionis aduersatur; natura enim electionis postulat, vt vnus è pluribus liberè eligatur, ita Calderinus *confil. 49.* Cardinalis Tuschus *tom. 2. littera E. concl. 62. num. 2.* Miranda *loco citato.*

Obijcies primò, Gregorius XV. decernit Summum Pontificem aliter eligi non posse, quàm per scrutinium, quasi per inspirationem, & per Compromissum; ergo Cardinales non possunt aliam formam Compromissarijs præscribere, cùm in Summi Pontificis constitutione, dispensare nequeant. Respondeo Summum Pontificem electum à Compromissarijs, seruata forma à compromittentibus præscripta, censi electum per compromissum, etiam si ipsimet Compromissarij non eligant via scrutinij, vel quasi inspirationis, vel compromissi.

Obijcies secundò, nemo plus iuris in alium transferre potest, quàm ipse habeat, sed Cardinales compromittentes non possunt sibi formam præscribere in eligendo Summo Pontifice; ergo nec eam præscribere possunt Compromissarijs. Respondeo ad maiorem propositionem, Cardinales compromittentes habere ius præscribendi formam Compromissarijs, quamuis ipsi ea forma vti fortè nequeant.

Ratio

Ratio est, quia in electione ab ipsismet Cardinalibus celebrāda, præscribitur forma in hac constitutione; nontamen præscribitur forma celebrandi compromissum, aut eligendi Pontificem per Compromissarios necessariò requisita, vt patet ex ipso Cæremionali, *vers. Hic optimum erit.*

Dixi in sexta conditione; si forma eis præscripta fuit, nam si compromittentes nullam formam Compromissarijs in electione seruandam iniunxerunt, liberum ipsis erit eam adhibere formam, quam voluerint; cùm enim Summus Pontifex nihil in hac re peculiare præscribat, censetur casum in dispositione iuris communis reliquisse; casus enim in lege omissus relinquitur dispositioni iuris communis, *l. commodissime ff. de liber. & posthum. l. si verò ff. soluto matrimonio, cap. cæterum de iudicijs*; consequenter Compromissarij facere poterūt, quod sibi à iure permittitur, propterea poterunt viua voce, aut scripto, aut per suffragia clausa, vel aperta eligere. Optimum tamen consilium inibunt conueniendo, quòd per quamcumque prolationem verborum, suum dare consensum non intelligunt, nisi eum in scriptis referant, vt in Cæremionali dicitur, *vers. 2. completo, pag. 102. & 103.*

13 Quæres vtrum valida sit electio minus idonei facta à Compromissarijs. Ratio dubitandi ad probandum non valere, est, quia facultas data Compromissarijs ad eligendum, intelligitur de idoneo, nec Electores præsumuntur velle facultatem ad actum illicitum concedere; ita in simili, Syluester *verb. electio. 2. quæsto 13. Miranda tom. 2. quæst. 23. art. 36. & alij.*

Sed mihi distinguendum videtur, vel Cardinales facultatem eligendi concesserunt Compromissarijs sub conditione eligendi dignū, vel nullam conditionem adiecerunt; si facultatem sub dicta conditione concesserunt invalida est electio indigni à Compromissarijs facta, quia Compromissarius non potest excedere formam compromissi, si verò nullam conditionem adiecerunt, censeo electionem validam esse, quia contra Papam legitimè electum nihil obijci potest, quod nō sit cōtra substantiā electionis, vel quod nō sit in iure expressū.

Ex quo

Ex quo patet quid dicendum sit ad illam quæstionem, qua quæritur, quid sentiendum sit dum duo Compromissarij eligunt indignū, vnus verò idoneum & dignum; electio enim indigni, præfertur electioni digni, modò nihil substantiale desit, & compromissum factum sit sub hac forma, vt is electus censeatur qui plura habuerit suffragia; vide Syluestrum verbo *electio*, contra Panormitanum in capite cum in iure de electione, & Miranda tom. 2. quæst. 23. art. 41.

P V N C T V M I I I.

De electione quæ fit quasi per inspirationem.

S V M M A R I V M.

- 1 Electio per inspirationem quatuorplex fit.
- 2 Electio per inspirationem fieri debet in Conclauis clauso.
- 3 Electio facta in sacello, seu Capella clausa, an valida sit?
- 4 Electio fieri potest in quolibet loco Conclauis.
- 5 Electio facienda est post decem dies à die obitus.
- 6 Electio per inspirationem fieri debet consensu omnium.
- 7.8. Electio per inspirationem an valida sit, si tempore complenda electionis aliquis Cardinalis sensibus destituatur, ita vt loqui non valeat, aut suum consensum ore, vel scripto portare.
- 9 Electio per inspirationem valida est, etiam si aliqui prius dissenserant, qui postmodum consentiant.
- 10 Electio per inspirationem facienda est, cum verbo eligo ore, vel scripto prolato.
- 11 Electio per inspirationem fieri debet, absque prauo tractatu de speciali persona.
- 12 Tractatus nomine quid intelligatur.
- 13 Tractatus quatuorplex fit.
- 14 Tractatus quilibet in electione per inspirationem prohibetur.

- 15 *Tractatus consultiuus, & informatiuus, an necessario præmittendus sit in electione, quasi per inspirationem.*
 16 *Tractatus decisiuus quid requirat, vt irritam reddat electionem.*
 17 *Electio, quandònam inchoatà censeatur.*
 18 *Electio quasi per inspirationem facta præuio tractatu, an valida sit, si electus tractatum penitus ignorabat?*

PRæmittendum est electionem per inspirationem, duplicem esse, alia dicitur simpliciter per inspirationem, alia quasi per inspirationem. Electio per inspirationem est illa, quæ fit instinctu Spiritus sancti, cum euidentiali quo miraculo, & signo præsentia eiusdem Spiritus sancti, vt contigit in electione Nicolai, Ambrosij, & aliorum, de qua sermo est in cap. statimur, §. his omnibus 61. distinct. Electio quasi per inspirationem, fit quidem impulsu Spiritus sancti, sed absque visibili signo, & miraculo testante vim, & præsentiam Spiritus sancti, vt de Gregorio III. anno 731. Leone III. anno 795. Paschali, & alijs traditur à Doctoribus. Gregorius XV. in hac Bulla, non præscribit formam electionis, quæ fit simpliciter per inspirationem. Ratio est, tum quia, quæ fiunt per inspirationem Spiritus sancti, via extraordinaria fiunt, quæ autem via extraordinaria fiunt, humanis legibus non subiiciuntur, cap. duæ sunt 19. quæst. 2. & cap. nisi cum pridem, de renunciat. Tum quia, vbi Spiritus Domini, ibi libertas. Tum quia Iudith. 8. reprehenditur populus, quòd legem Spiritui sancto præscripserit, determinando tantum, & tale tempus intra quod Oloferni dederentur, nisi auxilium, & subsidium conferretur.

Agit ergo solum Pontifex de electione quasi per inspirationem, hæc enim cum via ordinaria fiat, subiicitur humanis legibus, quæ ipsius Spiritus sancti auxilio condita fuerunt, vt suprà docui, de loco in quo faciendæ est electio, quæst. 3. num. 1. vers. Obijcies primò, non tamen hinc sequitur Spiritum sanctum humanis legibus subiici, sed eos qui spiritus sancti impulsu via ordinaria aliquid facturi sunt: hoc posito ex-

M plican-

piandum est quatenam in electione *quasi per inspirationem*, seruanda sint.

V N I C A P R O P O S I T I O.

2 **A**D validam Summi Pontificis electionem faciendam *quasi per inspirationem*, quinque conditiones requiruntur.

Prima est, vt fiat in Conclau, vt superius probatum est, *quest. 3.*

3 Obseruant tamen aliqui Doctores electionem censerī factam in Conclau, etiamsi non fiat in loco ad hoc preparato, sed in sacello, sacratio, seu capella clausa, quamobrem si omnes omnino Cardinales diuino Spiritu tacti, & peracto iam sacro Spiritus sancti, quod post nonum diem ab obitu Pontificis peragitur, conueniant in Cappellam, seu Sacrarium, vel alium locum, cōque clauso, & exclusis ijs, qui ad electionem conuenire non debent, electionem celebrent nemine dissentiente, electio valida est, cū censetur facta in Conclau; nomen enim Conclauis genericum est, & extēditur ad quemlibet locum in ædibus qui clauditur clauī communi ijs, qui ad illum locum conuenire debent, causa illius negotij quod tunc temporis peragitur; quamuis fortè locus ille ad alia officia deputatus esset, & iuxta naturam, & rationem officij, ad quod deputatus erat, speciale nomen fortiretur, E. S. Capellæ; Sacrarij, Capituli, &c.

4 Rogabis, vtrum electio, *quasi per inspirationem*, fieri possit quolibet in loco Conclauis. Respondeo affirmatiuè, modo Conclauē sit clausum, & adsint reliquæ conditiones proximè enumerandæ. Ratio est, quia ad valorem huiusmodi electionis requiritur solum, vt fiat in Conclau clauso omnibus consentientibus cum verbo *eligo*, voce, vel scripto prolato.

5 Secunda conditio est, vt electio fiat post decem dies. Ratio est, quia electio, *quasi per inspirationem*, faciendā est de consensu omnium habentium ius eligendi, nemine dissentiente, sed si fieret infrā decem dies non fieret de consensu omnium habentium ius, cū Cardinales

uales infra decem dies habeant ius eligendi, nec omnes conuenerint
vt suppono, vide supradicta *quest. 4.*

6 Tertia conditio est, vt electio fiat de consensu omnium, nullo
prorsus discrepante, sic enim decernitur in Bulla Gregorij in *S. matu-
ra*, & *S. quod si electio*. Ratio cur omnium consensus in huiusmodi ele-
ctione præscribatur, est, tum quia in alijs electionibus quæ fiunt *per
inspirationem* requiritur consensus omnium, nullo dissentiente, *cap.
quia propter, de elect.* & ibi Ioan. And. & alij; tum quia consensus om-
nium, est ratio cognoscendi electionem factam fuisse immediatè in-
stinctu Spiritus sancti; ergo iure merito ad electionem *per* huiusmodi
inspirationem consensus omnium exigitur, quicquid nonnulli apud
Tusc. tom. 2. litt. E. *cenc. 74. num. 9.* in oppositum sentiant.

Obijcies primò, multa alia decreta, Concilia, & electiones fiunt
instinctu Spiritus sancti, & nihilominus valida sunt, etiamsi consen-
sus omnium non intercedat; ergo, &c. Respondeo electionem in-
stinctus Spiritus sancti dupliciter fieri posse. Primò immediatè, se-
cundò mediatè, media scilicet consultatione, tractatu, aut alia ho-
minis industria; electio quæ immediatè fit impulsu Spiritus sancti
consensum omnium requirit, quia quæ à Spiritu sancto immediatè
fiunt, eodem modo fiunt in omnibus, in quibus est eadem ratio actio-
nis, qua enim ratione Spiritus sanctus vnum mouet, omnes mouet, &
omnes vnus animi facit voluntates, *cap. schisma 24. quest. 1. & cap. de
illis 24. quest. 4.* Electio verò quæ solum mediatè fit à Spiritu sancto,
consensum omnium non exigit, quia Deus eam liberæ hominum vo-
luntati relinquit, prout propria cuiusque ratio dictauerit.

Obijcies secundo, iuri naturæ aduersatur, vt vnus omnibus præ-
ualeat, si autem in electione Pontificis requireretur consensus om-
nium, & singulorum, sequeretur vnum dissentientem præualere om-
nibus, cum ipse suo dissensu electionem impediatur, alijs eam deside-
rantibus. Respondeo iuri naturæ aduersari, vt vnus omnibus præ-
ualeat in agendo, seu in actione perfectiua, non verò in impediendo,
seu in actione impeditiua, vt communiter fatentur Iurisperiti, & pa-

zet tum in testamento, vel in matrimonio, in quo defectus vnus testis valorem contractus impedit, tum in venditione alicuius rei indiuiduæ, communis pluribus, in qua fieri potest, vt dissensus vnus plurium consensui præponderet, & præferatur; nam in re communi potior est conditio prohibentis, *cap. in re communi, de reg. Iuris in 6. l. perfundum, ff. de seruit. rust. præd. & l. Sabinus, ff. de communi diuidendo*. Idem militat in electione per scrutinium, in qua cōsensus duarum partium requiritur, ita vt si vnus desit, electio vitietur, & non subsistat, ita Hieronymus Alban. *de Cardinal. quæst. 21*. Sopran. præceptor meus in *manuscriptis, de electione Summi Pontificis, lib. 3. cap. 14*.

Obijcies tertio in electione Summi Pontificis magna celeritate vtendum est, *cap. vbi periculum, de electione*; nam Ecclesia Sede vacante in magno discrimine versatur; sed electio celeriter fieri non solet dum consensus omnium exigitur; ergo ritè consultum non videtur electioni Pontificis, & vniuersali Ecclesiæ commodo, statuendo electionem de consensu omnium celebrari. Respondeo primò, Electionem *quasi per inspirationem* non obesse celeritati, quia dum vult Spiritus sanctus immediatè ad electionem promouere, & compellere, citò, & celeritè mouet, & impellit prout vult. Respondeo secundo, non desiderari, nec deesse alios modos, & rationes electionis, quibus electio celeriter fieri possit Summus enim Pontifex nō solum præscribit electionem fieri, *quasi per inspirationem* verum etiam per scrutinium, vel compromissum. Respondeo tertio, prius consulendum fuisse legitimæ electioni, ne per impressionem, aut alia turpi ratione fieret, quàm celeritati; matres enim quæ filios in lucem celeriter, & ante tempus edunt, abortum facere consueuerunt, & tumultos potius, quàm mundum replent, vt in simili D. Bernardus.

7 Sed modò dubium est primò, vtrum valida sit electio facta, dum aliqui Cardinales tempore complendæ electionis, *quasi per inspirationem*, loqui non possunt, sensibusque ita destituuntur, vt suum consensum ore, vel scripto præstare nequeant. Respondeo electionem validam esse, si à Medicis, seu peritis credantur diutius eo morbo detinen-

detinendi, & alij omnes Cardinales consentiant. Ratio est, quia isti censentur absentes, is enim absens in Iure existimatur, qui sentire non potest quid præsentes faciant, Bald. in *l. quicumque, C. de servis fugitiuis*; si verò non credantur diutius eo morbo detinendi, sustinenda est electio. Ratio est, quia non censentur abesse, cum ibi materialiter præsentes sint corpore, & animus corpori breui conciliandus, & reddendus sit, quòd enim parum distat, nihil distare videtur, *l. diuortio, S. si fundum, ff. soluto matrimonio*, existimo tamen huiusmodi electionem non diutius sustinendam esse, sed breui, exempli gratia, spatio vnius horæ. Ratio est, quia cum singulis diebus duo scrutinia peragenda sint, quæ non modicum temporis spatium requirunt, existimo electionem, *quasi per inspirationem*, non ad eò sustinendam esse, vt impediatur id quod ipsis Cardinalibus stricto præcepto iniungitur.

Ex quo sequitur electionem, *quasi per inspirationem*, quæ dilata aliquantulum fuerat ob Cardinalis deliquium, sed postmodum peracta, & absoluta, perturbari non posse ab eodem Cardinali, postquam sibi redditus fuerit, secùs si Cardinalis ad se redeat, antequam electio absoluta sit, tunc enim iure gaudet electionis, *cap. vbi periculum, S. si verò, de electione*, vbi Pontifex decernit, vt si aliqui re integra, id est, nondum electo Summo Pontifice, in eodem negotio, in eo statu, in quo ipsum inuenerint, admittantur; ob id etiam Cardinalis qui tempore scrutinij animi deliquio laborabat, poterit in accessu suffragium dare, si tunc temporis ad se redijt.

8 Maior difficultas est, quid faciendum sit dum Cardinalis ita obmutuit, aut ita morbo correptus fuit, vt neque loqui, neque scribere valeat. Respondeo in electione per scrutinium seruanda esse, quæ Pontifex tunc temporis seruanda præscribit, de quibus *suprà*; in electione verò, *quasi per inspirationem*, debet alium substituere, qui consensum ipsius decumbentis prodat scripto, aut voce per verbum *eligo*, Cum enim Pontifex nihil in hoc casu statuatur, standum est iuri communi, iure autem communi ea facere censemus, quæ auctoritate nostra, & nobis mandantibus sunt, *l. 2. C. de iure iur. an.* constare ta-

men

men debet Cardinalibus de mandato; & voluntate consentientis, vt. benè Sopran. *loco citato quest. 15.* Rodriquez *tom. 2. questionum regul. quest....art....* Miranda in *Manuali tom. 2. quest. 23. art. 7.* Syluester *verbo electio 1. quasi to 7.*

9. Secundo, dubium est, vtrum electio *per inspirationem* valida sit, si aliqui dissenserunt, & postea consensum præstiterunt. Respondeo affirmatiuè, quia prior dissensus extinctus est, & adhuc verum est hunc electum fuisse de consensu omnium; tum quia sicut ex opposito electio inualida est, dum quis consensit, & postea consensum reuocauit ante completam electionem (electio enim non dicitur facta nemine dissentiente) ita electio valida est, dum quis dissensit, & postmodum ante completam nominationem, seu electionem consensit, ita Hostiensis *tit. de elect. S. qualiter sit facienda.* Baif. *direct. 3. part. cap. 16.* Sopran. *lib. 3. cap. 21. quest. 11.*

Ex quo patet electionem, *quasi per inspirationem* non vitiari, & subverti ob dissensiones, & diuersas sententias, quæ tempore electionis intercesserant, sed postmodum omnes conquieuerunt, & in electionem vnius consenserunt. Ratio est, quia adhuc verum est dicere huiusmodi electionem factam fuisse nemine dissentiente, cum in conclusionem electionis omnes conuenerint, quamuis in electione in fieri non omnes concordessent, vt benè Sopran. *quest. 12.*

Idem sentiendum est, dum quis semel vno iam nominato, alium nominat ante completam electionem; huiusmodi enim electio valida est, quia fit nemine dissentiente in Conclauis clauso, & sine tractatu de speciali persona, vt suppono; imò laudabiliter agit, qui iusta de causa alium nominat, relicto primo, quem nominauerat; Sapientis enim, vel saltem sapientiæ est, iusta de causa mutare consilium; præsertim si in melius mutetur, quamobrem qui semel indignum nominauit sciens, aut nesciens, sed postmodum aduertens indignum esse, non solum ex honestate, verum etiam ex officio, tenetur suffragiū reuocare, dum potest, & dum cognoscit ex huiusmodi electione damnum Ecclesiæ sequi; item qui vnum nominauit, & postea

ſtea aduertit alium æque dignum, vel digniorem ab alijs omnibus probari, poteſt in eum qui ab alijs probatur conſentire, quia iuſtam habet mutandi ſuffragij cauſam, cum Eccleſiæ negotiũ vtiliter agatur, digniorem eligendo, & electionem quamprimum iuſtè, & legitime fieri poteſt abſoluendo, vt benè Sopran. *hæc cõdito queſt. 13. & 14.*

Obijcies, quòd ſemel placuit, amplius diſplicere non poteſt, *cap. quod ſemel de regul. iuris, in 6.* Præterea facultas ad aliquid faciendum ceſſat primo actu, *libouem, §. hoc ſermone, ff. de verborum ſignificatione.* Item qui ſemel in Pontificem nominatus, ius acquiſiuit, conſequenter illi fit iniuria alium nominando, præſertim cum turpius ſit eiſci, quàm non admitti, *cap. quemadmodum, §. alioquin de iureiurando, Gloſſa cap. per veſtras de donat. inter vir.* Reſpõdeo hæc valere ſolùm dum electio ſemel completa fuit, ſecùs ſi electio adhuc erat in fieri, nec ob id fit iniuria ſemel nominato, cum eligens vtatur iure ſuo, quo vt i poteſt quamdiu electio completa non eſt, nec ob id dicitur nominatum eiſcere, ſed dimittere, ſeu deferere, vt pluribus docet Sopran. *queſt. 13. & 14.*

10 Quarta conditio eſt, vt conſenſu præſtetur ſeruata præſcripta forma; forma autem quæ præſcribitur in Bulla Gregorij, eſt, vt conſenſus exhibeatur cum verbo *eligo* expreſſo ore, vel ſcripto, ſi ore exprimi nequeat. Ratio huius diſpoſitionis eſt, tum quia, verba ſunt animi notæ, & nullum certius eſt noſtræ mentis ſignum, quàm verba, vt communiter DD. fatentur, tum quia vitatur confuſio, & perturbatio, quæ in exprimendo alia ratione conſenſu ſequi poſſet; tum quia ſicut conueniunt in electione perſonæ, ita æquum eſt, vt in forma electionis non diſſentiant; tum quia conſenſu exprimi ſolet, aliquando nutu capitis, aliquando pedibus, in ſententiam eundo alterius, ſeu accedendo ad eum quem eligit, aliquando acclamatione, aliquando manuum extensione, ſeu eleuatione, ſeu compoſitione inter ſe, vel ad aliud, aliquando calculis, ſeu fabis, de qua re Cardinalis Bellarminus *de Cler. cap. 9. & 16.* Congruentior autem modus fit per verba, ergo hic iure merito præceptus fuit. Ratio verò qua Gregorius XV. addu-

adductus videtur, vt electio *quasi per inspirationem* fiat, adhibito verbo *elige*, est, quia huiusmodi verbum est maximè expressiuum consensus illius rei, de qua agitur, nullumque reperiri potest quod congruentius, facilius, & expeditius, videatur, vide Mirandam in *Manuali tom. 2. quest. 23. art. 17.* Syluestrum *verbo electio 1. questio 3.* Rodriquez *tomo 2. quest....*

11 Quinta conditio est, vt huiusmodi electio fiat, absque vllò præcedente tractatu de speciali persona; nam in Bulla Gregoriana dicitur, *Nullo præcedente de speciali persona tractatu: & infra, Nullo præcedente de persona speciali tractatu.*

12 Sed modò dubium est, Primò, quid intelligatur nomine tractatus. Respondeo intelligi consultationem, seu discussionem, indaginem, inquisitionem, colloquium, seu confabulationem, quæ ad aliquid perficiendum præmittitur, *l. 5. in principio, & §. penult. de prescript.* ita Baldus *tomo 4. consil. 133.* & alij communiter.

13 Secundò dubium est, quotuplex sit tractatus. Respondeo duplicem esse, alius dicitur consultiuus, seu informatiuus, alius decretiuus, seu decisiuus, seu definitiuus, seu inclusiuus; tractatus consultiuus consistit in inquisitione, seu informatione, quæ de re, seu persona aliqua traditur, vel suscipitur, vt si quis ab alio petat, an talis Cardinalis sit probata, vel deprauata vitæ, an ei placeat electio talis Cardinalis, an speret fore, vt ritè valeat Pontificium munus sustinere, an credat eligendum si proponatur, alter verò respondeat affirmando, vel negando, opponendo, vel collaudando, & inde accedat ad electionem; tractatus decisiuus suscipitur, vel dirigitur ad certò decernendum, seu stabiliendum, seu excludendum, vel includendum, & non tantum ad informandum, vel inquirendum, & explorandum, vt si nonnulli preuia promissione animo promittendi facta conueniant ad aliquem nominandum, vel sibi dent certam fidem de tali eligendo; si verò rationibus alicui suadeant, vt talem nominet, aliqui Doctores putant esse tractatum decisiuum, sed oppositum mihi probatur, nisi accedat promissio, seu conuentio: nam rationes potius pertinent ad tractatum

tum

tum hortatiuum, vel consultiui, quàm ad decisiuum; alioquin nūquam liceret rationes asserre in tractatu consultiuo, sed quasi temerè faciendus esset tractatus, vel omnia scrupulis plena redderentur; præsertim cùm adductio argumentorum, & rationum diuinæ inspirationi non aduersetur.

Ex quo licet inferre electionem, *quasi per inspirationem*, non vitari precibus, & exhortationibus præcisè, quia hæc nullibi prohibentur, & non sunt tractatus; in d. Sopranus *lococitato quest. 10.* idem sentientium putat, quando n. inæ, seu metus incurritur ad alicui suffragandum potius, quàm alteri, modò metus non incuriatur omnibus, & inscius sit ille qui eligitur. Ratio est, tum quia alioquin liberum esset cuique postea in pugnare electionem; tum quia metus non tollit omnino voluntarium; tum quia metus non est tractatus, & adhuc verum est dicere electionem factam fuisse nemine dissentiente, cùm is qui per metum consentit non dicatur dissentire licet præciso metu non consensisset, sed dissensisset: oppositum tamen mihi probabilius videtur iuxta dicta *quest. 1. punct. 2. num. 2.*

14 Tertiò dubium est, vtrum quilibet tractatus in electione, *quasi per inspirationem*, prohibeatur. Respondeo prohiberi decisiuum, & decretiuium; non verò informatiuium, seu inquisitiuium, & consultiuium,

Quòd prohibeatur decisiuus, patet; tum quia in hac Bulla prohibentur conuentiones de certa persona eligenda, tractatus autem decisiuus est conuentio de certa persona eligenda; tum quia vel prohibetur tractatus consultiuius, vel decisiuus; non consultiuius, vt statim probabo, ergo decisiuus; tum quia tractatus decisiuus de certa persona repugnat electioni *per inspirationem*; electio enim cum huiusmodi tractatu facta adscriberetur potius humanæ industriæ, quàm Spiritui sancto, *cap. per inquisitionem, de electione*; ergo Gregor. XV. hunc prohibuit in hac electione.

Quòd verò prohibitus non sit tractatus consultiuius, seu informatiuius probatur primò, quia ab antiquo iure non receditur, nisi quatenus Iure nouo statuitur, *l. præcipimus, S. si nali, C. de appellatione*; sed iure

N antiquo

antiquo conceditur tractatus consultiuus, & informatiuus *cap. in nomine Domini* 23. *distinct.* & iure nouo huiusmodi tractatus non prohibetur; nam illa verba, *Nullo precedente de speciali persona tractatu*, intelligi possunt de tractatu decisiuo, vt patebit ex rationibus, proximè sequentibus; ergo non est prohibitus tractatus consultiuus, seu informatiuus.

Secundò, quia idem Gregorius in sua Bulla ait, se non vetare tractatus pro electione habendos; sed tractatus informatiuus habendus est pro electione, *cap. in nomine Domini citato*; ergo tractatus informatiuus non vetatur.

Tertiò, quia Pontifex præsumendus non est sibi contraria dicere, cum ergo permittat, & prohibeat tractatus, dum prohibet; intelligitur de decisiuo, dum permittit, de consultiuo.

Quartò, quia Canones præcipientes tractatum ante alienationem bonorum Ecclesiasticorum, intelliguntur de consultiuo, & informatiuo, non de decretiuo cum conclusione; ergo etiam dum Pontifex prohibet tractatū in electione, intelligendus est de tractatu decisiuo.

Quintò, quia dum aliquid à pluribus in vtilitatem Ecclesiæ disponendum est, sacri Canones 12. *quæst.* 2. iubent tractatum præmitti; sed hic agitur de maxima Ecclesiæ vtilitate; ergo tractatus præmitti potest, non decisiuus; ergo consultiuus.

Sextò quia versamur in materia pœnali, in qua electio aliter facta irritatur, & electus excommunicatur, & Apostaticus existimatur; sed in materia pœnali benignior interpretatio facienda est; ergo, &c. ita Sopranus *lib. 3. de electione Pontificis, cap. 18. & cap. 21. quæst. 2. & alij recentiores.*

Obijcies, Pontifex mandat electionem, *quasi per inspirationem fieri*, nullo præcedente tractatu; dictio autem *nullus*, est vniuersalis negatiua, *Rota decis. 843. num. 3.* Menochius, Corneus, & alij apud Tuschum *tom. 2. lit. D. concl. 315. & seq.* apud Gratum, & alios; ergo excludit omnem prorsus tractatum. Respondeo illam dictionem esse vniuersalem, & intelligi de quolibet tractatu decisiuo, non de consultiuo;

tius; sufficientem enim rationem habemus ad hanc interpretationem faciendam.

15 Rogabis, utrum tractatus consultius, & informatius in electione *per inspirationem*, non solum sit permissus, verum etiam necessario præmittendus. Respondeo necessario præmittendum non esse. Ratio est, quia huiusmodi electio fit impulsu Spiritus sancti; Spiritus autem sanctus potest omnes absque prævio tractatu permovere, & impellere.

Obijcies, Papa *in cap. in nomine Domini*, 23. *distinct.* præcipit Cardinales convenire ad tractandum de electione Pontificis. Respondeo præcipere, ut conveniant ad agendum de electione, non autem præcipit, ut semper, & in omni electionis genere tractatum præmittant. 16 Quamvis dubium est quænam requirantur, ut tractatus decisivus, seu inclusivus vitiet, & irritam reddat electionem factam, *quasi per inspirationem*. Respondeo duo requiri.

Primò, ut tractatus fiat ante ipsam electionem; nam in Bulla Gregoriana dicitur, *Nullo precedente de speciali persona tractatu*; quamobrem si inchoata iam electione tractatus fiat, electio valida est, quia non dicitur præcedere electionem, sed comitari, & quod certo tempore prohibetur, alio censetur permissum, *l. promissor. ff. de constitut. pecun. c. l. si in suam, ff. de verborum obligat.* ita Sopranus *cap. 18. ad finem*, & *cap. 21. quest. 3. c. 4.*

17 Electio tunc inchoata censetur iuxta nonnullos Doctores, quos sequitur Sopranus, quando Cardinales omnes conveniunt in locum electionis, & parata sunt omnia ad faciendam electionem, exclusque sunt illi, qui ad electionem convenire non debent; in moralibus enim actio inchoata censetur, quando omnia parata sunt, & expedita ad agendum, ita Hostiensis, Boerius, & alij, asserentes electionem *per inspirationem*, non vitari tractatu in Capitulo, sed tractatu extra Capitulum habito; ego verò probabilius censeo, electionem tunc cæseri inchoatam, dum aliquis Cardinalium, alijs præsentibus, quantum est ex se aliquem in Papam acclamavit, seu suffragium tulit;

N 2 tunc

tunc enim res non videtur integra, sed inchoata; non verò videtur inchoata, dum parata sunt omnia, sicut iudicium non dicitur inchoatum ante citationem, quæ est actus iudicialis, etiam si alias parata essent omnia ad iudicium necessaria, iis tamen non inchoatis.

Secundò requiritur, vt tractatus decisiuus, seu inlusiuius fiat de speciali persona; Summus enim Pontifex approbat electionem, *quasi per inspirationem*, quæ fit nemine dissentiente; Nullo precedente de speciali persona tractatu; & infra, Nullo precedente de persona speciali tractatu.

Hinc sequitur primò, electionem, *quasi per inspirationem*, inualidam esse, dum præcessit tractatus de aliquo certo includendo, & hic electus fuit; idem sentiendum putat Sopran. lib. 3. cap. 21. quæst. 7. quando præcessit tractatus exclusiuus specialis personæ. Ratio ipsius est, quia huic conueniunt verba dispositionis; sed oppositum mihi probabilius videtur, si is de quo initus erat tractatus exclusiuus; electus ipse fuit in Pontificem; nam hinc magis apparet electionem factam fuisse; *quasi per inspirationem*, impulsu Spiritus sancti, cum homines ipsum antea promoueri nollent. Idem mihi dicendum videtur, dum tractatus inlusiuius præcessit, de alio, quàm de eo, qui modò electus fuit; nam hic non videtur electus hominum industria, sed Dei, qui omnes vnius moris facit habitare in domo, & fidelium mentes vnius efficit voluntatis. An autem excommunicatio incurratur, constabit ex dicendis disp. 2. quæst. 7. vbi ostendam incurri.

Secundò sequitur electionem validam esse, dum tractatus præcessit de excludendis omnibus Cardinalibus, talis nationis, seu de eligendo Papam, talis solum nationis. Ratio est, tum quia alioquin etiam irrita esset electio, dum Cardinales conueniunt, vt nullus qui non sit Cardinalis eligatur; tum quia hic non est tractatus de speciali persona; nam persona specialis, est persona certa, determinata, & indiuidua, seu hæc numero, ex Baldo in l. Gal'us, §. ille casu, ff. de liber. & posth. Panormit. & alij communiter apud Iacobatium de Concilio lib. 4. arr. 4. num. 140. An autem excommunicatio incurratur in præfato casu, certum est incurri, vt patebit ex dicendis disp. 2. quæst. 7.

Tertiò

Tertiò validam esse electionem factam præcedente tractatu de generali persona; tum quia, tractatus de speciali persona, de quo Pontifex loquitur, non extenditur ad tractatum, de persona generali; prohibitio enim certæ rei, non extenditur ad non expressam, *cap. quod secundum de offic. Ordinarij*; tum quia hic non repugnat electioni *quasi per inspirationem*, tractare enim de persona in generali, nihil est aliud, quàm agere ad eligendum aliquem in generali, quod in omni electione fieri consuevit.

18 Sed modo dubium est, utrum electio, *quasi per inspirationem* facta, præcedente tractatu de speciali persona inualida sit, si electus huiusmodi tractatum penitus ignorabat. Sopranus præceptor meus in *tractatu de electione Pontificis, lib. 3. cap. 2. quest. 5.* existimat validam esse. Ratio est, Primò, quia Summus Pontifex electum prævio tractatu, Apostolicum, & non Apostolicum vocat, vinculo excommunicationis, alijsque pœnis obstringit, & punit, sed pœna non debetur, ubi non est culpa; ergo hac pœna non punitur electus inscius tractatus; Secundò electio per simoniam, cuius inscius erat electus; non vitiat substantiam electionis; ergo neque tractatus de speciali persona, cum par ratio videtur. Tertiò, quia salubriter prouisum non esset Ecclesiæ, quia facta electione possent Cardinales contra electum excipere, & tractatum præcedentem probare.

Sed mihi dicendum videtur electionem inualidam esse, tum quia Pontifex absolutè irritat electionem *per inspirationem factam* præcedente de speciali persona tractatu, tum quia tractatus præcedens electionem, opponitur electioni, *quasi per inspirationem*; inde enim licet conijcere electionem factam non fuisse impulsu Spiritus sancti immediate (cùm Spiritus sanctus ad rem illicitam non impellat) sed Cardinalium opera, & industria, ita Hostiensis, Boerius, & alij asserentes tractatum extra Capitulum vitare electionem.

Ad primam rationem in contrarium. Respondeo inde probari electum ijs pœnis non puniri, non tamen electionem subsistere, non ob culpam electi, sed defectu eorum, quæ ad electionem *quasi per inspirationem*

spirationem requiruntur, ut à simili patet in contractu absque debita solemnitate celebrato, quatenus constat irritum esse, etiamsi bona fide factus sit.

Ad secundam, quicquid sit de antecedente, de quo *suprà quest. 2. §. unico*, negatur consequentia. Ratio disparitatis est, quia tractatus præcedens electionem opponitur rationi, & naturæ electionis *per inspirationem*.

Ad tertiam, Respondeo salubriter Ecclesiæ prouisum esse; tum quia Pontifex decernit ea seruari, quæ ad rationem talis electionis requiruntur; tum quia ob id non eliditur electio, quia cum omnes consenserint, fides præstanda non est ijs Cardinalibus, qui tractatum obijciunt, ut *suprà* docui cum Baldo, & alijs.

P V N C T V M I V.

De creatione Pontificis successoris facta per designationem, & electionem à Papa adhuc viuente.

S V M M A R I V M.

- 1 Pontifex licitè non potest sibi successorem eligere sine urgentissima causa.
- 2 Neque licitè potest successorem eligere sine consensu omnium Cardinalium.
- 3 Pontifex de plenitudine potestatis potest sibi successorem validè eligere.
- 4 Pontifices an aliquando vsi sint potestate absoluta eligendi Pontificem.
- 5 Clemens prius à D. Petro in successorem electus, an Papatu cessarit.
- 6 Linus, & Cletus non fuerunt absoluti Pontifices, sed cooperatores, & Suffraganei SS. Petri, & Clementis.
- 7 Tractatio de potestate absoluta Pontificis ad Theologos pertinet, non ad Canonistas.

8 Pontifex an possit sibi duos successores eligere, eodem tempore, qui eandem auctoritatem adequatè, vel inadaquatè in totum orbem exercent.

Tria principaliter in hac questione explicabo ; Primò, vtrum Pontifex possit sibi, de potestate solum absoluta successorem licitè eligere; Secundò, vtrum validè; Tertiò, vtrum Papa validè possit duos successores eligere, qui eandem eodem tempore auctoritatem exercent, seu an Ecclesia duos Summos Pontifices creare possit.

PRIMA PROPOSITIO.

I Summus Pontifex licitè non potest sibi successorem eligere, sine vrgentissima, & grauissima causa, & sine consensu omnium Cardinalium; quod non possit sine vrgentissima causa probatur.

Primò, quia Summus Pontifex vti non debet potestate absoluta, seu plenitudine potestatis, absque grauissima causa, ex Innocentio *cap. innotuit, de electione*. Panormit. *in cap. aa hac de rescriptis*, & alijs quos sequitur Iacobatius *lib. 7. art. 5. num. 134. & 292*. Electio autem successoris pertinet ad plenitudinem potestatis, alioquin Summus Pontifex hoc pacto fere semper eligeretur, quod est contra consuetum Ecclesiæ vniuersalis vsum.

Secundò, quia ex huiusmodi electione facilè arripi posset occasio scandali, & Papatus iure quasi hæreditario ad consanguineos transmitteretur, cum graui Ecclesiæ vniuersalis damno, & plurimorum scandalo.

Tertiò, quia Cardinales hoc tempore iurant obseruantiam constitutionis Greg. XV. circa electionem Papæ; Papa autem non potest contra iuramenti vinculum facere, cum iuri naturali diuino subiiciatur; nisi fortè dicas Cardinales iurare obseruantiam illius constitutionis, dum Papa Collegialiter ab ipsis tanquam Cardinalibus eligendus est, non verò dum Papali auctoritate gaudebunt, alioquin non liceret Papæ, Gregorij constitutionem variare.

2 Quòd

2 Quòd verò Pontifex licitè nequeat sibi successorem eligere sine consensu omnium Cardinalium, patet, quia singulis Cardinalibus per capita competit ius eligendi Pontificem; sed iuri alterius derogari non potest ipso non consentiente, *cap. quod omnes tangit de re. iur. in 6. & cap. 1. 66. distinet.* ergo Pontifex non potest successorem eligere non consentientibus singulis Cardinalibus, alioquin ipsum Iuri derogaret, & præiudicium afferret.

Obijcies, Reges, & Principes licitè eligūt sibi successores absque ullius consensu, & sine vrgentissima causa; ergo etiam Pontifex sibi successorem licitè potest eligere absque gravi causa, & sine Cardinalium consensu. Respondeo primò, negando antecedens, nisi populus consentiat, aut nisi Reges, & Principes pleno iure, & independente à populorum voluntate, Principatibus, & Regnis potiantur. Respondeo secundò, negando consequentiam. Ratio disparitatis est, tum quia huiusmodi Reges, & Principes pleno iure in suos subditos gaudent, eo quod iure belli Regna sibi subegerint (subactis enim libertas in totum, vel in partem auferitur) vel populis consentientibus hoc ius liberè acquisiuerunt; tum quia præfati Reges ius eligendi in alios non transtulerunt, ut suppono, alioquin nec ipsi licitè possent alium Regno præficere, inuitis, & dissentientibus ijs qui eligendi iure gaudent; tum quia sacer Principatus temporalia Regna dignitate longè antecellit, nec par est, ut iure quasi hæreditario instar bonorum temporalium in successores transmittatur.

SECUNDA PROPOSITIO.

3 Summus Pontifex de plenitudine potestatis potest sibi successorem validè eligere. Ratio est.

Primò, quia electio Summi Pontificis pertinet ad visibile Ecclesiæ administrationem, & gubernationem; sed Summus Pontifex ea omnia facere potest, quæ pertinent intrinsecè ad visibilem Ecclesiæ administrationem, ut patebit ex rationibus proximè sequentibus; ergo potest sibi successorem eligere.

Secun-

Secundo, quia Summus Pontifex valde potest Collegio Cardinalium se adhuc viuente facultatem eligendi successorem concedere, (quicquid in contrarium dicant Albanus *quest.* 53. & Azorius *lib.* 4. *cap.* 6. *quest.* 4.) ergo potest etiam per seipsum eligere; hæc consequentia probatur; tum quia administratio Ecclesiæ est perfectissima Monarchia; consequenter quicquid potestatis hierarchicæ in singulis Ecclesiæ membris reperitur, id totum longè perfectius residet in supremo capite, quod in Ecclesia constat esse Summum Pontificem, ut fuscè probat Nicolaus Sander *de Eccles. Monarch. lib.* 1. & 2. Bellarm. *lib.* 1. *de Romano Pontif.* Beram. *lib.* 2. & 3. contra Spalantem, & Suarez *de fidei defensione aduersus Regem Angliæ, lib.* 3. *cap.* 19. & seqq. tum quia qui potest aliquid perfectum, potest etiam idem munus per seipsum obire, nisi dignitatis suæ limites excedat, propriumque gradum dedecet.

Tertio, quia D. Petrus potestatem habuit eligendi sibi successorem, cum huiusmodi potestas intrinsecè pertineat ad visibilem vniuersalis Ecclesiæ administrationem; quæ D. Petro deneganda non fuit; ergo etiam Summus Pontifex facultatem habet eligendi sibi successorem; hæc consequentia probatur, quia Summus Pontifex eandem integram, illasam, & illibatam habet potestatem erga visibilem Ecclesiam, quam habuit D. Petrus, quod triplici ratione probatur; tum quia D. Petrus, & successoribus æquè dictum fuit *pascite oues meas*; tum quia Summus Pontifex dicitur hæres, & successor Petri; hæres autem succedit in integram auctoritatem præcessoris, nisi aliquid ei à Prædecessore detractum fuerit, & diminutum, quod dici non potest de auctoritate Papæ, cum id nulla ratione, & sufficienti fundamento probari queat; tum quia alioquin Hæreticis, dum casus aliquis circa Summi Pontificis auctoritatem contingeret, occasio daretur afferendi Papam in eo casu facultatem non habere, etiamsi illam D. Petro concedant; vide Suarez *in tractatu de fidei defensione, lib.* 3. *cap.* 13. *num.* 12. & *cap.* 15. & sequent.

Quarto, quia D. Petrus elegit Clementem sibi successorem, ut restatur ipsemet Clemens *epist.* 1. *ad Iacobum fratrem Domini, & lib.* 3. *constit.*

flit. cap. 45. Ioannes Papa in epist. ad Episcopos Germaniæ; & habetur cap. 1. 8. q. 1. Sanctus Leo, Venerabilis Beda, & alij apud Cardinalem Bellarmin. lib. 1. de Clericis cap. 8. & apud Baronium in Annalibus anno 69. num. 11. apud Sopranum præceptorem meum in manuscriptis de electione Summi Pontificis lib. 1. cap. 8. quibus adde Suarez loco citato num. 13.

Quintò, quia Episcopi, & alij inferiores Prælati possunt consentiente Summo Pontifice sibi successorem eligere, vt quotidiana constat experientia; ergo etiam Papa potest sibi successorem eligere; cum minoris potestatis Episcopis, & Prælatis inferioribus minimè sit.

Sextò, quia potestas eligendi Pontificem est sacra, & spiritualis, consequenter est à Deo immediatè, & in illo residet cui Deus eam contulit, Christus autem eam contulit immediatè Pontifici; non autem alijs; Christus enim non commisit Ecclesiam suam Ecclesiæ suæ, oues ouibus, agnos agnis, sed oues & agnos Pastori, & fideles Capiti, vt bene post Caiet. *opusc. 1. de auctor. Papæ*, Suarez loco citato *lib. 3. cap. 10. Sopran. lib. 1. de elect. Papæ, cap. 9. S. 1.*

Septimò, quia ex sententia, quæ Summo Pontifici facultatem eligendi sibi successorem denegat, plura sequerentur absurda; nam Primò sequitur, Ecclesiæ statum non esse perfectè Monarchicum, sed potius Polyarchicum, quod est falsum; tum quia Christus Petro tantum, & Pontificibus ipsius pro tempore successoribus dixit, *Pasci oues meas*; tum quia potestas Ecclesiastica quæ in singulis Ecclesiæ membris reperitur, perfectius in Romano Pontifice tanquam in Capite residet, & continetur.

Secundò sequeretur statum Monarchicum non exigere, vt omnis potestas, quæ circa Reipublicæ administrationem in membris reperitur, longè perfectius in capite Monarchiæ contineatur; hoc autem falsum est, vt ex Aristotele 3. *Polit. 5. & 8. Ethic. 10.* probant Bellarmin. *lib. 1. de Pontifice cap. 1. & alij.*

Tertiò sequeretur perfectum Monarcham non posse successorem eligere, vel de successore agere, hoc autem perfectæ Monarchiæ aduersatur, ex Aristotele *lib. 5. Polit. 3. & lib. 8. cap. 10. & alijs.*

Quar-

Quartò sequitur non omnem potestatem, quæ in Petro fuit, esse etiam in Pontificibus ipsius successoribus; hoc autem falsum est; tum quia potestas eligendi, pertinet ad Ecclesiæ administrationem; omnis autem potestas pertinens ad Ecclesiæ administrationem, æquè in successoribus residet, ac in Petro, cum Christus æquè omnibus dixerit, *Pasce oues meas*; tum quia sequeretur mutatum esse Ecclesiæ regimen, cum Petri successores idem præstare nequeant quod præstitit Petrus; tum quia ex potestate, quam Christus Petro contulit, non possemus arguere, quid Pontifices hoc tempore possint, si semel admittamus potestatem aliquam in Petro extitisse, quæ in successoribus non reperiatur: aliam rationem affert Suarez, *de Fidei defensione lib. 3. cap. 18. num. 12.* quæ apud ipsum videri potest.

Octauò, quia huius sententiæ sunt egregij, & nobiles Doctores, tam Canonistæ, quàm Theologi, Felinus *cap. 1. de constit. num. 23.* Cardinalis Iacobatius *lib. 9. de Concilio art. 3. num. 10.* Andreas Duallius, *lib. 3. de potest. Pontificis*, Victoria *in Relat. 2. de potest. Papæ, q. 2. num. 2. & 3.* Caiet. *in opusc. 1. de auctoritate cap. 13.* Martinus Ledesma *2. parte comment. lib. 4. q. 20. art. 1. conclus. 10.* Cardinalis Bellarminus *lib. 2. de Clericis cap. 8.* Franciscus Suarez *tractatu de fide, spe, & charitate, disp. 10. sect. 4. num. 16. & in tom. de fidei defensione, lib. 3. cap. 13. num. 13.* Franciscus Turrianus *lib. 3. cap. 10.* Ioannes Hieronymus Sopranus *de electione Summi Pontificis, cap. 7. & seqq.* & alij Theologi contra quamplures Canonistas, quos infra in obiectionibus proximè sequentibus enumerabo.

Obijcies primò, ius naturale, & diuinum dictare videntur, vt quis sibi successorem non eligat sine interuentu Cleri, teste Magno Leone *cap. in nomine, distinct. 23.* ergo Summus Pontifex iure naturali, & diuino, non potest se solo sibi successorem eligere. Respondeo primò, hinc solum colligi, Pontificem licitè non posse per se ipsum solum successorem pronuciare, non tamen hinc sequitur electionem fore inualidam; cum multa illicitè fiant, quæ tamen facta tenent. Respondeo secundò Leonem eò loci loqui de electione Episcopo-

rum, & aliorum inferiorum, quorum electio non ad Laicos, sed ad Ecclesiasticos pertinet; idè enim asserit electionem Ecclesiasticorum, sine interuentu Cleri fieri non posse, vt explicet huiusmodi potestatem penes Laicos non residere, dicitur tamen à Clero fieri, dum auctoritate Pontificis, qui vniuerso Clero præsidet, celebratur.

Obijciès secundò electio successoris subsistere non potest; nam vel successor eligitur, viuentè Summo Pontifice, & sic essent duo Summi Pontifices, eodè tempore, cùm successor à Papa legitime electus, sit verus Pontifex, ex suppositione; vel eligitur eo mortuo, & hoc dici non potest, cùm Papa qui è viuus decessit, erga visibilem Ecclesiam potestate careat. Respondeo eligi à Papa adhuc viuentè, non per electionem absolutam, quæ statim vires habeat, sed per designationem, pro eo scilicet tempore, quo Papa ex hac vita migrauerit, quo pacto Dauid electus fuit à Saule, & Consules alias in Republica Romana eligebantur, & hæres instituitur à testatore, & lex vim habet etiam mortuo conditorè; nec tamen hinc sequitur duos esse, eodè tempore in Ecclesia Pontifices, cùm successor electus, non acquirat Pontificatum per absolutam electionem, sed per designationem, quæ completum effectum sortitur mortuo præcessore.

Dices non-entis nullæ sunt qualitates, & operari supponit esse, cap. lona de electione, cap. nuper de donat. inter virum, & uxorem, & l. traditio, ff. de acquir. rerum domin. l. eius qui, Si quoniam, ff. si certum petatur, l. Pomponius, S. si final. ff. de acquirenda possess. ergo electio mortuo Pontifice non prodest. Respondeo non-entis, seu mortui nullas esse qualitates, seu operationes de integro, & totaliter, posse tamen esse effectum completum eius actionis, quam dum viueret, egit, vt in nostro casu.

4 Obijciès tertio, Pontifices numquam vsunt hac potestate; ergo signum est hanc potestatem apud ipsos non residere! Respondeo primò, D. Petrum hac potestate vsu fuisse, in electione Clementis, & probabile est etiam successores hac potestate præcis temporibus vsos fuisse, cùm fideles in ipso nascentis Ecclesiæ ad electionem Summi

mi

mi Pontificis commodè conuenire non possent, vt innuunt Pamelius. *in notis ad Epist. 52. S. Cypriani, num. 3.* & apud eum Pichius, Platina, & Panuinus; & Bonifacius elegit Vegelium, quamuis postea electionem reuocauerit, eo quòd à Vegelio deceptus fuisset. Respondeo secundò, negando consequentiam, quamuis enim admitterem alios Pontifices hac eligendi forma vsos non fuisse, non tamen hinc sequitur Papam hac potestate destitutum esse, cum aliqua fieri possint à Papa, quæ hactenus facta non fuerunt, nec cuncta hactenus contigerint, quæ possibilia existimantur, sicut ante Martinum V. nunquam cum aliquo dispensatum fuerat in voto solemnì Religionis, & nihilominus facultas in eo voto dispensandi Summo Pontifici competebat, & sicut Papa posset cum vxore manere, ex communi DD. sententia, si forte vir coniugatus in Papam eligeretur, quem Electores nescirent vxorem habere, & vxor ab eo recedere nollet, & tamen hic casus nondum accidit, nec euenturum credo.

Obijcies quartò, si potestas eligendi successorem Summo Pontifici conuenit, maximè, quia D. Petrus elegit sibi successorem Clemètem, & hanc potestatem in successores transtulit, sed hæc ratio non est firma, & valida. Primò, quia incertum est Petrum sibi successorem Clemètem elegisse. Secundò, quia etiamsi admittamus elegisse iuxta nonnullorum Patrum auctoritatem, nihilominus non verè elegit, sed tantum nominauit; nomen enim electionis propriè loquendo adhiberi solet, tam ad significandam nominationem, quam propriam electionem. Tertio, quia hoc fuit priuilegium personale sancti Petri, sicut fuit donum miraculorum; priuilegium autem personale ad successores non transfertur. Quarto, quia Clemens immediatè non successit D. Petro, sed Lino, seu Cleto; quarto enim inter Pontifices ordine numeratur Clemens, vt patet, tum ex narrationibus historicis, tum ex *Canone Missæ*, ibi *Lini, Cleto, Clementis*. Quintò, quia à morte S. Petri, vsque ad obitum Clementis intercesserunt 26. anni: nam fertur Clementem mortuum esse tertio Trajani anno; & Lino vndecim annos, sex Cleto, & nouem Clementi adscribant; yel ergo dicendum

dum est, Clementem in Pontificatu viginti sex annis extitisse, quod est contra vulgatum illud axioma, *non videbis annos Petri* (Petrus enim tantum 25. annis Ecclesiam vniuersalem rexit;) vel asserendum est Clementem à D. Petro electum non fuisse, cum Cleti successor fuerit. Respondeo ex electione Clementis à D. Petro facta maximum desumi argumentum, ad probandum Summos Pontifices, hac eligendi facultate gaudere; an autem D. Petrus, Clementem sibi successorem elegerit, superius à me probatum fuit in quarta ratione; Ex quo patet responsio, ad primam huius quartæ obiectionis rationem.

Ad secundam. Respondeo Doctores, & Patres nomine electionis, qua D. Petrus Clementem elegit, intelligere veram, & propriam electionem, vt apertè constat, tum ex Ioanne Papa, & ipsomet Clemente, alijsque asserentibus D. Petrum tradidisse Clementi Romanum Pontificatum, tum ex venerabili Beda, affirmante D. Petrum consecrassse Clementem in sibi successorem, tum ex Cronologico Pontificum, quod communiter circumfertur; hæc autem verificari non possunt de nominatione propriè accepta, sed de electione.

Ad tertiam. Respondeo negando illud fuisse priuilegium personale D. Petri; tum quia potestas eligendi successorem pertinebat, & pertinet intrinsecè ad Ecclesiæ gubernationem; potestas autem intrinsecè pertinens ad visibilem Ecclesiæ gubernationem, non est personalis, sed realis adnexa dignitati, & collata D. Petro, & eius successoribus, dum Christus vniuersaliter, & indistinctè dixit, *Pasce oves meas*; tum quia si semel admitteremus ea quæ à D. Petro gesta fuerunt, non ex reali, sed ex personali priuilegio facta fuisse, tota ferè Summi Pontificis potestas rueret, & non leuis occasio de ipsius auctoritate detrahendi Hæreticis concedi videretur; Hæretici enim admittunt Petrum fuisse caput Apostolorum, Vicarium Christi, & quamplura in Ecclesia adiuuanda potuisse; admittunt etiam Summum Pontificem esse Petri successorem, sed cum deducimus hoc fecit Petrus, vel ab eo fieri potuit: ergo etiam à Pontifice ipsius successore fieri potest: Negabunt hanc consequentiam asserendo hoc fuisse personale

nale Petri priuilegium . Ad id quod dicitur de potestate patranda miracula, quæ D. Petro concessa fuerat, respondetur huiusmodi potestatem pertinere ad gratias gratis datas, & non spectare intrinsecè ad vniuersalem Ecclesiæ administrationem; nam etiam alij qui gubernationi Ecclesiæ non præsumt, dono miraculorum Deo concedente frui possunt .

Ad quartam respondent aliqui . Primò Clementem præmodestia Pontificatui cessisse, vt exemplum successoribus præberet fugiendæ dignitatis, etiam si D. Petrus ipsum tanto dignitatis gradu promeritum, & dignum pronunciaffet, ita Suarez *tomo de fidei defens. lib. 3. cap. 13. num. 13.* vbi hanc sententiam probabiliorē vocat .

5 Respondeo secundo, Clementem fuisse immediatè Petri successorem, nec vnquam Pontificatui renunciasse, vt constat ex Ioanne Papa III. *in sua epistola*, idemque ex Damaso *in vitis Pontificum* . Terulliano *de præscript.* cap. 32. D. Hieronymo *lib. 1. aduersus Iovinianum*, & cap. 52. *in Isaiam* . Nicephoro, & alijs; probant Franciscus Turianus *de Canone Apostolorum*, cap. 10. Parisius *de resignat. lib. 2. quæst. 1.* & Sopran. *de electione Summi Pontificis*, lib. 1. cap. 9. Præterea in Concilio Florentino, Alexander inter Põtifices quinto loco post Petrum enumeratur, quod fieri non posset, nisi Clemens statim post D. Petrum successisset, suppressis Lino, & Cleto .

6 Nam Linus, & Cletus non fuerunt absoluti Pontifices, sed cooperatores Pontificatus, & suffraganei D. Petri, adhuc viuentis, vt testantur Ioannes Papa *loco citato*. Azorius 2. *part. lib. 4. cap. 6. quæstio 5.* & alij; hæc de causa Linus, & Cletus inter Pontifices enumerantur, licèt veri Pontifices minimè fuerint; Imò Linus, qui proximus Petro enumeratur, ante D. Petri mortem martyrij palma Capitone, & Rufo Consulibus coronatum fuisse ferunt . Metaphrastes *in vita SS. Petri, & Pauli*. Marianus Scotus *in Chronico*, Sophorinus Hierosolym. *homil. de agone Petri*. Baronius verò *tomo 1. anno 80.* & alij putant Linum secundo post Petri mortem anno obiisse .

Ad quintam, Respondeo variam fuisse annorum supputationem;
alij

alij enim dicunt Linum viuentem Petro, mortuum fuisse, alij eo defuncto, asseruntque Linum, & Cletum, tot annos Pontificatum gessisse, non quia verè Pontifices fuerint, sed quia D. Petri in Pontificatus officio cooperatores extiterunt. Alij respondent Clementem confirmasse Linum, & Cletum, iisque coadiutoribus, & cooperatoribus exemplo Petri vsum fuisse, consequenter tot annos Pontificatus Lino, & Cleto adscribunt: verùm istæ responsiones difficultatem non euertunt, adhuc enim dici posset Clementem viginti sex annis Ecclesiam rexisse, licet opera Lini, & Cleti vsus fuerit; quamobrem respondendum censeo Clementem nō viginti sex annis, sed nouem, Pontificale onus post Christi mortem sustinuisse, à die 3. Kalen. Iulij anni 68. vsque ad diem 11. Kalendas Decembris anni Christi 77. non quidem viuentem Traiano, sed Vespasiano, cuius decreto interfectus fuit, teste Honusrio.

Obijcies quintò, si Summus Pontifex successorem eligendi facultatem haberet, grauissima damna, & incommoda in Ecclesia Dei sequerentur, inter cetera facile arriperetur occasio captandæ mortis.

Respondeo hinc solum inferri Summum Pontificem non posse successorem eligere, sine grauissima causa, & consensu vniuersi Cardinalium catus, non tamen hinc sequitur electionem inualidam fore, quamuis enim priuilegiarius aliquando suo priuilegio abutatur, & dignus efficiatur qui priuilegio priuetur, non tamen ob id priuilegio caret, & inualidè agit quicquid agit. Respondeo secundo, ad diuinam prouidentiam pertinere, vt non permittat electionem successoris sine sufficienti causa, sicut ad eandem prouidentiam pertinet nō permittere, vt Pontifex auctoritatem omnium Episcoporum in vniuerso orbe existentium reuocet, aut omnia ieiunia abroget, aut alia præcepta Ecclesiastica bono communi Ecclesiæ necessaria tollat.

Ad id quod dicitur de periculo captandæ mortis. Respondeo id esse quasi per accidens, ex malitia nonnullorum, alioquin neque testator posset hæredem instituere, nec Papa posset Episcopo facultatem eligendi successorem concedere, nec permittendæ essent le-

ges,

ges, quibus scitur, quisnam ex filijs mortuo patre, regnum consecutus sit.

Obijcies sextò, Doctores ferè communiter in Iure Canonico non mediocriter versati, facultatem eligendi successorem Summo Pontifici denegant, Glossa in cap. si transitus 79. dist. & §. his omnibus 8. quæst. 1. Archid. cap. si transitus, dist. 79. Rolandus Rubrica de testamentis, num. 3. Panormit. cap. accepimus de pactis. Martinus Laudensis de Cardinalibus quæst. 20. & 39. Gomez reg. de infr. resig. q. 1. Albanus de Cardin. quæst. 32. Iacobatius lib. 5. de Concilio art. 22. num. 2. & lib. 6. art. 8. Gondislaus Villadiego de orig. & potest. Cardinal. quæst. 5. num. 19. & alij apud præfatos Doctores, quibus adde nonnullos Theologos Luisium Turrianum tract. de fide quæst. 1. art. 10. disp. 15. dub. 3. vers. Sed difficultas. Azorium 2. part. lib. 4. cap. 5. quæst. 3. & alios apud Turrecrematam cap. in nomine, quæst. 1. distinct. 23. ergo signum est Summum Pontificem non posse successorem eligere. Respõdeo primò plures alios Doctores præsertim Theologos superiùs à me relatos, his proximè citatis opponi. Respondeo secundò, plures ex præfatis Doctoribus loqui de potentia ordinaria Pontificis, non de absoluta, de qua nos loquimur.

Respondeo tertio ad Theologos, non autem ad Canonistas, spectare tractationem, & disputationem de auctoritate absoluta Summi Pontificis, cõsequenter fidem potius in hac re præstādā esse Theologis, quàm Canonistis.

7 Quod tractatio de hac re ad Theologos pertineat, probatur, quia potentia absoluta Summi Pontificis continetur sub obiecto Theologiæ; est enim aliquid supernaturale, & sacrum, spectans ad actus liberos Dei, quod supposita reuelatione per humanum discursum cognoscitur: ergo illius tractatio ad Theologos spectat: hac consequentia probatur, quia tractatio alicuius rei ad eam facultatem pertinet, intra cuius obiectum continetur; potentia autem Summi Pontificis absoluta continetur intra obiectum Theologiæ, nam Theologia pro obiecto habet Deum, quatenus est ex reuelatis per discursum cogno-

P scibi-

scibilis, siue in sua essentia, siue in suis actibus, tam liberis, quàm necessarijs.

Quòd hæc tractatio non pertineat ad simplices Canonistas, probatur, quia absoluta potentia Pontificis non continetur intra ambitum, & fines Canonici Iuris; ergo tractatio de absoluta potestate Pontificis, non pertinet ad Canonistas: hæc consequentia probatur, quia nulla facultas fines sui obiecti transcendit, vel egreditur, sicut nec futor vltra crepidam; antecedens probatur, quia obiectum Iuris Canonici est vita humana, quatenus per sacros Canones, dirigi, gubernari, & coerceri potest; sicut obiectum Iuris Ciuilis, est hominum vita, quatenus Iure Ciuili instituenda, & dirigenda; potestas autem absoluta Papæ non coercetur legibus Canoniciis, cùm Princeps suis legibus non teneatur, nec par in parem habeat potestatem.

Dices, Canonistæ possunt de potestate Summi Pontificis ordinaria differere, & disputare; ergo etiam de absoluta, cùm par ratio videatur.

Respondeo negando consequentiam, nisi doctrinam à Theologis mutuò accipiant, vt disparitas istius rei clariùs intelligatur, aduertendum est, potestatem Principis duplicem esse, vnâ absolutam iuxta quam suis, vel prædecessorum legibus non tenetur, alteram ordinariam, iuxta quam suis, vel prædecessorum legibus accommodare se consuevit, cùm ergo Canonistæ versentur circa Canones, quorum dispositioni Papa consuevit se accommodare sequitur Canonistas posse de potestate Papæ ordinaria agere, illiusque naturam, fines, & conditiones explicare, non verò de absoluta, vt eruditè explicat Sopranus præceptor meus in *manuscriptis de electione Papæ lib. I. cap. 9. ad finem, §. vnico.*

Dices secundò, in corpore Iuris non solum continentur præcepta Ecclesiastica; verum etiam referuntur diuina, quibus declaratur quid credendum, quid faciendum, vel omittendum sit: ergo Canonistæ agere possunt de rebus diuinis, & consequenter de potestate absoluta Papæ, cùm scientia Canonica circa Canones versetur, &

Papa

Papa legibus diuinis teneatur. Respondeo hinc solum sequi Canonistas posse de ijs rebus disserere, quæ in Iure Canonico traduntur, vel explicantur, non verò de ijs quæ Papa de potestate absoluta præstare potest; cum enim in corpore Iuris, nihil hætenus explicatum; vel definitum fuerit circa potestatem Papæ absolutam in electione successoris; sequitur tractationem de huiusmodi potestate ad Canonistas non pertinere, sed potius ad Theologos, intra quorum obiecti ambitum præfata potestas continetur.

T E R T I A P R O P O S I T I O.

8 **P**apa non potest sibi duos successores eligere, qui eandem eodem tempore auctoritatem exercent, consequenter duo esse non possunt Ecclesiæ Pontifices, consequenter Ecclesia duos Summos Pontifices creare non potest. Ratio est, tum quia Papa est Vicarius Christi, qui est Caput Ecclesiæ: sicut autē dedecet, vt vnus corporis plura sint capita, ita etiam vt Ecclesiæ plures sint Summi Pontifices; tum quia Ecclesia, seu Pontifex non confert futuro Pontifici potestatem, sed designat, & eligit personam, cui Deus, posita electione debito tempore, auctoritatem & iurisdictionem tribuit: Deus autem præfatam auctoritatem non tribuit pluribus, sed vni: Christus enim dum Pontificatum instituit, dixit Petro, *Tues Petrus, & super hanc petram edificabo Ecclesiam meam, pasce oues meas, quodcumque ligaueris super terram, erit ligatum, & in Cælis, quodcumque solueris super terram, erit solutum & in Cælis*, ita Glossa in cap. non autem 7. quest. 1. Sotus in 4. dist. 24. quest. 2. art. 5. Iacobatius de Concilio lib. 4. art. 3. numero 4. Gerson, & alij apud Azorium 2. part. lib. 4. cap. 12. & apud Suarez. tomo de fidei defenf. lib. 3. cap. 10. & seqq. contra Armacanum, Ocham, & alios.

Hinc sequitur primò non posse creari duos Pontifices, qui supremam in solidum in toto orbe iurisdictionem habeant, vt patet, tum ex allata ratione, tum quia Papa potestatem habet in vniuersas Christi

P 2 oues:

oues: tunc autem Papa, huiusmodi potestatem in vniuersas Christi oues non haberet; nam vterque Pontifex esset Christi ouis, & tamen alter in alterum potestatem non haberet, cum par in parem non habeat imperium, *l. nam & magistratus, ff. de recept. arbitr. cap. inferior, & cap. demique 21. distinct.*

Secundò, sequitur creari non posse duos Pontifices, quorum neuter quidquam possit sine altero, sed omnia simul ambo præstare debeant. Ratio est, tum quia id pugnat cum Christi institutione: Christus enim vnum instituit, & auctoritatem independentem ab altero contulit, tum quia Summa Pontificis potestas hoc pacto minueretur.

Tertiò, sequitur creari non posse duos Pontifices, quorum alter potestatem habeat in Oriente, alter in Occidente, tum quia Christus vnum tantum Pontificem instituit, cui vniuersam Ecclesiæ curam demandauit: tum quia Ecclesia duo haberet capita, nec ab utroque influxum reciperet, quod est contra naturam capitis.

Obijcies primò, Linus Pontificiam potestatem habuit, & exercuit viuente Petro: ergo duo Pontifices in solidum eodem tempore esse possunt. Respondeo Linum tunc temporis fuisse Petri coadiutorem, & cooperatorem, non autem Christi Vicarium, & Papam, vt superius docui, idèmq; habetur in Chronologico, quod gesta Summorum Pontificum summarie perceruset.

Obijcies secundò, duo possunt esse Imperatores, & duo creari possunt eiusdem Ecclesiæ Antistites: ergo & Pontifices. Respondeo negando consequentiam. Ratio disparitatis desumitur ex institutione Papatus, Christus enim vnum Vicarium instituit, non plures simul; iure vero diuino interdictum non est, plures creari Imperatores, vel Antistites vnius certæ Ecclesiæ, vide Thomam Campegium de *Concilio cap. 16.* vbi quærit an duo esse possint Imperatores.

Epilogus, seu brevis enumeratio eorum, quibus in hac prima disputatione ostendimus substantiam electionis vitari, & euertere.

- 1 **S**I eligatur fœmina, iuxta dicta, quæst. 2. num. 1.
- 2 Si eligatur vir vsu rationis carens, q. 2. n. 2.
- 3 Si eligatur vir non baptizatus, quæst. 2. num. 8.
- 4 Si eligatur Hæreticus, quæst. 2. num. 9.
- 5 Si eligatur aliquis per simoniam ab Electoribus, aut electo commissam: hic enim non solum ea vice inualidè eligitur, verum etiam inhabilis efficitur, qui in futurum eligatur, quæst. 2. num. 10. & ibidem toto, §. vnico.
- 6 Si electus non consentiat electioni de se factæ, quæst. 2. num. 8.
- 7 Si electio non fiat in Conclau, aut fiat in Conclau nondum clauso, tota quæst. 3.
- 8 Si electio liberè non fiat, sed per impressionem, seu metum grauem, quæst. 1. puncto 2.
- 9 Si electio alia ratione fiat, quàm per scrutinium, compromissum, vel quasi inspirationem, consequenter electio facta per adorationem hoc tempore irrita est, quæst. 5. num. 3. & ibidem puncto 1. num. 5.
- 10 Si electio per scrutinium fiat suffragijs schedularum non secretis, quæst. 5. puncto 1. num. 3.
- 11 Si plures in schedula scrutinij nominentur, illud enim suffragium irritum est, consequenter si eo suffragio numerus suffragiorum ad electionem requisitus compleatur electio irrita est, quæst. 5. puncto 1. num. 2.
- 12 Si is qui vni in scrutinio suffragatus est, eidem suffragetur, & in accessu, suffragium accessus inualidum est, consequenter non prodest ad electionem, quæst. 1. puncto 3. num. 2.
- 13 Si in electione per compromissum, non seruetur forma à Compromittentibus præscripta, quæst. 5. puncto 2.
- 14 Si in electione, *quasi per inspirationem* tractatus de speciali perso-
na

na præcedat, aut non adfit consensus omnium, expressus verbo *eligo*, voce prolato, aut saltem scripto si ore proferri nequeat, quæst. 5. punct 3.

- 15 Si elector seipsum eligat; ipsius enim suffragium sibi non prodest, quamvis ipse in numero Cardinalium in Conclavi existentium connumerandus sit, quæst. 5. puncto 1. num. 11.

DISPUTATIO SECVNDA.

De Censuris, occasione creationis Romani Pontificis editis.

PLures censuræ occasione creationis Papæ in Pontificijs constitutionibus requiruntur, quarum.

Prima, est contra facientes sponsones supervita, morte, & futura electione Summi Pontificis.

Secunda, contra ambientes Papatum.

Tertia, contra dominos temporales, qui Sede vacante non observant sibi præscripta circa Romani Pontificis electionem.

Quarta, contra mittentes litteras, vel nuncium, aut alloquentes Cardinales in Conclavi existentes.

Quinta, contra occupantes bona Cardinalium in Conclavi existentium.

Sexta, contra Cardinales simoniam committentes in electione Papæ.

Septima, contra Cardinales non servantes formam electionis, & alia quæ ipsis in Greg. XV. constitutione iniunguntur; de his singulis gradatim, & singillatim agere decreui.

Q V Æ S T I O I.

De pœna excommunicationis contra facientes sponfiones, seu excommiffas super vita, morte, & futura electione Pontificis, aut super promotionibus Cardinalium.

S V M M A R I V M.

- 1 Refertur textus in quo ista excommunicatio continetur.
- 2 Assignatur materia istius excommunicationis.
- 3 Sponfo, vel quilibet alius contractus super morte, vel futura electione Summi Pontificis, aut super promotione alicuius Cardinalis, punitur pœna excommunicationis.
- 4 Sponfionem fieri permittens in suis terris super vita, morte, vel electione Pontificis, aut promotione Cardinalis punitur pœna excommunicationis.
- 5 Idem dic de consulente, auxiliante, aut consensum præstante.
- 6 Paritas materie videtur ab hac censura excusare.
- 7 Enumerantur pœnæ, quæ huic excommunicationi subiiciuntur.
- 8 Absolutio istius excommunicationis reservata est.
- 9 Absolutio an valet si non dum facta restitutione.

Quatuor principaliter in hac quæstione explicabo, primò vtrum facientes præfatas sponfiones excommunicationi subijcian-
tur; Secundò quænam sit materia istius excommunicationis; Tertiò, quòdnam sit subiectum; Quartò, quæ eius absolutionem conferre possit.

P R I M A P R O P O S I T I O.

Faciens sponfionem, seu excommiffam super vita, morte, aut electione Papæ, aut super promotione Cardinalium, excommunicationem ipso facto incurrit, & alijs pœnis afficitur. Ratio est, quia Gregor. XIV. vt occurreret incòmodis, quæ ex prædictis sponfionibus facilè sequi potuissent in Bulla *cogit nos deprauata*, irritat omnes promissiones, etiam iuramento vallatas, efficit promittentes inhabiles ad acquirendum pecuniarum dominium, etiamsi solutæ, aut datæ,

dati, seu remissæ, aut condonatæ fuerint, sed ad eas locis pijs illius ciuitatis, in qua sponfiones factæ fuerunt, vel potius vbi primum detectæ fuerunt, restituendas obligat, etiam in foro conscientia ante sententiam Iudicis: nam Summus Pontifex statuit huiusmodi pecunias præfatis locis acquiri, & cōtrahentes ad restitutionem, seu clarigationem ijsdem pijs locis in vtroque Foro teneri, an autem hæc Bulla fuerit cum tanto rigore in hac parte vsu recepta, quisque potest proximè consulere.

Præterea idem Gregorius Ecclesiasticas personas huius criminis reas, priuat omnibus dignitatibus, beneficijs, & officijs, ac ad illa inhabiles reddit. Denique contra omnes delinquentes excommunicationem ipso facto imponit, cuius absolutionem Summo Pontifici pro tempore existenti reseruat, excepto mortis articulo cum præuia restitutione pecuniarum, occasione huiusmodi sponfionum perceptarum. Hæc est summaria compilatio eorum quæ in præfata Gregorij XIV. Bulla continentur.

SECUNDA PROPOSITIO.

2 **M**ateria istius excommunicationis est, triplex actio in hac Bulla expressa.

3 Prima actio est sponfio, seu promissio, conuentio, pactum, seu contractus nominatus, vel innominatus, super vita, morte, futura electione Summi Pontificis, tam eo viuente, quàm Sede vacante; aut super promotione Cardinalis. Ista actio perspicuè exprimitur in illis verbis, *Pij Papæ IV. prædecessoris nostri, qui pariter hæc ipsum super futura Pontificis electione fieri prohibuit vestigijs inherentes, de tributa à Domino potestatis Apostolica plenitudine, hac nostra in perpetuum valitura constitutione, damnamus, & reprobamus, omnes, & quæcumque sponfiones, promissiones, stipulationes, conuentiones, aut pacta, excommiffas vulgò dictas, quouis nomine, aut vocabulo appellatas, Quas siue per cedulas, vt aiunt, vel apochas, aut alio quocumque publica, aut priuata Scriptura, aut chirographi genere, vel per Mensariorum, aut Mercatorum libros, aut pri-*
titas,

ritas, ut dicunt, seu verbo tantum data fide, aut factō deposito certa pecuniarum summa, vel & cuiusvis alterius rei pretio aestimabilis, aut aliā quoquo modo, vel sub quavis nominati, aut innominati contractus forma, aut conditione in euentum vitæ, aut mortis, vel futura creationis Romani Pontificis, tam eo viuente, quàm Apostolica Sede vacante, aut in euentum promotionum S. R. E. Cardinalium, post hac in quibusvis Christiani orbis Regnis, Dominijs, Prouincijs, Cimitatibus, Terris, & locis vbilibet gentium, aut locorum iniri quādocumque contigerit.

4 Secunda actio est permissio dictarum sponsonum respectu personarum publicæ auctoritate fungentium, quæ prædictas sponsones tacitè, vel expressè in locis sibi subiectis fieri permittunt. Idem militat in Consiliarijs, Magistratibus, Potestatibus, Gubernatoribus, Præfectis, aut Locum-tenentibus, prædictarum personarum publicarum, ut patet ex illis verbis, *Vt etiam in eos, qui talia patrare, & huic nostræ constitutioni contrāuenire præsumperint, tam si prædictis, quæ hic pro expressis habeantur, quàm si quibusvis mundanis etiam Ducalibus, Regijs, Imperialibus dignitatibus fungantur, ac etiam in eosdem, vel alios, qui id in terris, vel locis, Cimitatibus, ac Dominijs sibi subiectis, tacitè, vel expressè fieri permiserint, eorūque Consiliarios, Magistratus, Potestates, Gubernatores, Præfectos, aut Locum-tenentes.*

Tertia actio est auxilium, consilium, fauorem, aut consensum in præmissis præstare, aut proxenetam, vel mediatorem esse, nam in Bulla dicitur, *eorūque singulos qui pariter consensum, auxilium, consilium, vel fauorem in præmissis præstiterint, ac in quoscumque proxenetas, vel mediatores excommunicationis sententiam, per easdem præsentis ferimus, & promulgamus, eosque ipso factō absque aliqua monitione, aut declaratione, seu Iudicis decreto, aut ministerio excommunicationis sententiam incurrere volumus, à quā eorum nullus ab alio, quàm à Romano Pontifice pro tempore existente, nisi in mortis articulo, & quoad eos, qui pecunias, vel aliud quidp am præmissorum occasione perceperint, etiam præuare restitutione integra pecuniarum eiusmodi occasione perceptarum, absolui possit, aut debeat.*

An autem ob huiusmodi actiones hoc tertio loco expressas statim

Q incur-

incurratur excommunicatio, ante secutas sponfiones, &c. patet, ex sæpiùs alibi dictis non incurri, quia sunt accessoriæ. Idem dicendum censet, de secunda actione, seu potius omissione, quæ cõsistit in permissione huiusmodi sponfionum, huiusmodi enim omisso contingit, dum non impeditur actio, quæ alioqui impedienda fuisset.

6 An autem paruitas materiæ ab hac censura excuset, patet ex regulis generalibus excusare, vt etiam in simili docui, de datis, vel promissis, pro gratia, vel iustitia in Romana Curia obtinenda.

TERTIA PROPOSITIO.

7 **S**ubiectum istius excommunicationis sunt omnes, & singuli contra præfatam Bullam delinquentes; dispositio enim generalissima est, vt apertè constat ex verbis textus in secunda propositione relatis. Nonnullæ difficultates circa pœnas, quæ in hac Bulla ponuntur hic explicari possent. Verùm quia textus satis clarus est, & huiusmodi difficultatum solutio faciliè colligitur ex regulis generalibus traditis *de censuris in genere, de legibus, & de alijs censuris in particulari*. Diutius hic non insistam.

QUARTA PROPOSITIO.

8 **A**bsolutio istius excommunicationis referuata est Summo Pontifici excepto mortis articulo, in quo absolutio impendi potest, si pœnitens pecuniam occasione sponfionis receptam restituit; nam in præcitata Gregorij Bulla dicitur, *Aqua eorum nullus ab alio, quàm à Romano Pontifice pro tempore existente, nisi in mortis articulo, & quoad eos qui pecuniam, vel aliud quidpiam præmissorum occasione perceperint, etiam prævia restitutione integra pecuniarum, eiusmodi occasione perceptarum, absolui possit, aut debeat.*

9 Sed modò dubium suboritur, vtrum is, qui pecuniam occasione sponfionum accepit, validè absoluator in articulo mortis, aut ab habente priuilegio absoluendi, etiam si nondum restituit ea, quæ causa spon-

sponsionum accepit. Respondendum mihi videtur validè absolui posse, modò pœnitens intentionem habeat restituendi quamprimum commodè poterit. Ratio est, tum quia non irritatur absolutio aliter impenfa; tum quia ablatius ille absolutus (*etiam prævia restitutione integra pecuniarum huiusmodi occasione perceptarum*) non importat conditionem necessariam, sed præceptum quo admonetur Confessarius de eo, quod curare tenetur, vide quæ tradidi *de censuris in genere*, disp. 1. q. 3. puncto 2. cum Sanchez, Auila, & alijs.

Q V Æ S T I O I I.

De pœna excommunicationis contra ambientes Papatum, aut tractantes de electione Pontificis, ipso adhuc viuento.

S V M M A R I V M.

- 1 Refertur textus in quo ista excommunicatio continetur.
- 2 Assignatur materia istius excommunicationis.
- 3 Ambiens, seu procurans Papatum incurrit excommunicationem, etiam si id faciat viuento Summo Pontifice.
- 4 Quid sit ambire, & vtrum ambiens post mortem Summi Pontificis ligetur excommunicatione, saltem si per simoniam procuret.
- 5 Electionem Summi Pontificis attentans ipso viuento, seu inconsulto excommunicationem incurrit.
- 6 Summi Pontificis electionem consulens, non incurrit excommunicationem.
- 7 Assignatur subiectum istius excommunicationis.

Explicandum est primò, vtrum ista pœna edita sit contra ambientes Papatum; secundò, quænam sit istius excommunicationis materia; tertio, quoddam sit subiectum; quarto, vtrum absolutio istius excommunicationis Summo Pontifici reseruata sit.

PRIMA PROPOSITIO.

1 **C**ontra ambientes Papatum, aut tractantes de electione futuro Pontificis, viuentē adhuc Pontifice, eoque inconsulto, lata est excommunicatio ipso facto; cū enim ille qui absque consensu Principis, tractat de successore illius deligendo, reus sit criminis læsæ Maiestatis, ex Baldo. in l. quoniam liberi, C. de testibus, iure merito Paulus IV. in Bulla 16. in ordine quæ incipit, *cū secundum Apostolum*, ad euitandum periculum captandæ mortis Summi Pontificis, & alia incommoda primo loco confirmat censuras, & pœnas quomodolibet latas, contra eos, qui Papatum ambiunt, & simoniam ea occasione committunt. Deinde tractantes de eligendo futuro Pontifice, inconsulto Pontifice viuentē, non solum excommunicat, verum etiam priuat omnibus dignitatibus, officijs, fructibus, voce actiua, passua, inhabilesque ad ea omnia reddit, & infamiae notam iniungit. Rursus easdem censuras, & pœnas extendit ad eos omnes qui consilium, auxilium, opem, vel fauorem præstant, aut alio quouis modo se immiscent, nisi hoc quamprimum poterunt per se commodè, vel per alium reuelarint. Denique contra impugnantes hanc Bullam, excommunicationem ipso facto imponit, & contra ipsos tanquam Schismaticos, & Hæreticos inquiri mandat; hæc omnia prolixius exprimuntur in præcitata Pauli IV. Bulla.

SECUNDA PROPOSITIO.

2 **M**ateria istius excommunicationis sunt actiones in hac Bulla expressæ.

3 Prima actio est, ambire, seu procurare Papatum, præsertim si hac occasione, & eius causa simonia committatur; nam Paulus IV. confirmat censuras, & pœnas à Pontificibus, & Concilijs impositas contra ambientes hoc pacto Papatum. Vna autem ex pœnis est excommunicatio, vt patet ex tertia Bulla Iulij II. quæ incipit, *Cū tam diuino, quàm humano iure*, vt explicauī de censuris in particulari, q. 7. punct. 1.

Hinc sequitur eum, qui Papa viuentē procurat, vel quodammodo
sub-

subharrat suffragia Cardinalium, vt in futurum Papam eligatur, affici hac excommunicatione, quia dicitur ambire Papatum.

4 Sed modò dubium est primò, quid sit ambire Papatum. Respondeo idem esse, quod inordinata cupiditate Papatum quærere: ambitio enim ex S. Thom. 2. 2. *quest.* 131 *art.* 1. & alijs DD. communiter est inordinata cupiditas honoris, & dignitatis, tunc autem cupiditas inordinata est, dum quæritur dignitas medijs illicitis, seu prohibitis, vt in nostro casu, in quo vetitum est procurare Papatum viuente Pontifice, ob periculum captandæ illius mortis; dicitur autem ambitus ab ambiendo, id est circumeundo, eo quod ambiens dignitatem, nunc istum, nunc illum adeat, vt dignitatem consequatur, & hoc dicitur crimen adfectati honoris, vetitum *in l. Iulia*, ambitus à Caio Cesare Octauiano, teste Sucton.

5 Secundò dubium est, vtrum excommunicatio incurratur, tam ab eo qui Papatum ambit viuente Pontifice, quàm eo mortuo. Respondeo ambientem Papatum viuente Pontifice affici excommunicatione Pauli IV. ambientem verò post mortem Pontificis ligari excommunicatione Iulij II. si Papatum ambiat, seu procurer per simoniam: nam Iulius II. *in Bulla* 3. quæ incipit, *Cum tam diuino*, excommunicationem tulit contra Cardinales, qui Sede vacante simoniacè eligunt, dando, promittendo, vel recipiendo: eadem Bulla recepta fuit in Concilio Lateranensi *sess.* 5. sub Leone X. cum excommunicatione contra simoniacè procurantes post mortem vnus Pontificis eligi in futurum Pontificem; vide Concilium Lateranense citatum supra *quest.* 2. *S. vnico*.

6 Tertiò dubium est, vtrum exoptans Papatum grauiter peccet. Respondeo negatiuè per se loquendo, etiamsi appetat ob eximiam gradus dignitatem, & ob bona temporalia. Ratio est, tum quia ad hoc facit illud tritum sermone prouerbiū ex Apostolo desumptū, *qui Episcopatum desiderat, bonum opus desiderat*; tum quia licitum est expetere, quod licitum est recipere, cum non magis peccaminosa sit intentio, quàm ipsum opus intentum, sed licitum est Papatum recipere;

pere; ergo etiam licitum est expetere; tum quia sequeretur infinitos Clericos, & Ecclesiasticos expetentes Ecclesiasticas dignitates, in statu damnationis persistere, quod arduum, & durum videtur.

Idem dicendum est de eo, qui Papatum procurat, modò actionem aliquam, in hac Bulla, vel in alijs constitutionibus, de quibus *suprà* *quest.* 3. & *infra* in hoc *puncto* prohibitam non exerceat.

Dixi *per se loquendo*, quia per accidens ratione alicuius circumstantiæ mortaliter peccaminosa culpa grauis incurri potest: actus enim malitiam sumit, non solum ab obiecto, & sine proximo, verum etiam à remoto, & à circumstantijs, vt docui *de peccatis*. vide S. Thom. 2. 2. *quest.* 185. Valentiam 2. 2. *quest.* 185. *art.* 1. *puncto* 2. *concl.* 3. Nauarr. *Miscellan.* 37. & 38. Platum *de Cardinal. dignit. cap.* 28. Scortiam *in selectas constit. Theorem.* 178. & alios, quos in simili retuli *de beneficijs*.

Hinc sequitur primò, eum qui Papatum appetit, vt consanguineos modo licito locupletare possit, non esse reum lethalis culpæ.

Secundò eum, qui se Pontificatu indignum nouit, grauiter peccare Papatum appetendo, sicut enim hic Papatum licitè recipere nō potest, ita neque appetere, nisi fortè appetat sub cōditione si dignus esset; actus enim desiderij, qui aliàs turpis esset, licitus efficitur, addita conditione, qua posita turpitudine ab actu aufertur, vt probaui *de matrimonio*, & *de peccatis*.

7 Maior difficultas est, vtrum is qui se dignum credit, sed nonnullos alios digniores animaduertit, grauiter peccet optando se dignioribus præferri. Respondeo affirmatiuè iuxta probabiliorem sententiam. Ratio est, quia sicut Electores tenentur digniorem cæteris paribus eligere, & præferre, vt benè Nauarr. *Miscellan.* 38. & Platus *cap.* 31. ita alter optare non potest se dignioribus præferri, quoties certò nouit illos esse digniores; si verò certè non nouit, optare potest se alijs præferri, si Cardinalibus visus fuerit dignus, qui cæteris præferatur; tunc enim grauis peccati reus non est, cū alieno iudicio se submittat, vt patet ex dictis *de beneficijs*, dum loquerer de illo, qui ad concursum beneficij accedit, animaduertens alios esse digniores,

& de

& de contrahibus disp. 1. quest. 1. punct. 1. num. 13.

Dices si hoc verum esset, sequeretur multos Pontifices lethalis culpæ reos esse, dum Pontificiam dignitatem acceptant, animaduer-
tentes alios digniores prætermitti seque dignioribus præferri. Res-
pondeo Pontifices posse in tali euentu conuiuiscere, seque eligen-
tium conscientie remittere, & accommodare, cum fieri possit, vt
suo iudicio decipiatur, nec in propria causa iudex quis esse valeat,
& hæc de prima actione.

8 Secunda actio est, tractare, vel tentare de electione futuri Pon-
tificis, viuentis adhuc & inconsulto Papa, & hoc verum est, siue fiat
per se, siue per alium, siue fiat verbis, siue scriptis, siue nuncijs; in
textu enim dicitur, *qui per se, vel alios, nobis viuentibus, & inconsultis*
verbis, aut scriptis, aut nuncijs cum aliquo de futuro Pontifice eligendo ha-
tetenus tractarunt, vel tentarunt, seu in posterum Romano Pontifice viuen-
te, & inconsulto tractabunt, vel tentabunt, vide Bald. in l. quoniam liberi,
C. de testibus. Azorium 2. parte lib. 4. cap. 2. quest. 15. Scortiam in se-
lectas constit. theoremat. 180.

Hinc sequitur primò, eos affici excommunicatione, qui conuen-
tulas faciunt, seu ex animo tractant, quo pacto se gerere debeant,
vt talis in Papam eligatur, seu quam rationem inire debeant, vt Car-
dinales ad istum eligendum inducantur, postquam hic, qui modo vi-
uit, è viuis decesserit, isti enim dicuntur tractare de futuro Pontifice
eligendo, & rei sunt criminis læsæ Maiestatis, ex Bald. loco citato; idē
dic de eo, qui curat sibi fidem dari, seu promitti, quòd talem eliger.
An autem hoc etiam vetitum sit in Bulla Greg. XV. constat ex supra-
dictis quest. 1.

- Secundò eum non affici excommunicatione qui interrogatur, vel
interrogat quisnam futurus sit successor huius Pontificis; hoc enim
non est tractare de futuro Pontifice eligendo, sed speculatiuè, & per
coniecturas loqui.

Tertiò eum vinculo huius censuræ non obstringi, qui affirmat ta-
lem Cardinalem ex cultum, & ornatum esse ijs qualitatibus, quæ Pon-
tifici

tifici inesse debent, hoc enim non est agere de futuri Pontificis electione, sed de ijs qui digni sunt, & eligi possunt; illud enim ad praxim pertinet, hoc ad speculationem, seu simplicem narrationem.

9 Tertia actio est auxilium, consilium, operam, fauorem, promissionem verbis, vel scriptis, re, vel facto, aut alio quouis modo directè, vel indirectè, principaliter, vel incidenter præstare, complices esse, seu quauis ratione se immiscere circa electionem futuri Pontificis Papa adhuc viuentis, & inconsulto; nisi fortè id, quamprimum commodè poterunt, reuelauerint Papæ pro tempore existenti, aut alteri ad hoc deputato; ista actio pluribus verbis exprimitur in præcitata Bulla, ibi, *Quòdque similes sententias censuras, & pœnas respectiue incurrerint, & incurrant ipso iure, & facto, ac sine alicuius sententia prolatione, omnes & singuli etiam, vt præmittatur qualificati, & dignitatibus huiusmodi præditi, cuiusvis sexus, & ordinis existant, qui per se, vel alium, seu alios à die nostra ad Summi Apostolatus apicem assumptionis, vsque in hanc diem in præmissis, aut eorum aliquo quoduis auxilium, consilium, vel fauorem, seu operam, verbis, vel scriptis, aut re, vel facto, seu promissione, pollicitatione, suasionem, vel his omnibus insimul, aut quouis alio modo, directè, vel indirectè, principaliter, vel incidentaliter præstiterint, seu in futurum quoties etiam successorum nostrorum Romanorum Pontificum tempore præstabunt, aut in præmissis mediatores, proxenetae, Nuncij, Mandatarij, Procuratores, seu Trapezite fuerunt, vel in posterum, vt præfertur: erunt seu aliàs se in præmissis quouis modo intromiserint, vel immiscuerint, seu in posterum, etiam tempore successorum huiusmodi habebunt, nisi ea nobis, aut successoribus nostris quorum tempore id continget, vel alteri cui id per nos, vel successores prædictos commissum fuerit, per se, vel alium, seu alios quamprimum commodè potuerint, reuelarint, etiam si in præmissis aliquod aliud auxilium, consilium, vel fauorem, &c.*

10 Sed modò dubium est primò, vtrum qui alteri consilium dat, vt agat de electione Summi Pontificis, statum in excommunicationem incidat. Respondeo negatiuè, quia hæc est actio accessoria, vt patet ex illis verbis, *in præmissis, aut eorum aliquo quouis auxilium, consilium,*
vel

vel fauorem, &c. ob actionem autem accessoriam non incurritur excommunicatio nondum posita actione principaliter prohibita.

Addo neque in excommunicationem incidere, statim ac secuta est actio principalis, sed quando commodè potuit admonere Pontificem, vel alium ad hoc deputatum, & non admonuit, censura enim non est imposita absolute, ob actiones accessorias, sed sub hac conditione, nisi hoc reuelauerint, cum primum commodè potuerint, vide quæ in simili dixi *de excommunicatione*, que ob duellum contrahitur *puncto 50. disp. 2. quest. 2. de censuris in particulari.*

II Quarta actio est, impugnare istam constitutionem dicendo esse iniustam, inualidam in totum, vel in partem, sic enim in dicta Bulla decernitur, §. 5.

T E R T I A P R O P O S I T I O.

12 **S**ubiectum istius excommunicationis sunt omnes, & singuli tam masculi, quàm foeminae, tam Laici, quàm Ecclesiastici, etiam si Regia, vel Imperiali dignitate fulgeant, nam Paulus IV. hos omnes apertissimis verbis exprimit, & comprehendit in §. 2. *vers. Nec non quoscumque, &c.*

An autem præfati delinquentes alias poenas in eadem Bulla sanctitas statim incurrant, constat ex dictis *de legibus*, ubi regulas generales tradidi.

Q U A R T A P R O P O S I T I O.

Absolutio istius excommunicationis Summo Pontifici reservata est; nam Paulus in præcitata Bulla, sic ait, & ab excommunicatione, & maledictione huiusmodi, per alium, quàm per nos, & Romanum Pontificem pro tempore existentem, praterquam in mortis articulo, absolui non possint.

Q V Æ S T I O III.

De excommunicatione contra Dominos temporales, & Officiales
Ciuitatis in qua electio Summi Pontificis facienda est.

S V M M A R I V M.

- 1 *Domini temporales non seruantes præscripta Sede Apostolica vacante ligantur excommunicatione.*
- 2 *Enumerantur ea quæ seruanda sunt à Dominis temporalibus Sede vacante.*
- 3 *Assignatur materia istius excommunicationis.*
- 4 *Assignatur subiectum eiusdem.*
- 5 *Absolutio istius excommunicationis non est reseruata.*

Quatuor in hac quæstione explicabo; primò, an præfati Domini, & Officiales sint ipso facto excommunicati; secundò, quænam sit materia illius excommunicationis; tertio, quòdnam sit subiectum seu quinquam Domini, & Officiales huic censuræ subijciantur; quartò, an absolutio istius excommunicationis Summo Pontifici reseruata sit.

P R I M A P R O P O S I T I O.

I Domini temporales, & alij Rectores, & Officiales Ciuitatis, in qua electio Summi Pontificis facienda est, ligantur excommunicatione, si obseruari non faciant ea, quæ præscribuntur in cap. vbi periculum, de electione, nam in præfato capite statuitur, vt Domini, & Officiales illius Ciuitatis in qua mortuus est Summus Pontifex, & in qua electio noui Pontificis facienda est, præstent iuramentum personaliter coram Clero, & populo Ciuitatis, quo iurent se obseruaturos, & obseruari facturos ea, quæ in præcitato textu habentur, etsi ea non obseruauerint, cuiuscumque sint status, & conditionis, omni cessante priuilegio, excommunicationem ipso facto incurrant; sint perpetuò infames, inhabiles ad dignitates, & officia, feudis,

feudis, & bonis Ecclesiasticis priuati, & Ciuitas sit interdicta, & priuata Episcopo.

2 Quæres quænam in præfato cap. contineantur, quorum obseruantiam Domini temporales procurare debent.

Respondeo plura contineri, Primò, vt Electio post decem dies ab obitu Pontificis celebretur in Ciuitate, in qua Pontifex cum sua Curia residebat; si verò periit extra Ciuitatem, in qua cum sua Curia non residebat, electio fiat in Ciuitate in cuius territorio Pontifex ex hac vita migravit, nisi fortè ea Ciuitas interdicta sit, aut rebellis contra Romanam Ecclesiam; tunc enim electio facienda est in alia proximiori Ciuitate, quæ huiusmodi vitio non sit infecta.

Secundò, vt nullus ad Cardinales in Conclau existentes accedat, exceptis seruiantibus, nec ipsos secretò alloquatur, vel nuncium mittat, vt ex dicendis *quest. proximè sequenti*, constabit.

Tertiò, vt si Cardinales intra tres dies postquam Cōclau ingressi fuerunt Pontificem nō elegerint, vnicū ferculum tam in prandio, quàm in cœna quinque dierum spatio recipiant, quibus diebus elapsis, si electio secuta non fuerit, panis solum, vinum, & aqua tribuatur donec electionem perfecerint.

Existimo tamen Cardinales non teneri sub mortali hanc regulam de abstinentia à cibis obseruare, quia Pontifex non vtitur forma loquendi præceptiua sub mortali; ait enim *vnico ferculo sint contenti, & infra, ex tunc tantummodo panis, vinum, & aqua ministretur eisdem, donec eadem promissio subsquatur*: Ergo si aliquid aliud ipsis ministretur, vesci possunt, quia vetitum est potius ministrare, quàm recipere, & frui.

Quartò, vt Cardinalis superueniens post ingressum aliorum in Conclau, & nondum facta electione, admittatur in eodem negotio, in illo statu, in quo ipsum inuenerit, vide præcitatum textum, *S. hoc sacro*.

S E C U N D A P R O P O S I T I O .

3 **M**ateria istius excommunicationis consistit primò in omissione, seu negligentia ad faciendum obseruari ea, quæ in præfato capite circa Summi Pontificis creationem præscribuntur; verum tamen est non sufficere quamlibet negligentiam, sed requiri grauem, & sufficiètem ad mortale peccatum, excommunicatio enim non incurritur, nisi ob mortale peccatum.

Secundò, in commissione fraudis in ijs, vel circa quæ in prædicto capite circa præfatam creationem decernuntur. Hæc propositio, patet ex illis verbis, *Quod si præmissa non diligenter obseruarint, aut si fraudem in eis, vel circa ea commiserint, cuiuscumque sint præminentia, conditionis, aut status, omniceffante priuilegio, eo ipso sententiam excommunicationis incurrant, & perpetuò sint infames.*

T E R T I A P R O P O S I T I O .

4 **S**ubiectum istius excommunicationis, sunt omnes Domini, alijsque Rectores, & Officiales illius loci, in quo Summi Pontificis electio facienda est, delinquentes contra istam constitutionem, ut patet, tum ex præcitatis verbis, *Cuiuscumque sint præminentia, &c.* tum ex illis, *Domini, atque Rectores, & Officiales Ciuitatis illius.*

Hinc sequitur non solum Laicos, verum etiam Ecclesiasticos contra istam constitutionem delinquentes affici excommunicatione huius capitis, quia textus generaliter loquitur de Dominis, Rectoribus, & Officialibus illius Ciuitatis, in qua Romani Pontificis facienda est electio, cuiuscumque sint præminentia conditionis, aut status.

Q U A R T A P R O P O S I T I O .

5 **A**bsolutio istius excommunicationis Summo Pontifici reseruata non est, quia in præfato textu nullum adest verbum, quod reseruationem significet; an autem interdictum locale positum

tum contra Ciuitatem, prædictorum Dominorum auferri possit à Confessario, vel Episcopo, constat ex regulis generalibus traditis de censuris in genere, vbi negatiuè responsum fuit.

Q V Æ S T I O I V.

De excommunicatione contra eos, qui Cardinalibus in Conclau
existentibus, litteras, vel nuncium mittunt, vel se-
cretò loquuntur.

S V M M A R I V M.

- 1 Refertur textus in quò ista excommunicatio continetur.
- 2 Assignatur materia istius excommunicationis.
- 3 Litteras mittens Cardinali in Conclau existenti, non ligatur excommuni-
catione, si litteræ ad Cardinalem non perueniunt.
- 4 Litteras Cardinali in Conclau existenti mittens ligatur excommunica-
tione, siue secretè, siue publicè mittat.
- 5 Assignatur subiectum istius excommunicationis.
- 6 Cardinales in Conclau existentes non ligantur excommunicatione, secre-
tè inter se loquendo, aut nuncium, & litteras ad se mittendo.
- 7 Cardinales recipientes nuncium, vel litteras, vel loquentes, cum secretò
loquentibus grauiter peccant, sed non ligantur excommunicatione.
- 8 Cardinalium famulus in Conclau existentium alloquens, non ligatur
excommunicatione.
- 9 Recipiens litteras in Conclau missas, quandoquàm ligetur excommuni-
catione.
- 10 Mittens Scripturam in Conclau ligatur excommunicatione, etiamsi
Scriptura non agat de Summi Pontificis electione.
- 11 Scripturam mittens in Conclau, ligatur excommunicatione, etiamsi
ea Scriptura aliquid, aliud innuat, aut credat fore, vt non legatur.
- 12 Litteras, seu scripta deferens in Conclau non ligatur excommunicatione.

- 13 *Scripturam breuem, seu modicum chirographum mittens in Conclauē, ligatur excommunicatione.*
 14 *Absolutio istius censuræ, an reservata sit.*

Explicandum est primò, an præfati excommunicatione ligentur; secundò, quænam sit istius excommunicationis materia; tertio, quoddam sit subiectum; quartò, vtrum absolutio Summo Pontifici reservata sit.

PRIMA PROPOSITIO.

1 **M**ittens litteras, vel nuncium Cardinali in Conclauē existenti, aut ipsum secretò alloquens excommunicationis pœnam incurrit; hæc propositio, patet ex capite *vbi periculum de elect.* ibi, *nul- li etiam fas sit ipsis Cardinalibus, vel eorum alicui nunciū mittere, vel scri- pturam, qui verò contrà fecerit, scripturam mittendo, vel nuncium, aut cum aliquo ipsorum secretò loquendo, ipso facto sententiam excommunicationis in- currat.*

SECUNDA PROPOSITIO.

Materia istius excommunicationis, sunt tres actiones, quas Sum- mus Pontifex interdixit ne electio Papæ impediatur, aut per- turbetur.

Prima actio est mittere nuncium Cardinalibus in Conclauē exi- stentibus, secunda, mittere scripturam, tertia secretò loqui.

2 Sed modò dubium est, primò, vtrum ad incurrendum istam excommunicationem, satis sit mittere scripturam, vel nuncium, qui non perueniat ad eum ad quem mittebatur, vt quia nuncius in Con- clauē, vel ad eius fenestellam non fuit admissus, aut quia fuit alia ratione impeditus ne fungeretur munere, cuius causa mitteba- tur.

Respon-

Respondeo ex vi præfati textus, opus esse ut perueniat ad eum ad quem mittebatur. Ratio est, tum quia verba cum effectu intelligenda sunt, l. 1. *S. hæc verba, ff. quod quisque iuris, l. quoties, ff. qui satisd. cog. & cap. si à iudice de appellat. lib. 6.* tum quia sicut Religiosus scribens litteras Monialibus non incurrit excommunicationem editam contra quosdam religiosos scribentes Monialibus litteras si litteræ ad Moniales non perueniunt, ut docui in *tratt. de clausura*, dum loquerer de excommunicationibus, quæ ob violationem Clausuræ contrahuntur, ita, &c.

Ex quo sequitur eum non affici excommunicatione præfati capituli, qui litteras alicui Cardinali scripsit, sed illæ ad Cardinalem non peruenerunt, etiam si fortè is, qui eas interceptit, eidem Cardinali significauerit, quid in ipsis contineatur.

Ratio est, quia effectus ex parte mittentis non est consumatus, hoc tamen intelligitur, modò is, qui eas interceptit, non significet contenta in litteris de mandato illius qui litteras miserat; is enim munere nuncij fungeretur.

3 Secundò dubium est, vtrum ad istam excommunicationem incurrendam necesse sit, ut nuncius, vel scriptura secretò mittatur. Respondeo duplicem esse DD. sententiam.

Prima sustinet opus esse, ut nuncius, vel scriptura secretò mittatur. Ratio est, tum quia ad incurrendam istam excommunicationem, ob locutionem non satis est publicè loqui (in textu enim dicitur *secretò loquendo*;) ergo neque satis est publicè mittere scripturam, vel nuncium. Hæc consequentia probatur, quia quando in aliquo statuto multa prohibita recensentur, & ultimo prohibito, adiungitur qualitas aliqua restrictiua, illa qualitas restrictiua refertur ad omnia priùs enumerata, sed locutionis, quæ ultimo loco in præfato textu prohibetur, additur qualitas restrictiua, ut secretò fiat. Ergo eadem qualitas refertur ad actiones priùs interdictas, id est ad missionem nuncij, & scripturæ, tum quia in materia pœnali strictior interpretatio facienda est, quantum patitur contextus verborum; contextus autem

autem verborum patitur, vt illa particula *secretò*, referatur ad omnia antecedentia, ita Syluester *verbo excom.* 9. S. 11. num. 34. Angelus *verbo excom.* 7. *casu* 13. Tabiena *excom.* 5. *casu* 16. Geminian. Ioannes Andreas, & Archid. *in cap. vbi periculum citato*.

Secunda sententia, quæ mihi vera videtur, asserit ad incurrendum præfatam excommunicationem non requiri, vt scriptura, vel nuncius *secretò* mittatur. Ratio est, quia omissio Scripturæ, vel nuncij absolute prohibetur, & illa particula *secretò* additur tantummodo locutioni, vt patet consideranti verba textus, ita Caiet. *verbo excom.* cap. 55. Nauarr. *cap.* 27. n. 121. S. 11. Suarez *de censuris disp.* 23. *sect.* 4. num. 1. Sayrus *lib.* 3. *cap.* 35. num. 3. Filliucius *tract.* 14. *cap.* 4. *questio* 2. num. 54 S. Antoninus Paludanus, Martinus Ledesma, & alij.

4 Ex nostra ratione, patet responsio ad argumenta primæ sententiæ, prædictis addendum est, quod licet prima sententia alicui probabilis fortè videri possit, ex vi præcitati, cap nihilominus ex dispositione Pij IV. mittens nuncium, aut litteras, aut cuiusvis generis scripta, ligatur excommunicatione, siue *secretò* mittat, siue publicè, vt ad finem huius quæst. explicabo.

T E R T I A P R O P O S I T I O .

5 **S**ubiectum istius excommunicationis sunt illi, qui nuncium, vel scripturam mittunt, aut *secretò* loquuntur, cum Cardinalibus in Conclauis existentibus, vt constat ex præcitato textu. Hoc tamen intelligitur, & limitatur, nisi id fiat de consensu omnium Cardinalium in Conclauis existentium, circa ea quæ pertinent ad electionem tunc instantem. Ratio istius limitationis est, quia in præcitato textu facultas datur Cardinalibus, vt possint aliquem de consensu omnium Cardinalium, ibi præsentium admittere pro ijs, quæ ad electionis instantis negotium pertinent, vt si vocarent Iurisperitum, Tabellionem, vel Religiosum causa electionis, ita Glossa *in cap. vbi periculum*, S. *vocarentur*. Sayrus *lococitato*, num. 2.

Ex

Ex dictis sequitur, primò eum, qui scripturam deferret non affici excommunicatione huius textus, modò ipse non loquatur secretò; aliud enim est deferre, aliud mittere, & à diuersis præsertim in materia pænali, non valet illatio, *l. Papinianus exuli, ff. de minoribus, l. inter copulantem, S. sacram. ff. de verborum oblig. & l. naturalem, S. nihilominus, ff. de acquir. poss.*

Secundò, Episcopos, Prælatos, aliosve cuiuscumque conditionis, & status affici excommunicatione præcitati capitis mittendo publicè, vel secretò nuncium, vel scripturam, aut secretò loquendo, quia verba textus generalia sunt.

6 Sed modò dubium est, primò vtrum ipsimet Cardinales in Conclavi existentes afficiantur ista excommunicatione secretè inter se loquendo, aut famulum, vel scripturam mittendo. Respondeo negatiuè, quia textus intelligitur de illis, qui extra Conclauem existunt, vt colligitur ex præcedentibus verbis, ibi *nulli ad eosdem Cardinales, aditus pateat*, ita Caiet. Filliucius, Sayrus, & Suarez locis citatis.

7 Secundò dubium est, vtrum ipsimet Cardinales recipientes nuncium, aut litteras, aut colloquentes cum secretò loquentibus grauiter peccent, & afficiantur pœna excommunicationis præfati capitis.

Respondeo, grauiter peccare quoties aduertunt eum, qui secretò loquitur, aut qui nuncium, vel litteras misit, non habuisse iustam, & sufficientem causam ad hæc præstanda. Ratio est, quia qui delicto alterius cooperatur peccat pro qualitate delicti cui cooperatur, vt patet ex regulis generalibus traditis *de peccatis*; non tamen incurrunt excommunicationem in præfato cap. contentam; quia ea lata est in mittentes, nuncium, vel scripturam Cardinalibus, aut cum eis secretò loquentes, non verò in ipsos Cardinales recipientes nunciū, vel scripturam, vel secretò colloquentes, quantum est ex vi huius textus præcisè; incurrunt tamen aliam Pij IV. recipiendo nuncium, vel scripturam, de qua statim differam.

Dices, participant in crimine criminoso ob quod lata est excommunicatio, participans autem in crimine criminoso incurrit eandem

S excom-

excommunicationem, *cap. nuper de sent. excommun.* Respondeo iuxta alibi dicta ob participationem in crimine criminoso non incurri excommunicationem à participante, nisi is, cum quo participat, iam contraxerit excommunicationem, & sit excommunicatus vitandus, vt ostendi in tractatu *de censuris in particulari in explicatione, cap. nuper de sent. excommunicationis*; nam post extrauagantem *Ad euitanda*, licitum est participare cum excommunicato tolerato.

8. Tertiò dubium est, vtrum secretò loquens cum famulis Cardinalium in Conclauis existentibus, ligetur hac censura. Respondeo negatiuè, quia in præfato textu, excommunicantur secretò loquentes, cum Cardinalibus, vel cum aliquo ipsorum; famuli autem Cardinalium non sunt Cardinales, & in materia pœnali non est facienda extensio vltra propriam verborum significationem, *l. cum quidam, ff. de liber. & posthum. cap. renouantes. 22. dist. 10. cap. odia de reg. iur.*

Hoc tamen limitandum videtur, modò non loquatur cum famulis, imponendo eis, vt illud referant Cardinalibus, in hoc enim casu ligari videtur excommunicatione, nò tanquam secretò loquens cum Cardinalibus, sed tanquam mittens nuncium; sicut enim tradens famulo Cardinalis scripturam Cardinali referendam, dicitur mittere scripturam Cardinali; ita etiam loquens cum famulo Cardinalis de re aliqua, vt eam referat Cardinali, dicitur mittere nuncium, secùs dicendum est, si loquatur cum famulo Cardinalis, absque præfata intentione, etiam si fortè famulus auditum ab ipso significet, & referat Cardinali; tunc enim non dicitur mittere nuncium iuxta strictam verborum significationem.

Quartò dubium est, vtrum requiratur consensus omnium Cardinalium, vt quis excusetur ab excommunicatione alloquendo Cardinales in Conclauis existentes. Respondeo solutionem constare ex supradictis *disp. 1. quæst. 3. num. 7.*

Hæc dicta sint ad intelligendum, *cap. vbi periculum, de elect.* in quo extat excommunicatio non reseruata.

9 Observandum tamen est præter dictam excommunicationem , aliam additam fuisse à Pio IV. anno 1562. in Bulla 63. in ordine, quæ incipit , *In eligendis Ecclesiarum Prelatis*, S. litteras, in qua constitutione Summus Pontifex sub excommunicatione ipso facto incurrenda, & Sedi Apostolicæ reservata prohibet litteras , aut scripta, cuiusvis generis, seu nuncium, vel notam, aut signum ad eos, qui in Conclavi sunt, mittere, seu recipere; aut contra è Conclavi ad eos qui foris erunt, ibi, *Litteras verò, aut cuiusvis generis scripta, ad eos qui in Conclavi erunt, seu nuncium, vel notam, aut signum mittere, aut recipere, aut contra è Conclavi ad eos, qui foris erunt nullo modo liceat. Qui contra fecerint, quacumque dignitate, etiam Cardinalatus honore præfulgeant, pœnæ excommunicationis lata sententiæ subiaceant, absolventi facultate, præterquam in mortis articulo, soli Pontifici Maximo reservata, à quo nihilominus pro qualitate delicti, ultra dictam excommunicationis pœnam puniendi erunt.*

Ex quo patet differentia inter istam, & præcedentem excommunicationem, primò, quod ista est reservata Summo Pontifici, illa nequaquam; secundò, in ista non solum prohibitum est mittere litteras, scripta, & signa, verùm etiam illa recipere; in illa verò non imponitur excommunicatio recipientibus, tertio in illa prohibitum est sub excommunicatione secretè loqui, in hac verò constitutione prohibitum est quidem, sed non sub censura, vt patet ex illis verbis, *Clausò Conclavi nulli ad Colloquium etiam extrà portam Conclavis, etiam Principum Oratores, nisi ex magna, & urgentissima causa à maiori parte Collegij approbata admittantur.* Quamobrem secretò loquens incurrit quidem excommunicationem, non tamen reservatam.

An verò hæc Censura incurratur antequam scriptura, vel nuncius ad eum perveniat, ad quem mittebatur, patet ex supradictis, num. 2.

10 Sed modò dubium est, primò, vt rum ad istam excommunicationem incurrendam opus sit, vt scriptura tractet de re ad Pontificis ele-

S 2 ctionem

tionem pertinente. Respondeo id non requiri, sed sufficere quamlibet scripturam. Ratio est, tum quia Summus Pontifex ad præcauenda pericula, prohibet mitti, vel recipi scripta cuiusvis generis, ibi, *Litteras verò, aut cuiusvis generis scripta*. Tum quia, sicut prohibetur quælibet locutio cum Cardinalibus, ita etiam cuiuslibet scripturæ transmissio. Addo sub eadem excommunicationis pœna prohibitum esse nuncium, notam, aut signa mittere, etiamsi illa signa nota sint tantummodo mittenti, & ei ad quem mittuntur, vt si quis cum aliquo, qui Conclauē ingressus est, confingat quosdam characteres, aut signa, vt alter intelligat, certum quid significare, quoties tale signum dederit.

11 Addo illum affici excommunicatione, qui aliquid scriptura inuoluit, illudque in Conclauē mittit, etiamsi timeat fore, vt illa scriptura non legatur, adhuc enim dicitur mittere aliquod scriptum ad eos, qui in Conclauē existant, & sicut mercator retinens folia libri vetiti ad inuoluendum cascum, afficitur excommunicatione lata contra retinentes libros vetitos, vt cum communi Doctorum sententiā docui in explicatione *Bulle Cane*, ita, &c. secùs si mittantur libri, aut chartæ typis impressæ, vel papyrus necessaria ad aliquid inuoluendum, hæc enim non vocantur litteræ, vel scripta. Hæc tamen intellige, nisi mittantur tanquam signum ad aliquid significandum ex præuia conuentione, vt dictum est *num. 10.*

12 Secundò dubium est, vtrum deferens litteras, seu scripta, incurrat excommunicationem istius constitutionis. Respondeo negatiuè, etiamsi alloquatur ipsum, ad quem litteras deferret; Ratio est, quia aliud est mittere nuncium, scripturam, aut signum, aut recipere; aliud verò deferre, hic tamen incurrit excommunicationem, *cap. vbi periculum*, si secretò loquatur, vt suprà dictum est.

13 Tertiò dubium est, vtrum mittens, vel recipiens modicum chirographum, & valde breuem scripturam, vinculo huius censuræ obstringatur. Ratio dubitandi pro parte negatiua est, tum quia paruitas materiæ semper excusat à mortali, consequenter etiam ab ex-

com-

communicatione, quæ ob peccatum mortale incurritur, tum quia legens octo, vel decem lineas libri ob hæresim damnati, non afficitur excommunicatione lata contra legētes libros Hæreticorum, etiam si in illis paucis lineis insertus sit error, cuius causa liber ille damnatus fuit, ergo multo minus in præfatis casibus incurrit excommunicationem mittens, vel accipiens breuissimum chirographum.

His non obstantibus omnino sustinendum est, tam recipientem, quam mittentem breue chirographum, in præfatis casibus vinculo excommunicationis ligari; ratio est, tum quia prohibitio generalis est; non solum enim prohibentur litteræ, verum etiam scripta cuiuscumque generis notæ, & signa; huiusmodi autem chirographum comprehenditur sub nomine scripti cuiusvis generis, vel saltem sub nomine notæ, aut signi; tum quia ubi est eadem ratio, debet etiam esse eadem iuris dispositio, *l. illud, ff. ad legem Aquil. l. illud, C. de sacros. Eccles. & l. à Titio, ff. de furtis*. Ratio autem ob quam illa excommunicatio lata est, militat tam in breui chirographo, quam in longiori, cum inde arripi possit occasio impediendi liberam futuri Pontificis electionem.

Ad primam rationem dubitandi. Respondeo in hoc casu non adesse paruitatem materiæ, sed materiam ipsam sufficiētem ad mortale, & ad censuram incurrendam, vt patet ex rationibus à me allatis.

Ad secundam negatur consequentia. Ratio disparitatis est, quia illa excommunicatio lata est contra legentes libros hæreticorum, qui autem paucas lineas legit, non dicitur moraliter loquendo librum legere, consequenter ratione paruitatis materiæ à mortali, & à censura excusatur, qui verò breue chirographum in Conclauē mittit, vel recipit, dicitur recipere aliquod scriptum, notam, vel signum, quod est materia istius excommunicationis, consequenter non excusatur à mortali, & ab excommunicatione.

Q V A R T A P R O P O S I T I O .

14 **A**bsolutio istius excommunicationis Summo Pontifici referuata non est. Ratio est, quia Gregorius X. qui hanc excommunicationem in Concilio Lugdunensi edidit, *cap. ubi periculum citato*, absolutionem non referuauit, secùs dic de excommunicatione Pij IV. vt dictum est, *num. 8.*

Q V Æ S T I O V.

De excommunicatione contra occupantes bona Cardinalium in Conclau existentium, aut etiam alibi.

S V M M A R I V M.

1. Refertur textus in quo ista excommunicatio continetur.
2. Assignatur materia istius excommunicationis.
3. Inuadens domum alicuius Cardinalis, non incurrit istam excommunicationem, nisi etiam aliquid rapiat, an autem aliam incurrat, explicatum est in tract. de censuris in particulari.
4. Inuadens domum alicuius Cardinalis armata manu incurrit excommunicationem, etiamsi vox non prodierit ipsi in Papam electum suis-
5. Vulnerans aliquem in domo Cardinalis, postquam eam domum armata manu inuasit excommunicationem incurrit.
6. Explicatur subiectum istius excommunicationis.
7. Excommunicatio lata ob inuasionem domus Cardinalis an referuata sit.
8. Inuadens domum Cardinalis quas pœnas præter excommunicationem incurrat.

NE à consuetō tractationis vsu recedam, quatuor explicabo, primò, vtrum extet ista excommunicatio, secundò, quāenam sit istius materia; tertio, quōdnam sit subiectum; quartò, vtrum absolutio reseruata sit.

PRIMA PROPOSITIO.

I Occupantes bona Cardinalium in Conclauī existentium, aut etiam aliās ipsorum domum inuadentes, & aliquid hostiliter diripientes, aut aliquem ibi existentem vulnerantes anatematici subiiciuntur.

Ista excommunicatio lata fuit prius in Concilio Cōstantiensī sess. 41. in Decreto, omnis aetas, contra eos qui violenter occupant res electi in Papam, aut Cardinalium electorum, aliorūque in Conclauī existentium; verum quia fortè Decretū Concilij Cōstantiensis omnino receptum non fuerat, Leo X. in Bulla 16. quæ incipit *Temerriorum*, confirmans constitutionem Honorij III. & Bonifacij VIII. in cap. *felix*, de pœnis, in 6. extendit dictam constitutionem ad eos, qui armata manu inuadunt domum alicuius Cardinalis, & aliquid violenter, hostiliter rapiunt, aut aliquem ibi existentem vulnerant, aut ad huiusmodi delictum mandato, aut consilio cooperantur, aut ratum habent, vt patet ex verbis Bullæ Leonis X. §. 3. ibi, *Et nihilominus constitutiones easdem tum omnibus, & singulis in eis contentis censuris, & pœnis, ad omnes, & singulas personas cuiuscumque status, conditionis, & excellentiæ existentes, qui alicuius dictorum Cardinalium domum, tam tempore dicti Conclauis, etiamsi in Romanū tunc Pontificem si electus, quàm alias, quādo cumque, & ex quacumque causa armata manu inuadentes, & in ea violenter, hostiliter aliquid diripientes, aut quempiam ex inibi existentibus vulnerantes, & eorum socios, & qui id fieri mandauerint, vel factum eius nomine ratum habuerint, ac ipsi inuasoribus, consilium in praemissis, vel fauorem præstiterint, & defenderint extendimus, & ampliamus.*

SE-

S E C V N D A P R O P O S I T I O .

2 **M**ateria istius excommunicationis consistit in actionibus in hac Bulla expressis; Prima actio est, armata manu inuadere domum alicuius Cardinalis, & aliquid violenter, & hostiliter rapere, is autem dicitur hostiliter rapere, qui hostili modo rapit, seu tanquam hostis, seu publicè, & manifestè, vt in simili dixi in *Bulla Cagna, quest. 12. punct. 1. num. 6.*

3 Rogabis primò, vtum ad incurrendam istam excommunicationem satis sit, vt quis armata manu inuadat domum Cardinalis, an etiam requiratur, vt aliquid violenter tanquam hostis rapiat.

Respondeo, vtumque requiri si loquamur de excommunicatione, quàm hic explicamus. Ratio est, quia Summus Pontifex loquitur per particulam coniunctiuam, & ibi, *armata manu inuadentes, & in ea violenter, hostiliter aliquid diripientes*; natura autem dictionis &, est coniungere, & copulare antecedentia cum subsequenibus, non verò disiungere, & separare, *l. Titia Textores, §. nihil, ff. de legat. l. si heredi plures, ff. de condit. inst. & l. si quis ita stipulatus, ff. de verborum obligat.*

Hinc sequitur eum non affici excommunicatione Bullæ Leonis X. citatæ, qui aliquid è domo Cardinalis violenter, & hostiliter rapit, nisi etiam illam armata manu inuaserit.

Secundò eum non subijci huic excommunicationi, qui titulo lætitiæ, & ex rationabiliter præscripta voluntate Cardinalis in Papam electi, domum ipsius diripit, quia hoc non facit tanquam hostis, in Concilio tamen Constantiensi citato id vetitum erat, etiamsi fieret prætextu lætitiæ.

Tertiò eum non ligari hac censura, qui spoliatur cubiculum Papæ in Conclauis constructum, nam Bulla Leonis loquitur de inuadentibus, & diripientibus domum, quod verificatur de domo extra Concilium posita. Dixi in responsione, si loquamur de excommunicatione, quam hic explicamus, nam si loquamur de excommunicatione lata contra hostiliter insequentes Cardinales in *cap. felices, de penis in 6.*
quam

quam Leo X. in hac Bulla confirmavit, perspicuum est illum, qui hostiliter inuadit domum, in qua Cardinalis existit, excommunicatione affici, etiamsi nihil violenter diripiat, vt patet ex dictis in *Bulla Cæne, Canone 1.1. quæst. 12. puncto 1. num. 6. & seqq.*

4 Rogabis secundo, vtrum ad incurrendam istam excommunicationem opus sit, vt inuasio fiat, dum Cardinalis in Conclauis existit, & de ipso prodit vox quod in Pontificem sit electus.

Respondeo negatiue, sed satis esse quoduis tempore fiat, quia Leo X. generaliter loquitur, ibi, *Qui alicuius dictorum Cardinalium domum tam tempore dicti Conclauis, etiamsi in Romanum tunc Pontificem sit electus, quam alias quandocumque, & ex quacumque causa.*

Secunda actio est, vulnerare aliquem ex ijs, qui in domo Cardinalis existunt, quamobrem si quis armata manu inuadat domum Cardinalis, & aliquem ibi existentem vulneret, afficitur excommunicatione, etiamsi nihil inde rapiat, quid autem significet verbum vulnerare, patet ex dictis in expositione *Bulle Cæne.*

5 Rogabis, vtrum ista excommunicatio incurratur ab omnibus qui aliquem vulnerant in domo Cardinalis. Ratio dubitandi pro parte affirmatiua est, quia ista actio est distincta à prima, & exprimitur per particulam disiunctiuam *aut*; ad verificandam autem propositionem disiunctiuam sufficit alteram partem veram esse, *l. si heredi plures, ff. de condit. institut. & l. si quis ita stipulatus in fine, ff. de verbor. oblig.*

His non obstantibus. Respondeo istam excommunicationem incurrere ab ijs qui aliquem in domo Cardinalis existentem vulnerant postquam eam domum armata manu inuaserunt. Ratio est, quia Summus Pontifex loquitur de ijs, qui domum Cardinalis armata manu inuadunt, & simul aliquid hostiliter rapiunt, aut aliquem vulnerant, quapropter dictio illa, *aut*, non est disiunctiua respectu inuadentium, sed respectu rapientium, ita, vt sufficiat rapere, aut vulnerare post inuasionem domus, hinc patet responsio ad rationem dubitandi.

Tertia actio est, socium esse, id est, participem esse delicti, quod committitur aliqua prædictarum duarum actionum. Quarta est man-

T dare.

dare . Quinta ratum habere factum suo nomine ; Sexta consilium, vel fauorem præbere, & defendere .

TERTIA PROPOSITIO.

6 **S**ubiectum istius excommunicationis sunt omnes , & singuli, qui aliquam ex præfatis actionibus faciunt , nam Summus Pontifex in præfata Bulla generaliter loquitur, ibi, *Ad omnes, & singulas personas cuiuscunque conditionis, status, & excellentia existentes.*

QUARTA PROPOSITIO.

7 **A**bsolutio istius excommunicationis Summo Pontifici reseruata est . Ratio est, quia licet in præcitata Leonis X. Bulla, nulla reseruationis mentio habeatur, nihilominus excommunicatio, *cap. felix de pœnis, in 6.* reseruata est ; ergo etiam ista excommunicatio reseruata est, nam Leo X. extendit excommunicationem, *cap. felix,* cum omnibus ibi contentis ad eos qui aliquam ex actionibus in secunda propositione explicatis faciunt.

8 Secundo dubium est, vtrum præfati delinquentes præter excommunicationem reseruatam, alias pœnas incurrant .

Respondeo, quamplures alias incurrere, vt bannum, infamiam, publicationem bonorum, priuationem beneficiorum, & alia, quæ in *cap. felix citato*, recensentur . An autem istæ pœnæ incurrantur ante vllam Iudicis sententiam, constat ex dictis *de legibus*, vbi generales regulas tradidi.

Q V Æ S T I O V I

De excommunicatione contra Cardinales simoniam committentes in electione Papæ .

S V M M A R I V M.

1 *Simoniam committens in electione Papæ, excommunicationem incurrat.*

2 *Assigna-*

2. *Assignatur materia istius excommunicationis.*
3. *Enumerantur ea propter quæ incurritur excommunicatio, faciendo contra contenta in hac Bulla.*
4. *Excommunicatio lata ob simoniam contractam causa electionis Papæ non incurritur, quovis tempore præfata simonia committatur, sed si committatur Sede vacante.*
5. *Assignatur subiectum istius excommunicationis.*
6. *Absolutio istius excommunicationis reservata est.*

Explicabo primo loco, an ista excommunicatio extet, secundo quænam sit eius materia, tertio, quòdnam sit subiectum, quarto, vtrum eius absolutio reservata sit.

PRIMA PROPOSITIO.

I Committens simoniam Sede vacante in electione Papæ excommunicationem, & alias pœnas incurrit, nam Iulij II. in Bulla quæ incipit, *cum tam divino*, non solum prohibet electionem Papæ simoniacè fieri; verum etiam electionem simoniacè factam absolutè, & omnino irritat, gravèsq; pœnas tam sic electo, quàm eligètib; imponit, ac denique statuentes, disponentes, vel facientes, seu attentantes aliquid Sede vacante contra illam constitutionem, seu contrauenientes, excommunicationi subijcit, nonnulli tamen Doctores, quos retuli *disp. 1. quæst. 2. S. vnico*, putant hanc Bullam vsu receptam non esse, sed hoc ego ibidem reprobavi, vide quæ ibi tradidi, vbi de simoniaca electione prolixiùs egi.

SECUNDA PROPOSITIO.

Materia istius excommunicationis sunt sacrilegæ actiones in præfata Iulij II. Bulla prohibitæ, quarum prima est, contrauenire ijs, quæ in illa Bulla constituuntur; secunda est statuere, disponere, ordinare, facere, vel attentare aliquid Sede vacante contra

T 2 ea,

ea, quæ in dicta Bulla continentur; in Bulla enim dicitur, *Inhibentes, ne Apostolica Sede vacante prædictis contravenire, vel contra præmissa, vel aliquid præmissorum statuere, disponere, & ordinare, vel aliquo modo facere, seu attentare præsumant, quocumque exquisito colore, vel causa sub excommunicationis lata sententia pœna, quam ipso facto incurrant, & à qua non nisi per Romanum Pontificem canonicè electum absolvi possint, nisi in mortis articulo.*

3 Sed modò dubium est, quænam in dicta Bulla contineantur. Respondeo primò, primum, & præcipuum esse, cauere ne electio Papæ fiat cum hæresi simoniaca, dando aliquid, promittendo, vel recipiendo, per se, vel per alium, alioquin Cardinales huius criminis rei, excommunicatione ligantur; excommunicatio enim lata est contra Cardinales, qui prædictis contravenire præsumunt, dando, promittendo, vel accipiendo pecunias, bona cuiuscumque generis, castra, officia, vel beneficia, seu promissiones, & obligationes per se, vel per alium, seu alios causa electionis.

Crimen simoniæ vocatur Hæresis, quia, qui huiusmodi crimen committit, spiritualia pretio æstimat, vel æstimare præsumitur.

Secundum est, vt non solum huiusmodi electio irrita sit, nec conuolidetur per intronizationem, cursum temporis, adorationem, aut obedientiam Cardinalium; verum etiam sic electus sit ipso facto, absque alia declaratione priuatus Cardinalatu, dignitatibus, beneficijs, & pensionibus, sit Apostaticus, & tanquam simoniacus, & Hæresiarcha; ad prædicta omnia, & singula inhabilis habeatur; eandem priuationem Cardinalatus, dignitatum, & beneficiorum incurrunt Cardinales simoniacè eligentes, nisi coniunxerint se alijs Cardinalibus infrà terminum octo dierum postquam fuerint ab eis requisiti.

Tertium est, licere, Cardinalibus omnibus Clero, Populo Romano, & omnibus officialibus impunè recedere ab obedientia Papæ simoniacè electi.

Quartum est, Cardinales posse brachium seculare implorare, si electus

electus per simoniam ingesserit se regimini vniuersalis Ecclesiæ.

Quintum est, vt omnes mediatores huiusmodi electionis simoniæ, sint ipso facto priuati honoribus, beneficijs, ac bonis, ad similia inhabiles, tam actiue, quàm passiuè, intestabiles, & eorum bona fisco, instar reorum criminis læsæ Maiestatis, ipso facto applicentur.

Sextum est, vt omnes obligationes simoniæ in electione Papæ irritæ sint.

Septimum, vt Cardinales nō complices electionis simoniæ possint alium eligere, adhibitis etiam alijs Cardinalibus complicitibus simoniæ qui se cum ipsis coniungere voluerint.

Ex dictis facillè colligitur Cardinales affici excommunicatione, non solum si labem simoniæ committere præsumant in electione Papæ; verum etiam si præsumant decernere electionem Papæ simoniacam, non fuisse inuolidam, aut licitum non esse recedere à sic electo, aut si præsumant facere aliquid contra præmissa.

4 Rogabis, vtrum ista excommunicatio incurratur, quouis tempore præfata actiones fiant. Respondeo incurri solum si fiant Sede vacante, sic enim decernitur in præfata Iulij II. Bulla, ibi, *Inhibentes omnibus, & singulis S.R.E. Cardinalibus ne Apostolicæ Sede vacante prædictis contrauenire, vel contra præmissa statuere, &c.* An autem incurratur excommunicatio lata à Paulo IV. patet ex supradictis *quæst. 2. num. 3. & seqq.*

TERTIA PROPOSITIO.

5 **S**ubiectum istius excommunicationis sunt Cardinales qui aliquam ex præfatis actionibus faciunt Sede vacante; in Bulla enim dicitur, *Inhibentes postremò omnibus, & singulis S.R.E. Cardinalibus, qui pro tempore erunt, & eorum sacro Collegio, ne Apostolica Sede vacante, &c. vide quæ suprà tradidi disp. I. quæst. 2. §. vñco, vbi de simoniaca electione prolixè disserui.*

QUARTA PROPOSITIO.

6 **A**bsolutio istius excommunicationis Summo Pontifici reseruata est, nam in Bulla Iulij II. dicitur, *A qua non nisi per*
Roma-

Romanum Pontificem canonicè electum absolui possint, nisi in mortis articulo.

Q V Æ S T I O VII.

De excommunicatione Gregorij XV. & sanctissimi D.N. Urbani, contra Cardinales non seruantes formam in eligendo Summo Pontifice præscriptam, aut præsumentes aliquid facere, vel attentare contra ipsorum constitutiones.

S V M M A R I V M.

1. *Assignatur materia istius excommunicationis.*
2. *Assignatur subiectum istius excommunicationis.*
3. *Absolutio excommunicationis contracta ob violationem constitutionis Gregorij XV. circa electionem, reservata est Papa, nec ullus virtute cuiuslibet privilegij excepto mortis articulo absoluerè potest.*

TRia principaliter explicabo, primò quænam sit materia istius excommunicationis; secundò, quòdnam sit subiectum; tertio, quis possit eius absolutionem conferre.

P R I M A P R O P O S I T I O.

Materia istius excommunicationis præcipua est, contrauenire formæ à Gregorio præscriptæ in electione Summi Pontificis, quæ autem forma præscripta sit, constat ex supradictis, & patet ex ipsa Bulla, in qua non solum traditur forma electionis præcisè, verum etiam iuramenti, & deputationis Cardinalium ad suscipiendum infirmorum vota, præterea sub excommunicatione præcipitur, vt scrutinium bis singulis diebus peragatur, vt Cardinales non infirmi post tertium Campanæ sonum ad locum Conclauis solitum conueniant, vt secretum seruent, vt à pactionibus, conuentionibus, promissionibus, alijsque obligationibus, minis, signis, contra signis suffragiorum, alijsque huiusmodi, tam respectu inclusionis, quam exclusionis,

clusionis, seu suffragio dando, vel non dando abstineant, vt electio non fiat nisi clauso Conclau, alioquin non teneat, vt electio nō fiat, nisi per secreta schedularum suffragia, vel per viam compromissi, vel quasi per inspirationem, iuxta formam ibi impositam, alioquin electio irrita sit, & inualida; in his omnibus casibus excommunicatio ipso facto imponitur, sub eadem excommunicationis pœna Cardinalibus prohibetur mutatio, alteratio, actio, vel etiam attentatio contra istam constitutionem, vel contra aliquid in ea contentum; vt autem exactior habeatur cognitio eorum, quæ in hac Bulla Cardinalibus præscribuntur, videnda sunt ea quæ tradidi *disp. 1. sub initio, vers. Breuis, & compendiosa enumeratio.*

SECUNDA PROPOSITIO.

2 **S**ubiectum istius excommunicationis sunt Cardinales contra istam constitutionem delinquentes; ipsi enim exprimuntur, & ab ipsis huius Bullæ observatio exigitur.

Addi potest casus in quo alij præter Cardinales hac censura ligantur, nempe ob electionem inualidam, quando electio celebrata fuit Conclau nondum clauso, aut non seruata forma scrutinij, accessus, compromissi, & quasi inspirationis; tunc enim non solum Cardinales, verum etiam complices, & fautores laqueo excommunicationis irretiuntur: nam in Bulla dicitur, *tam ipse, quam eligentes, eiusque fautores, & complices sententiam excommunicationis, & anathema, aliàsque censuras, & pœnas, inuasoribus Sedis Apostolica, à sacris Canonibus, & constitutionibus Apostolicis impositas, pariter ipso facto incurrant.*

TERTIA PROPOSITIO.

3 **A**bsolutio istius excommunicationis reseruata est Summo Pontifici, nec vllus excepto mortis articulo etiam virtute alicuius priuilegij potest ab ea absolvere, nam in præfata Bulla dicitur, *Aqua sicut ab alia quacumque in hac constitutione imposita, & irrogata, seu infra imponenda, & irroganda pœna excommunicationis, tam ipsi, quam quilibet alius, siue S.R.Ecclesiæ Cardinalis, siue alia persona cuiuscumque gradus, conditionis, dignitatis, & præeminentiae, à nullo, neque etiam*
à maiori

à maiori Pœnitentiaro, cuiuscumque facultatis vigore, præterquam à Romano Pontifice, nisi in mortis articulo absolui possit.

Hinc sequitur, primò Episcopum non posse absolutionem impedere, etiamsi delictum sit occultum; quamvis enim Episcopus possit à censuris Summo Pontifici reseruat, & ob delictum occultum contractis, absolueret, ex Concilio Trid. *sess. 24. cap. 6.* nihilominus ab ista non potest: quia Summus Pontifex absoluendi facultatem absolutè ademit, etiam maiori Pœnitentiaro post editionem Tridentini.

Neque obstat dicere in hac reseruatione non fieri mentionem Concilij Tridentini, consequenter non censi derogatum priuilegijs Episcoporum in Tridentino concessis. Respondeo enim primò iuxta communio rem sententiam, non requiri mentionem Concilij Tridentini in concessionibus Summi Pontificis, vt patet ex dictis de censuris in particulari *disp. 1. quest. 22.* dum loquerer de absolutione ab excommunicationibus in *Bulle Cænæ*. Responderi potest secundò, in hac Bulla derogari omnibus Constitutionibus, & Decretis, etiam Conciliorum generalium huic Bullæ contrarijs, ibi *non obstantibus, quatenus opus sit*, &c. quæ derogatio extendi etiam videtur ad reseruationem huius censure, cum derogatio sit generalis, quatenus opus est.

Secundò, sequitur, Religiosos non posse hoc tempore virtute suorum priuilegiorum ante istius Bullæ constitutionem concessorum, ab hac censura absolueret, vt patet ex allata ratione. An autem absolutio virtute, *Cruciata*, impendi possit, patet ex dictis de legibus, de cessatione priuilegiorum; & ex dictis de absolutione ab excommunicationibus *Bulle Cænæ*.

Tertiò sequitur absolutionem ab hac censura impendi posse, dum Summus Pontifex de nouo creatus dicit aliquibus Conclauistis, *Do vobis facultatem qua absolui possitis ab omnibus excommunicationibus contractis occasione Conclauis, seu creationis Pontificis*; tunc enim censetur data facultas Confessario, vt patet ex dictis de Sacramentis.

Ad Dei, Beatissimę Virginis, Sanctorumque omnium laudem.

F I N I S.

AD



AD D. MARTINI
 BONACINÆ
 DE MORALI THEOLOGIA,
 TOMOS TRES,
 PARALIPOMENA POSTHVMA.

Typographus, Lectori beneuolo.



S fuit omnium Doctorum mira consensione, & vnanimi iudicio, D. MARTINVS BONACINA; ea scriptorum eius moralium apud omnes approbatio, vt dignum planè, iustumque sit, tam boni doni nullam particulam præterire. Itaque cum inter eius schedia, post tanti viri è viuis excessum, repertæ essent nonnullæ appendiculæ ad certa loca manu Autoris appositæ; visum est, ne illis quidem, tametsi exiguis, fraudasse Lectorem; sed potius illud Christi consilium nobis propositum existimare; *Colligite quæ superauerunt fragmenta, ne pereant*. Nam est in his quoque fragmentis, & veluti micis è plenè apparato conuiuio residuis, edule quid, & reficiendo ingenio accommodatum. Vfus porò est Autor editione Lugdunensi anni 1629. in tres Tomos distributa; ad eamque pertinent numerales notæ paginarum, quibus

V hæ ac-

hæaccessiones sunt inferendæ, vt in singulis annotabitur . Quodd si quem ea editio deficit, parum interest. Nam numeri disputationum, punctorum, & quibus puncta subsecantur, singulis accessionibus adiuncti, prohibebunt aberratione, & vbi intexendæ sint, absque mora indicabunt. Hoc te, Lector, monitum debui, ac volui. VALE, & FAVE.



ADDI-

A D D I T I O N E S A D B O N A C I N Æ T O M V M P R I M V M

Operi suo insertæ ab ipso Autore, dum adhuc superesset.



E Sacramentis in genere, disp. 1. quæst. 2. punct. 1. num. 1. pag. 8. post hæc verba, ut dictum est de scamno. Adde, ita Suarez 3. part. quæst. 66. in comment. art. 1.

Ibid. propof. 3. fol. 9. num. 12. in fine. Adde. Vide Sanchez lib. 3. de matrim. disp. 4.

Ibid. num. 15. post hæc verba, Contra Ecclesiam Christi. Adde, Contrarium veritati formæ.

Et num. 17. qui præuidens inebriandum. Adde, qui præuidens se inebriandum.

Ibid. disp. 1. quæst. 6. punct. 2. fol. 32. col. 1. propof. vnica, vers. 1. in fin. post verba, Atque ex his. Adde. Ratio autem cur in infantibus non requiratur intentio propria, est, quia sicut non peccarunt propria voluntate, sed aliena; ita etiam saluari possunt aliena voluntate, id est, voluntate Ecclesiæ suppletis intentionem ipsorum.

De Confirmatione, disp. 3. quæst. vnica, punct. 4. propof. 2. fol. 68. col. 2. num. 11. post hæc verba. Ita Henriquez loco citato cap. 3. num. 4. Adde contra Venerum cap. 6. num. 11.

Disp. 4. q. 7. punct. 2. fol. 118. de Sacramento Eucharistiæ, col. 1. num. 10. in fine. Adde. Et ex professo tradit Rodriquez tom. 1. quæst. Regular. quæst. 56. art. 14.

De Pœnitentiæ Sacramento disp. 5. quæst. 5. sect. 1. punct. 9. prop. 2. fol. 190. col. 2. num. 3. post hæc verba, ita Caiet. 1. 2. quæst. 113. art. 3. Adde Valentia tom. 2. disp. 8. quæst. 5. puncto 5. Bellarm. lib. 2. de iustificat. cap. 16. Et paulò post hæc verba, contra Nugnum loco supra citato dubio 2. Adde Suarez 3. part. tom. 4. disp. 9. sect. 3. num. 3. Et post hæc ver-

V 2 ba ..

ba Coninchum loco citato concl. 1. num. 39. Scotum; & alios apud Suarez loco citato num. 3. & apud Vasquez 1. 2. quæst. 13. art. 2. *Adde* apud Tannerum tom. 2. disp. 6. quæst. 5. dub. 4. num. 89.

De Pœnitentiæ Sacramento disp. 5. quæst. 7. puncto 4. §. 1. fol. 265. col. 2. num. 17. vers. Finem post verba. Et quamvis Vasquez loco citato n. 3. *Adde* Henriquez lib. 7. cap. 12. num. 4. Suarez de pœnit. disp. 28. sect. 8. assert. 3.

De Sacramento Ordinis, disp. 8. quæst. unica, punct. 4. fol. 323. col. 1. num. 30. in fine. *Adde* vide dicenda tom. 3. disp. 3. quæst. 1. punct. 1. n. 22.

De Sponsalibus quæst. 1. puncto 6. propos. 2. fol. 348. num. 18. in fine, col. 2. ubi legitur, ita Sanchez disp. 48. Henriquez cap. 13. num. 3. & alij, quos sequitur Gutierrez cap. 27. num. 3. *Debet legi.* Vide Sanchez disp. 48. Henriquez cap. 13. num. 3. & alios quos sequitur Gutierrez cap. 27. num. 3.

De Matrimonio quæst. 2. punct. 6. fol. 368. col. 1. num. 7. post vers. 18. ante, Hic obiter aduerto. *Adde,* Hoc tamē limita iuxta dicenda, n. 18.

De impedimento Matrimonij, quæst. 3. punct. 13. fol. 426. col. 1. num. 27. lin. 35. post hæc verba, Et secundum illum contrahere matrimonium. *Adde,* hoc enim ius videtur ei à naturatributum: ita Henriquez.

Quæst. 4. quæ est de usu Matrim. punct. 5. propos. 1. fol. 445. col. 1. n. 23. lin. 39. ubi legitur. Respondeo virum innocentem. *Adde.* Respondeo primò virum innocentem.

Quæst. 4. quæ est de usu Matrim. pun. 15. propos. 4. fol. 467. col. 2. num. 11. lin. 42. post hæc verba. Emolumentis domus hospitalis. *Adde* nisi fortè hospitale sit valdè diues, ita vt præsumatur fundatorem voluisse omnes ali absque vlla spe recuperationis alimentorum; tunc enim cessat obligatio restituendi, cùm alimenta censeantur condonata. Ita Rebellus. *Et lin. 46. in fine, num. 11.* *Adde.* Et alij communiter, teste Molina contra Abbatem, cap. 1. de infantibus expositis. Surdus de alimentis, tit. 6. quæst. 19. num. 12. & alios; quorum ratio est, tum quia parentes non tenentur ex iustitia, sed ex pietate alere filios; violatio autem pietatis non inducit obligationem restituendi, tum quia repetitio

titio alimentorum non conceditur ei, qui aliquo iure alere tenebatur, etiam si protestatus sit, se illas expensas facere animo repetendi; protestatio enim non tollit illam obligationem quæ non pendet à voluntate protestantis. Tum quia quæ pietatis causa dantur, non repetiuntur, cap. sacrorum 12. quæst. 2. Verum ad has rationes responsio patet ex dictis in quarto Decalogi præcepto, & puncto 6. §. 1. num. 6. & seqq. & ex ratione à me superius allata.

Ibid. punct. 17. propos. 2. fol. 472. col. 2. num. 6. lin. 32. post hæc verba, ita permittente consuetudine. *Adde*, Imò mihi valdè probabilis videtur opinio Sanchez in sum. lib. 5. cap. 5. num. 22. vbi cum sancto Antonino, & Paludano simpliciter, & absolutè conatur ostendere ad officium Abbatissæ, vel Priorissæ non requiri virginitatem, nisi fortè Abbatissa sit velata speciali virginum velo, quod cum quadam consecratione, & benedictione propria ordinis Episcopalis traditur. Ratio est quia nullo textu probari potest ad Abbatissas communes virginitatem requiri. Neque obstat cap. iuueniculis 20. quæst. 1. vbi habetur nullam velari posse, nisi virginem sexagenariam. Respondetur enim illum textum non intelligi de Abbatissis communibus, sed de illis quæ velantur speciali consecratione propria characteris Episcopalis: in his enim requiritur virginitas; atque adeò admitti non debent ad officium Abbatissæ, absque facultate Papæ; eius enim est dispensare in iure communi; nec sufficere videtur dispensatio Episcopi, quia Episcopus regulariter loquendo dispensare nequit in iure communi. Vide Sanchez loco citato.

Ibid. pun. ultimo, fol. 476. col. 1. num. 10. lin. 39. post hæc verba, Quamuis Sanchez lib. 7. de matrim. disp. 13. *Adde* Coninchus de matrimonio disp. 31. dub. 4. num. 48.

Et fol. 480. col. 1. num. 27. lin. 21. post hæc verba, De licentia proprii Episcopi. *Adde*, Quia huiusmodi reconciliatio vicem gerit nouæ consecrationis; consecratio autem Ecclesiæ est functio Ordinis Episcopalis; & *post duos versus, adhuc verba* de consecrat. *Adde*, Ecclesiæ, vel Altaris. *Et in fine responsionis, ante tertiam propositionem, post hæc verba*,

Sanctissimi Corporis Christi. *Adde*, Ex dictis patet solutio illius difficultatis de qua aliàs sæpius interrogatus fui, à quo scilicet reconcilianda sit Ecclesia, vel Cœmeterium pollutum. Respondeo enim Ecclesiam consecratam, vel Cœmeterium antea consecratum, si polluat, non posse reconciliari reconciliatione strictè accepta, nisi ab Episcopo, quia huiusmodi reconciliatio est actus Ordinis Episcopalis, qui delegabilis non est, nisi fortè à Papa delegetur Sacerdoti, *cap.* aqua per Episcopum de consecrat. Eccles. reconciliari tamen potest reconciliatione latè accepta à simplici Sacerdote ex facultate Episcopi, vel eius Vicarij Generalis, seu Apostolici, tum quia huiusmodi reconciliatio non est propriè functio Ordinis Episcopalis, sed ceremonia sacra, qua aboletur macula, quæ per sanguinis effusionem illata fuerat Ecclesiæ, vel Cœmeterio, tum quia sicut Episcopus, vel eius Vicarius Generalis, aut Apostolicus potest facultatem celebrandi concedere in templo cultui diuino nondum dicato; ita etiam dispensare potest, ut diuina celebrètur in templo, vel Cœmeterio polluto, cum Cœmeterium pollutum æquari possit templo, seu Cœmeterio profano, & cultui Dei nondum dicato.

De Excommun. disp. 3. quæst. 2. punct. 5. fol. 559. col. 2. n. 3. lin. 20. post hæc verba, quæ in *cap. 1. de except. in 6.* decernuntur. *Adde*, Præterea si excommunicatus toleratus concurrere velit ad electionem, potest reijci, & is ad quem spectat confirmatio electionis, potest illam non acceptare, eamque reijcere, ac si facta non fuisset. Ratio est, quia non tenemur communicare cum excommunicato tolerato; sed possumus ab eius consortio abstinere, cum Extrauagans ad euitanda non fuerit facta in fauorem excommunicati, sed in fauorem aliorum, ita *Coninchus*, num. 93. & alij.

Disput. 10. quæ est de Irregular. quæst. 3. punct. 7. S. vnico, fol. 691. col. 1. num. 19. lin. 43. post verba, *Reginaldus* lib. 30. num. 204. *Adde*, Excipe nisi per ambitionem Simonis Magi pecuniam obtulerit; hic enim est irregularis, ut patet ex *cap. maritum* distinct. 33.

De hoc. Canon. disp. 2. quæst. 4. punct. 2. fol. 804. col. 1. num. 14. lin. 54.

post hæc verba, Videndum est ipsummet Concilium. *Adde*, Imò plures extant sacre Congregationis decisiones, quibus cauetur Canonicum, etiamsi Protonotarius Apostolicus sit, vel Vicarius Episcopi non lucrari distributiones, nisi sit in suo stallo, & induatur vestibus canonicalibus.

De clausura quest. 2. punct. 1. 2. §. 1. fol. 92. o. solam. 2. num. 9. & lin. 17. post hæc verba. Azor. loco citato quest. 1. *Adde*, sed quid ego sentio, patet ex dictis puncto 1. 1. §. 2. num. 1. & seqq.

Ibid. quest. 4. punct. 2. fol. 93. 3. col. 2. num. 3. lin. 45. post hæc verba, Demandata fuit. *Adde*. Rursus non obstat oppositum seruari pluribus in locis, in quibus facultas non solum colloquendi Moniales, verum etiam ingrediendi Monasteria Monialium Regularibus subiecta, concedi solet ab Episcopis, priuatiuè ad Superiores Regulares. Respondetur enim id licitè fieri, si fiat ex consuetudine post Concilium introducta; consuetudo enim tribuit ius, vt benè declarauit sacra Cardinalium Congregatio, sess. 25. cap. 5. vbi etiam explicauit vtrum Episcopo aliqua facultas competat circa licentias à Superioribus Regularibus concessas circa ingressum in Monasteria Monialium sibi subiecta, dato quòd Superioribus Regularibus competat ius concedendi licentias priuatiuè ad Ordinarios; ait enim seruandum esse consuetudinem, iuxta quam Superiores Regulares concedere solent huiusmodi licentias. Si tamen Episcopus aliqua ex causa expedire iudicauerit, præfatas licentias à Regularibus concessas improbare, poterit aliquem particularem impedire, quoties probabiliter ita expedire iudicauerit, quia cura clausuræ maximè spectat ad Episcopos; non tamen poterit ex toto licentias improbare, quia Episcopus non potest facultatem Regularibus auferre.

Ibid. quest. 4. punct. 3. fol. 93. 5. col. 1. num. 2. lin. 43. post verba, Absolutè licentiam. *Adde* in scriptis petit.

Fol. 93. 8. col. 1. num. 9. in fin. lin. 39. post verba præcedenti allatis. *Adde*. Idem dic de Artifice ingrediente ad temperanda organa incomposita, vel ad componendum horologium. Secùs. dic de Magistro ingre-

ingrediente ad docendum cantum, aut organorum pulsus; Moniales enim hæc commodè doceri possunt ad crates, vt suppono cum Sanchez loco cit. num. 42. & Lamas §. 6. *Et col. 2. num. 11. in fin. lin. 13. post verba*, & alios. *Adde*, quarum opinio probabilissima est.

De simonia disp. 1. quest. 7. §. 1. fol. 1016. col. 1. num. 10. post verba, num. 8. relatis. *Adde*. Hoc tamen intelligitur de pensionibus, aut alijs rebus, quæ ob simoniam confidentialem ex beneficijs acceptæ fuerunt; non verò si confidentialis simonia commissæ fuit in ipsa pensione præcisè; nam intentio Summorum Pontificum fuit, impedire successionem, quasi hæreditariam in beneficijs Ecclesiasticis.

Fol. 1018. col. 2. num. 8. lin. 50. post hæc verba, Si excommunicatio retraheretur. *Adde*, sequeretur.

De largitione munerum, disp. 3. puncto 6. fol. 1072. col. 1. num. 6. lin. penultima, vbi legitur: Imò aliquid, lege, Imò aliquid.

Fol. 1077. col. 2. num. 24. linea 20. vbi legitur, quæ prior licentia, lege, quia prior licentia.

De largitione munerum, disp. 3. punct. 6. fol. 1079. col. 2. num. 33. lin. 14. post verba, ita etiam. *Adde*, obligatur si ex culpa.

Disp. 6. ex varijs, quæ est de onere, & obligatione denunciandi, punct. 3. fol. 1110. col. 2. num. 7. lin. 52. post verba. puncto præcedenti, num. 7. Adde, & hic num. 3. & lin. 58. vbi legitur reg. 4. num. 9. lege §. 4.

Fol. 1113. col. 1. num. 7. lin. 62. post hæc verba, ac fictione confessionis. *Adde*, seu in confessionali, siue loco confessionis.



A D D I T I O N E S A D T O M V M I I.



E legibus disp. 1. quæst. 1. punct. 4. pag. 19. col. 2. vers. 1. num. 160. adde Becanus de legibus, tract. 3. cap. 6. quæst. 8. num. 3.

Ibidem vers. 13. post hæc verba, rosi videantur. Adde, & ne peccandi occasionem præbeant; potestas enim non est data in destructionem, sed in ædificationem. 2. Corinth. 13.

Pagina ead. & columna, vers. 20. post illa verba, & alios, adde, Quibus adde Becanum 2. part. tract. 3. cap. 6. quæst. 8. num. 3. & 4. ubi ait, eos, qui leges Pontificias non acceptant, licet peccent, quoties illas absque rationabili causa non acceptant, non tamen teneri ad legem obseruandam hac de causa, excusat multos in Germania non seruantes Decreta Concilij Tridentini, aut Bullæ Cœnæ, eo quod huiusmodi decreta multis in locis vsu recepta non fuerint. Addit etiam idem Auctor Episcopos, aut Principes, quibus mandatur, vt legem aliquam promulgent, ac recipiant, peccare, quoties illam absque iuxta causa non publicant, & non recipiunt; successores verò ipsorum, ait, non peccare, atque aded Episcopos, aut Principes hoc tempore viuentes, quorum antecessores non receperunt Concilium Tridentinum, aut Bullam Cœnæ, dum primùm publicarentur, in conscientia excusari, & multo magis eorum subditos. Verùm quid ego circa Bullam Cœnæ, quæ quotannis publicatur, sentiam, constat ex dictis in Bulla Cœnæ, disp. 1. q. 15. puncto 4. §. 5.

Disp. de peccatis, quæst. 2. punct. 4. num. 5. in fine, post illa verba, secunda propositione Adde, Sed prius obserua, ad vitandam turpitudinem in actibus secundum speciem indifferentibus, optimum consilium esse,

esse, si ad gloriam Dei referantur; tum quia sic adimpletur consilium illud Apostoli, siue manducatis, siue bibitis, siue aliud quid facitis omnia in gloriam Dei facite; tum quia huiusmodi opera non censentur otiosa, cum debito fine non careant; tum quia hoc pacto seruatur ius naturæ præscribens seruandum esse dictamen rectæ rationis; recta autem ratio dicitur, actiones mediatè, vel immediatè referri ad finem ad quem creati sumus, ita Becanus loco citato.

Ibidem, quasi. 4. punct. 6. num. 21. post illa verba, alij communiter. Adde, idem in simili docet Becanus loco citato num. 8. ubi ait, eum qui credit se teneri ad aliquam rationem, nesciens discernere ad quam virtutem pertineat, teneri solum illo præcepto generali, bonum faciendum, & malo fugiendum.



A D D I T I O N E S A D T O M V M I I I.

Disp. 1. quæst. 15. punct. 4. S. 5. fol. 121. column. 2. num. 2. circa finem, in linea, quæ incipit, & reiiciendam esse, post hæc verba. Adde, Cùm Pontifex non acceperit potestatem à populo, sed à Deo; ergo, &c.

Disp. 1. quæst. 16. punct. 3. fol. 127. col. 1. sub num. 5. S. Addo hoc, ita se habet cum suis adiunctionibus. Addo, hoc priuilegium ante sententiam Iudicis extendi ad Clericos, qui prima Tonsura, vel Ordinibus ab alieno Episcopo, sine litteris dimissorijs initiati sunt; adhuc enim vocantur Clerici in Domini sortem vocati, & è Laicorum grege extracti, donec per Iudicis sententiam declarentur priuati priuilegio. Ita Doctores citandi. Idem militat in eo qui Ordines suscipit ab Episcopo excommunicato, suspenso, deposito, vel degradato. Vide dicenda disp. 3. quæst. 1. puncto 11. num. 20. & sequent.

In eadem col. circa finem, vers. Respondeo secundò, eo absoluto. Adde, An autem ordinatus prima Tonsura, vel minoribus Ordinibus ab alieno Episcopo, cum falsis dimissorijs gaudeat Priuilegio fori, explicabitur loco citato; vbi ostendam post sententiam Ecclesiastici Iudicis, non gaudere, iuxta Constitutionem Urbani VIII.

Disp. 2. quæst. 2. punct. 16. fol. 246. col. 1. post medium vers. Ex quo sequitur, eo absoluto; Adde, Sed contrarium declarauit S. Congregatio Concilij sess. 4. apud Mazillam, & alios.

Ibid. quæst. 3. punct. 16. S. 4. folio 304. col. 2. num. 14. eo absoluto; Adde, Ideò sacra Cardinalium Congregatio referente Illustrissimo Cardinali Lante, sub 17. Nouembris 1617. Episcopo Marsensi rescripsit: Cappellas priuatorum Palatiorum immunitatis Priuilegio non gaudere.

Ibidem quæst. 3. punct. 16. S. 7. fol. 311. col. 1. ante num. 4. Adde. Ideò in Congregatione, sacre Consultæ 17. Nouembris 1617. decisum fuit.

fuit, eos fuisse tutos in Ecclesia, qui in porticu Ecclesiæ quendam ex præuia rixa occiderant, seque postea in Ecclesiam receperant; quia non dicuntur occidisse in Ecclesia, vel Cœmeterio. In fauoribus enim fit latior interpretatio; sed in odiosis, & pœnalibus strictior, ita vt delinquens in porticu non possit dici delinquere in Ecclesia. Remigius de Goni. de immunitate ampliat. 2. Ioannes de Visch, de immunitate, numero 60. & alij.

Ibidem quæst. 10. punct. 16. fol. 465. col. 2. ante num. 5. post verba, ff. de legat. 1. *Adde,* tum quia hic non defert præfata arma sub clypeo facultatum, vt suppono.

Disp. 3. quæst. 1. punct. 11. fol. 494. col. 2. num. 21. eo absoluto. Adde, Ratio est, quia huiusmodi ordinatio irrita est, quoad executionem, licet non sit irrita, quoad substantiam.

Ibidem quæst. 8. punct. 3. fol. 548. col. 1. ante quartum punctum. Adde. Tertio dubium, est, an Abbas Priuilegium habens conferendi Tonsuram, & minores Ordines suis subditis Regularibus, validè conferat Tonsuram, & minores Ordines ei, qui re ipsa sibi subditus non est, eo quod professionē inualidè emisit; quem tamen subditū putat.

Respondeo collationem Ordinum validam esse, & non iterandam. Ratio est; tum quia collatio Minorum Ordinum non est actus Iurisdictionis præcisè, sed est functio Ordinis Sacerdotalis, cap. cum contingat. de ætate, & qualitate; functio autem Ordinis non irritatur, in quocumque exerceatur; tum quia ita expressè declarauit sacra Cardinalium Congregatio, sess. 23. cap. 10. cuius declaratio refertur à Petro Mazilla, à Io. Gallemart, & à Farinaccio in declarat. Cardinal. sess. 23. cap. 10. Et alia antiquiora iura non irritant collationem Ordinum aliter factam, nec vtuntur verbo, non potest, sed verbo, non licet, quæ loquendi forma prohibet collationem Ordinum, sed non irritat aliter factam. Ita meo iudicio sentire debēt omnes illi Doctores, qui docent, minores Ordines esse Sacramenta, quorum Minister constitutus est à Deo, non ab Ecclesia. An verò specialiter collatio Tonsuræ teneat, colligitur ex supradictis quæst. 1. punct. 11. n. 20.

F I N I S.